

**NATIONAL ASSEMBLY OF
SEYCHELLES**

Wednesday 22nd September,
2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab e bonzour tou nou telespektater e oditer. Nou pou konmans Madanm Clerk nou pou konmans avek *First Reading*. Antretan madanm raporter ou ava kapab konmans apel bann delegasyon. Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm ki a lekout. Nou de *Bill ki pe ganny prezante premye the Penal Code (Amendment) Bill, 2021*;-

This Act may be cited as the Penal Code (Amendment) Act 2021 and shall be read and construed as one with the Penal Code Cap 158 which as amended is hereinafter referred as the Code.

Lot i *Prevention of Drug Abuse Rehabilitation Agency (Repeal) Bill, 2021*.

This Act may be cited as the Prevention of Drug Abuse and Rehabilitation Agency (Repeal) Act, 2021. Mersi Mr Speaker.

MR SPEAKER

Mersi Madanm Clerk. Bonzour Mr Patrick Payet Sekreter Deta pou Finans, Ms Irene Croisee Comptroller General, Financial Planning and Control Division, e Ms Astride Tamatave Deputy Comptroller General, Financial Planning and Control Division.

Mr Payet e son delegasyon i isi pou akonpany nou lo size Bidze siplemanter lo Mosyon prezante par *LGB*. Onorab Georges nou ava konmans avek ou Mosyon, apre nou ava pas dan Staz Komite pou delegasyon kapab partisipe. Onorab Georges.

HON BERNARD GEORGES

Mersi Mr Speaker. Bonzour SS Payet avek ou tim. Mersi pou fer nou sa loner vin devan nou ozordi. Bonzour tou bann Manm Onorab, Clerk, Deputy Clerk, *staff* Lasanble e tou dimoun ki pe swiv nou dan lakour.

Mr Speaker Mosyon devan nou i en *Supplementary Estimate Motion* e i lir koumsa;- *The National Assembly resolves to approve a supplementary estimate of SR 303,911,788.83 for the year 2021 laid before the Assembly in accordance with Article 154(6) of the Constitution.*

Mr Speaker apre ki Mosyon i ganny segonde, mon ti ava kontan dir detrwa mo an faver sa Mosyon. Mersi.

MR SPEAKER

Mersi mon ava apel pou segonnman sa Mosyon silvouple. Onorab Sandy Arissol.

HON SANDY ARISSOL

Bonzour Mr Speaker. Bonzour SS Payet avek ou delegasyon, tou bann Manm, tou dimoun ki a lekout.

Mr Speaker mon ti ava kontan segonn Mosyon anmennen par Onorab Georges. Mersi.

MR SPEAKER

Mersi Onorab. Onorab Georges nou ava ekout ou.

HON BERNARD GEORGES

Mersi Mr Speaker. Mr Speaker parey mon ti dir taler sa i en *Supplementary Budget*, en *supplementary estimate* ki vin

devan nou Lasanble. E avek ou permisyon etandonnen ki sa se premye ki vin devan sa Lasanble e pou benefis bann nouvo Manm, permet mwan pas en pti pe an revi lo Lalwa e bann provizyon Konstitisyon, ki permet a ki nou pe al fer ozordi.

Parey Mosyon i dir lartik 154 nou Konstitisyon, i permet ki dan en lannen apre ki en Bidze in pase, en *supplementary estimate* i kapab ganny anmenn devan Lasanble.

E sa i toutafe normal aköz en Bidze i pa en syans egzakt, parey nou konnen. Nou menm ki fer Bidze dan lakour tanzantan nou pa *achieve* oubyen nou *overspend*.

E donk provizyon i bezwen ganny fer pou kapab *manage* en *overspend* ler i arive en keksoz ki pa ti ganny previ ler Bidze ti pase. E sa provizyon donk anba lartik 154 i permet Gouvernman fer de keksoz, swa depanse e apre vin devan Lasanble pou demann permisyon retrospektiv pou sa depans ki'n ganny fer.

Oubyen vin avan depans i ganny fer, vin devan Lasanble pou demann laprouvasyon sa depans ki pou al ganny fer. E se sa prosedir ki'n depi trwazyenm Lasanble mon krwar, ki Lasanble in deside i devret ganny swiv.

Nou pa devret amwen ki i annan en *emergency* les Gouvernman depanse malgre ki i anba Konstitisyon i kapab fer li e apre vin rod permisyon retrospektiv. Lasanble in demann avek Gouvernman – (bann Gouvernman siksesiv depi trwazyenm Lasanble parey mon'n dir) o tan ki posib vin kot Lasanble avan ki zot depanse.

E vin demann lotorizasyon Lasanble, parey Konstitisyon i demande par en rezolisyon Lasanble pou permet sa depans arive. E se dan sa konteks ki sa Mosyon i vin devan Lasanble ozordi.

Donk prosedir anba Konstitisyon i an de faz. Preme faz ler i annan en *supplementary estimate*, fodre Lasanble i *resolve* - anfen premye an trwa faz mon kapab dir.

Preme keksoz se Minister Finans, Gouvernman i *lay* devan Lasanble en *supplementary estimate*. Sa se premye faz. E sa ti ganny fer dan *mid-year review* par Minis. E nou tou annan devan nou sa dokiman kle ki nou pou swiv li la ozordi e sa se sa dokiman 10 paz ki kontenir tou sa *supplementary estimate* ki nou pe regarde ozordi.

Donk premye keksoz se ki Minister e Gouvernman i *lay* sa

estimate devan nou Lasanble. Parey Mosyon i dir nou, nou bezwen ozordi nou ganny demande pou aprouv sa *estimate* ki'n ganny *laid* devan Lasanble anba Lartik 154(6) nou Konstitisyon. E anba 154 (7) nou ganny demande pou rezourd konmkwa nou aksepte sa rezolisyon, (pardon) wi a rezolisyon sa *Supplementary Appropriation*.

Akoz dezyenm faz se sa Mosyon ki devan nou ozordi kot nou pou debat lo merit zeneral sa *supplementary estimate*.

E trwazyenm faz i pou ariv lannen prosenn aköz Konstitisyon i dir ki si nou aprouv sa Mosyon ozordi, se nek lannen prosenn ki en *Bill* en *Supplementary Appropriation Bill*, pou vin devan Lasanble. *The year following the resolution*.

Donk ordinerman parey nou tou konnen, se dan *Second Reading* en *Supplementary Appropriation* oubyen *Appropriation Bill* Bidze, ki deba i ganny fer. Me si nou les deba ganny fer lannen prosenn ler *Bill* i vin devan nou - annefe sa ki nou pou'n fer se nou pou'n donn permisyon Gouvernman pou depans larzan avan ki nou aprouve.

E se pou sa rezon ki nou'n swiv sa pratik ki deba pou

ganny fer lo Mosyon e non pa lo *Bill*.

Akoz *Bill* pou vin lannen prosenn ler depans pou'n fini ganny fer, e se pou sa rezon donk ki Lasanble in adopte prosedir, ki nou pou debat lo Mosyon e non pa lo *Bill*. E se donk ki nou pou al fer ozordi.

E etandonnen ki nou pa kapab debat dan vid, sa ki nou'n deside fer pou premye fwa, se avan nou deba demann avek Minister vin devan nou Lasanble, nou ava rezourd nou lekor (sa mon ava fer en Mosyon taler) nou ava rezourd nou lekor dan en Komite Lasanble, pou permet bann Manm avan ki nou al dan deba li menm, poz otan kestyon ki nou kapab ki nou annan lo sa *supplementary estimate*.

E apre sa ler nou'n ganny enformen *panel* la, prezan nou ava al dan deba pou regarde si nou pou *resolve* pou aprouv sa *supplementary estimate*.

Donk vwala prosedir ki nou pou swiv ozordi. Tel parey Konstitisyon e pratik Lasanble i demann nou fer Mr Speaker.

Lo son *estimate* li menm, permet mwan Mr Speaker tre briyevman pou *sketch out* en pti pe bann pwen enportan lo sa *supplementary estimate* ki devan nou.

Parey zot ava rapel ler Minis ti vin prezant son *mid-year review* le 7 Septanm sa lannen, i ti fer nou konpran ki pli boner sa lannen ler nou ti aprouv Bidze. Nou ti aprouv en Bidze pou R11bilyon apepre.

E a sa moman Gouvernman ti'n ekspekte ki ti pou annan en *recovery* ase lan e ki nou ti pou annan en defisit fiskal apepre preski 12poursan.

Me annefe nou'n parey nou'n vwar lekonomi, in fer ki sa defisit fiskal pou mwens konsidableman mwens.

E dezyenm keksoz ki Minis in fer nou konpran, se ki in annan en gran rediksyon dan depans Gouvernman ziska prezan. Prensipalman bokou proze kapital pa'n kapab *take-off*, alor in annan en *saving*.

Dan en fason ki - si zot regard zot dernyen paz zot dokiman, zot ava vwar ki sa ki pou arive se ki lo en depans 303 milyon ki nou pe ganny demande pou aprouve ozordi, Gouvernman pou fer en *saving* R1.4 bilyon. E donk *the net saving* pou 1.12bilyon si nou aprouv sa rezolisyon ozordi.

E sa ki nou pe ganny demande ozordi se *focus* lo *the supplementary estimate* - pa lo son *saving*. *Saving* sa set en lot keksoz. E Gouvernman a nenport ki moman i kapab anba

en Lalwa ki apel *The Public Finance Management Act*, Minis i kapab donn en lenstriksyon avek bann MDAs, pou redwir zot depans. Sa i kapab arive a nenport ki moman anba seksyon 26.

Me osi par natir Bidze annan de fwa sa vot ki nou nou'n donn en MDA, i pa *achieve* pou en rezon ou en lot. I pa parey nou'n vwar la ozordi ki apel '*Expenditure*' par egzantp ou pa kapab konmans en proze atan alor ou fer *saving*.

Donk dan en Bidze non selman annan de fwa ou *overspend*, me annan de fwa ou *underspend*.

E donk ler ou *underspend* ou fer en *saving* lo ou Bidze e ler ou balanse *end of the year* i kapab ki ou pa'n depans tou larzan ki Lasanble in aprouve pou ou depanse.

Me *over and above* sa, i annan en provizyon anba *Public Finance Management Act* seksyon 26, i permet Minis dan plizyer sirkonstans pou limit depans en MDA pandan lannen, malgre ki nou isi nou'n vot en Bidze pou sa MDA. Donk vwala ki mannyer keksoz i marse.

Me parey mon'n dir taler ozordi nou pa pe *focus* lo *saving*, nou pou *focus* lo sa *supplementary expenditure* lo son kote 303milyon ki pe ganny

ki nou pe ganny demande ;- ki Gouvernman pe demann nou anba plizyer *heads*, donn zot lotorizasyon (akoz zot pa kapab fer li san nou lotorizasyon) pou depans an plis lo sa bann *heads*, malgre ki zot pou fer en e *saving* lo bann lezot *heads*.

Avan ki mon al lo bann *figures* zot menm, permet mwan pou fer en pti parantez eksplike ki mannyer malgre ki nou pe fer en pli gran *saving* ki sa depans siplemanter ki nou pe ganny demande pou fer.

Akoz ki sa in ganny en *Supplementary Appropriation* e non pa konman en *amended budget* parey nou ti ganny demande pou fer lannen pase zis apre COVID, ler nou ti pe ler Gouvernman ti pe lans proze FA4GR, ki ti pou anmenn en depans enorm an plis lo Gouvernman.

Rezon i senp. Parey mon'n dir dan tou lannen pou annan serten *savings* dan serten landrwa, e pou annan serten logmantasyon *expenditure* dan serten landrwa.

E sa i ganny *tackle* par en *supplementary estimate*. *Savings* i ganny fer parey mon'n dir otomatikman akoz ou pa depanse. Oubyen avek lord, anba lord Minis anba seksyon 26 *Public Finance Management Act*.

Me ler i annan en *wholesale review* Bidze, parey in bezwen arive lannen pase, ou pa kapab vin pou en avek en *supplementary estimate* tousel. Ou bezwen vin avek en *amended Budget* akoz sa ki ou pe fer.

So ou pa pe zis depans an plis e redwir en pe, nou pe pran larzan lo en vot ki'n ganny apropiye ou pe bouz li lo en lot vot ki pa'n ganny apropiye. Se sa ki ti arive lannen pase, se pou sa rezon ki lannen pase akoz ti annan en remaniman bidzeter konplet, nou ti bezwen *proceed* par en *amended budget* e non pa en senp *supplementary estimate* parey nou pe fer sa lannen.

E finalman donk Mr Speaker, avek ou permisyon les mon eksplik avek bann Manm ozordi, bann gran laliny sa bann logmantasyon ki nou pe ganny demande ozordi pou fer.

Premyerman zot ava vwar si zot regard premye *column* zot ava vwar en let *A, B, C, D, E* ek *F*. Premye gran *head* i vin anba saler parey zot ava vwar '*wages and salaries*' e sa sonm ki nou pe ganny demande pou aprouve i 39 milyon.

Zot pa pou vwar sa 39 milyon lo trwazyenm *column*, me zot pou vwar li dan de faz . Enn se 1.6milyon epi anba

'*other wages*' 27 milyon e ler ou azout sa de ansanm ou pou ariv lo sa sonm 39.8milyon ki Gouvernman pe demann depanse.

E sa zot ava vwar li anba *A* avek anba *B* '*other wages*'. Anba *C* lo paz 5 i vin '*goods and services*', - 'byen ek servis' e la i en gro sonm ki pe ganny demann an plis. E sa se R174 milyon.

E *breakdown* pou sa parey Minis ti eksplik nou dan son ladres pli boner sa mwan, i ganny reparti ant plizyer *MDAs* ki zot ava vwar la.

Pli gran sonm se 55 milyon pou Lazans Lagrikiltir, pou kouver sibvansyon bann fermye ki annan en *shortfall* ladan.

Me i annan plizyer *heads* ki zot ava vwar la Minister Lazenes, Minister Sanzman Klima ek Lanvironnman Zafer Etranzer. (*sorry* pli gro sonm eskiz mwan se 104milyon) pou Minister Zafer Etranzer ek Tourizm.

E set en sanzman akoz *STB* in sorti anba Minister Tourizm. Alor i annan en mouvman 104milyon la.

Trwazyenm pli o katriyenm *heads* se bann proze kapital e sa zot ava vwar li anba seksyon (*d*) - (*d*) for '*delta*' e la i annan en Bidze adisyonel -

(pardon) i annan en sonm 29 milyon konman Bidze adisyonnèl, me zot ava vwar i annan en gran rediksyon lo bann proze kapital ki pa'n kapab *take-off* parey mon ti dir taler.

Anba *heading (e)* 'Sibvansyon pou bann lantrepriz piblik' e sa sonm 27 milyon parey nou konnen, se prensipalman pou *SPTC* parey Minis Transport ti eksplik nou dan sa Lasanble de semenn pase, ki pa ti'n ganny prevwar.

E anba *(f)* se *Benefits and approved programme* en Bidze siplemanter pou *ASP* - en sonm 14 milyon pou prensipalman bann dimoun ki annan abilite diferan.

Donk e finalman lo paz 10 anler zot ava vwar i annan en *heads 'subscription to international organization* la osi i annan en sonm 16 milyon ki pe ganny propoze kot kouver en defisit ek *contingency* ki ti arive anba akòz *COVID-19*.

Donk *very briefly* vwala bann gran *heads* bann larzan siplemanter ki Gouvernman pe demann nou aprouve anba sa Bidze Siplemanter, sa *supplementary estimate* ki devan nou ozordi.

Me konsyan ki zot tou zot in lir sa papye e zot in remark sa bann *heads* zot menm e zot

pou annan kestyon pou demann avek *panel*.

Donk Mr Speaker avek ou permisyon finalman an konklizyon, permet mon anba *Standing Order 84* pou *move* en Mosyon san notis ki nou rezourd nou lekor dan en Komite *of the Whole Assembly* akòz sa i en *financial procedure* ki nou pe swiv ozordi.

E la *Order 84* i permet nou antre dan en *Committee of the Whole Assembly* pou egzamin en *financial procedure* ki avek Mosyon san notis.

Donk *my Motion is* ki nou *resolve* nou lekor dan en Komite Lasanble anba *Order 84*, pou konsider sa Bidze Siplemanter pou permet avek bann Manm pou angaz avek *panel* e rod en pe plis lenformasyon, avan ki nou ava retourn dan Lasanble pli tar pou kontinyen deba lo sa *Supplementary Appropriation*.

With these words Mr Speaker *I move in terms of my Motion*. Mersi.

MR SPEAKER

Mersi Mosyon ava ganny segonde silvouple. Onorab Arissol.

HON SANDY ARISSOL

Mesi Mr Speaker. Mon krwar parey Onorab Georges in dir pou fasilite en pe bann Manm

oubyen nou tou ki la pou demann serten klarifikasyon, mon segonn Mosyon pou permet zisteman pou nou kapab fer sa. Mersi Mr Speaker.

MR SPEAKER

Mersi Onorab Arissol. Bon nou bezwen vote lo sa Mosyon. Nou a pran en vot, Onorab ki an faver lev lanmen silvouple? Mersi mon vwar tou Manm in vote. Madanm Clerk. Okenn Manm ki kont?

Mersi. Lo Mosyon pour *move into Committee Stage* pou konsider enteraksyon lo Bidze siplemanter; nou'n ganny 28 vot pour, 0 vot kont e 2 abstansyon. Alor nou a kapab prosede. SS Payet ek zot delegasyon, nou pe envit zot prensipalman pou kestyon.

Me selman mon pou demann SS Payet si i ti a kontan fer okenn remark lo sa Bidze siplemanter *zis pou lead in into questions*. SS Payet.

SS PATRICK PAYET

Bonzour Mr Chair. Bonzour tou Manm Onorab e tou dimoun ki a lekout. Mr Chair mon krwar Onorab Georges in donn sa *summary of request* ki nou pe met devan Lasanble pou sa *supplementary 2021*.

Me selman zis kekfwa pou azoute parey Minis ti dir dan

son *mid-year review statement* ki nou ankor pe *run* en *budget deficit*, nou pa ankor ariv lo en sirplis. Me selman sa *deficit* ki nou ti'n prozekte pou 2021 in redwir. Nou ti'n prozekte en balans primer 11.8poursan *deficit*.

Me selman sa in redwir avek *mid-year review* avek sa *supplementary* ek bann *budget cut* ki nou pe fer sa in redwir pou ariv 7.6. Me selman sepandan nou *still* pe pret larzan. *Overall* larzan ki nou pe prete avek Bidze ki'n ganny revize pou lannen 2021, i R2.4bilyon.

E sa parey nou'n mansyonnen i pa avek bann diferan *development partners* an menm tan dan *domestic market*. Kekfwa sa osi Mr Speaker zis pou mwan met dan konteks, ki nou ankor pe *still run* en *budget deficit*, me sa in ganny redwir e nou ankor *still* pe pret larzan.

I annan en logmantasyon dan koleksyon taks pou sa lannen e *overall total revenue*. Me sepandan osi nou *Grant* in redwir. Lo kote taks Mr Chair en *estimate* ki nou'n reviz prozeksyon, se apepre 417milyon an plis pou prozeksyon pou taks koleksyon.

So on that note Mr Chair nou pare pou reponn okenn

kestyon ki bann Manm i annan lo *supplementary estimate*. Mersi.

MR SPEAKER

Mersi SS Payet. Nou ava envit Manm pou kestyon. Onorab Georges wi.

HON BERNARD GEORGES

Mr Speaker *Chief Whip* fek fer mon mazin en keksoz. Eski Manm pou demann kestyon lo *the whole supplementary*, oubyen eski nou pou al *head par head? (A,B,C,D,E,F)*? Nou pe zis demann sa pou kekfwa fasilite bann Manm *focus* lo en keksoz.

Kekfwa *Leader* Lopozisyon i ava annan en lopinyon oubyen SS Payet.

MR SPEAKER

Wi, nou a regarde wi. Mon krwar sa ki nou bezwen rode se en mannyer prose dan lord lo ki mannyer. Wi Onorab Pillay?

HON SEBASTIEN PILLAY

Mersi Mr Speaker. Mr Speaker mon krwar lefe ki i pou annan diferan size, i pou fer plis sans pou nou al *head par head*, e pran sak *head consecutively*. Mersi.

MR SPEAKER

Mersi. Bann lezot Manm i aksepte sa? *Ok* nou a kapab prosede. E *on top of the list* nou annan, eski mon pe regard sa dokiman byen la, nou annan '*current outlays*', nou annan '*wages and salaries*' par *Minister*.

So, savedir nou a pran *Minister* enn par enn en? Selman sa i riske pran en kantite letan parske ...

HON BERNARD GEORGES

Mr Speaker si ou permet mwan. Kekfwa nou kapab pran anba (a) nou ava pran '*Ministries and Departments*' avan apre nou a pran '*Regulatory Bodies*' apre nou a pran trwazyenm. Sak fwa i annan en *bold* mon krwar kekfwa nou a kapab pran sa seksyon, seksyon par seksyon.

MR SPEAKER

Ok.

HON BERNARD GEORGES

So sa premye kestyon i ava anmenn nou ziska *middle of page 2*.

MR SPEAKER

Ok. Nou annan *Ministries and Departments*' premye anba (a). Yes Manm ki annan kestyon. *Ok* pa anpese ki nou - ? Wi i annan 2 Manm ki ti'n fini lev lanmen Onorab Gill avek

Onorab Labonte. E Onorab Cosgrow ou lo sa seksyon ou? Wi, *please* Onorab Cosgrow ou annan laparol. Yes Onorab.

MINISTRIES AND DEPARTMENTS

HON WALLACE COSGROW

Mersi Mr Speaker. *Sorry* mon pa'n tro konpran si ou ti pe donn mwan laparol ouswa bann ki ti'n lev lanmen avan mon ki ti pou ganny pa parol.

Mersi Mr Speaker. Bonzour Mr Speaker. Bonzour SS Payet avek ou tim. Mr Speaker dabor avan mon al lo mon kestyon, mon ti a kontan, mon kontan sa pti sentez ki SS Payet in fer, ki montre nou sa Mosyon *savings* pa neserman antre dan sa ki Minis ti dir, ler i ti pe prezante. E osi ki *LGB* in dir bomaten ki Gouvernman in fer *savings*.

Akoz nou bezwen ganny *reminded* ki nou ankor dan en *budget deficit* e nou ankor pe pret larzan. So si ou napa larzan ou pa kapab *save*! *Basically* nou pe koup prozekte sa ki nou ti prozekte pou nou depanse. Be i pa en *savings*. Zis en pti pwen ki mon ti a kontan fer.

MR SPEAKER

Wi, wi. Be selman pa bliye poudir nou pou annan staz deba apre pou sa kalite largiman.

HON WALLACE COSGROW

Wi, mon ti zis anvi fer sa pti pwen zis pour sitye nou dan deba Mr Speaker.

MR SPEAKER

Carry on Onorab Cosgrow.

HON WALLACE COSGROW

Ok. Mr Speaker mon pe get (a) Ministries of Department of Tourism R8milyon 366mil, 29 'restructuring transfer of wages budget from STB to Tourism Department.'

Eski Minis i kapab eksplik nou en pti pe sa akoz i annan pli ba ankor mon konnen i annan larzan ki'n ganny transfer to *Department of Tourism* akoz sa i separe? Mersi bokou Mr Speaker.

MR SPEAKER

Mersi. SS Payet.

SS PATRICK PAYET

Mersi Mr Chair. Mersi Manm Onorab. Mr Chair parey zot konnen letan nou ti fer apropriyasyon pou Bidze 2021, Bidze *STB* ti ganny mete parey zot vwar lo paz 3 anba *'Public Bodies providing essential*

Government services' -
8.3milyon.

Me sepandan akoz vi ki dan restriktirasyon *STB* in ganny, in korpore dan Minister, sanmenm sa nou pe transfer sa larzan. Nou pou vwar ki i annan en *budget cut* dan *STB*. E nou pe demann larzan adisyonnèl anba Departman Touris. So i zis en transfer.

Me selman akoz letan nou ti diskite Bidze dan Bidze 2021, nou ti *by head by head*, Minister Touris son Bidze ti ganny *appropriate* e *STB* son Bidze ti ganny *appropriate* separeman.

So sanmenm sa ozordi ki nou pe vin devan Lasanble pou demann sa adisyonnèl pou Departman Touris. Me selman akoz ankor tou son bann *staff* dan sa Minister.

I menm parey kekwfa en lot kestyon ki kapab vini lo Departman *Entrepreneurship* avek Lendistri ki nou pou vwar Bidze *NISTI* lo paz 2 zis avan sa *sub total 'Ministries and Department'* nou pou vwar 1.1milyon.

Me selman an menm tan lo kote Bidze *NISTI* zot pou vwar sa i en *budget cut*. So i zis en transfer ki nou pe demande akoz bann lot sityasyon. Mersi Mr Chair.

MR SPEAKER

Mersi SS. Wi Onorab Labonte.

HON ANDY LABONTE

Mersi Mr Speaker. Bonzour Mr Speaker. Bonzour SS avek ou lekip.

Mon kestyon i baze lo Bidze, i annan en sonm 256mil pour *'recruitment of manager of Waste Management Trust Fund'*. Si petet ou ti kapab donn en pti leksplikasyon lo la, akoz ler mon fer en pri kalkilasyon senp i tonm en valer apeare R21mil par mwan.

Petet sa i pour kwa egzaktaman?

MR SPEAKER

Mersi Onorab. SS Payet. Manm *panel* pou reponn.

COMPTROLLER GENERAL IRENE CROISEE

Mersi Mr Chair. Mersi Onorab pou ou kestyon. Pou sa *manager* pou *Waste Trust Fund* i ti en separe avek Bidze. Be la nou'n deside pou nou anmenn li lo Bidze, so nou pe met saler sa *manager* dan Bidze.

MR SPEAKER

Mersi. Onorab Sophola ou ti'n lev lanmen lo sa seksyon ou? Wi? Non? *Ok*. Onorab Cosgrow.

HON WALLACE COSGROW

Mersi Mr Speaker. Zis en pti klarifikasyon lo kestyon Onorab Labonte.

Sa *Waste Trust Fund* li menm li i annan larzan ki ganny kolekte atraver bann *levies*. Be eski sa *Trust Fund* li menm, sa larzan ki anmase i pa ase pou tir saler en *manager* ladan? Konmsi ki nou pa bezwen *additional funds* pou pey sa *Waste Trust Fund manager*? Si ou pe konpran mwan ki mannyer mon pe vini? Mersi.

MR SPEAKER

Wi, mersi. Lekel ki pou pran kestyon? Madanm Croisee wi.

**COMPTROLLER GENERAL
IRENE CROISEE**

Mersi Mr Chair. Onorab wi sa reveni ki ti pe anmase anba sa *Waste Trust Fund* nou pe anmenn li anba *Consolidated Fund* e sa depans pe ganny bidzete anba Bidze *properly*.

MR SPEAKER

Tre byen. Napa lot kestyon lo *Ministries and Departments*? Nou a bouz lo lot seksyon swivan e sa se *regulatory bodies* lo paz 2 ziska *top of page 3*. Tre byen, nou a kontinyen, e si neserer nou a retournen apre silvouple.

Lot seksyon i '*Public Bodies providing essential Government services*' ki komans lo paz 3 e i fini lo paz 3. Byen mon a kontinyen.

OTHER WAGES AND SALARIES**MR SPEAKER**

'*Other wages and Salaries*' ki lo paz 4. Wi Onorab Cosgrow.

HON WALLACE COSGROW

Mersi Mr Speaker. Mr Speaker mon pe get '*gratuities* apre *compensation*' i annan en *additional* 15, preski 16milyon *gratuities* ki'n ganny azoute apre i annan apepre 12milyon pour *compensation*.

Petet si SS pou kapab dir nou mon pa konnen si i annan sa lenformasyon pou *compensation* sirtou bann *staff over 60* ki'n ganny fer arete, kantite ki annan? E eski zot pe *plan* ankor pandan sa lannen pou fer bann dimoun ankor ki par lao 60an -

Si i annan plan Gouvernman Minister Finans pou fer bann dimoun par lao 60an arete? E lo bann *gratuities and gratuity payment* eski sa i pour bann peyman bann dimoun par egzanp ki pe *exit* Gouvernman la atraver bann diferan *Redundancy*

Schemes avek bann diferan restriktirasyon i pe ganny fer dan Gouvernman? Mersi.

MR SPEAKER

Mersi Onorab Cosgrow. SS.

SS PATRICK PAYET

Mersi Mr Chair. Mersi Onorab. Mr Chair pou komanse kekfwa lo kote sa gratwite mon konnen 2020 baze lo kalkilasyon ki nou'n fer ti annan bann *end of contract payment* avek gratwite ki ti *due* 2020. Me selman ki'n ganny peye dan Bidze 2021.

So i annan en sonm lo kote sanmenm sa ki sa larzan Bidze adisyonnèl. Apre i annan - sa i apepre R8milyon, sanmenm sa ki nou'n demann en pe sa Bidze adisyonnèl ki total 15.

Lo kote sa *deficit* lo konpansasyon, sa i mazorite bann *staff* ki lo kontra *over 60*, akòz sa nouvo sirkiler ki ti sorti e nou pa ti'n prenon kont letan nou ti'n prepar Bidze.

E lo la i annan an tou *from Zanvye to date*, ki'n *exit* apepre 313. Me selman Gouvernman li i napa en *Scheme*, me selman sepandan ou pou vwar ki menm par egzanp dan Minister Finans i annan lapros, akòz lanons ki Gouvernman in fer lo kote *65years old*. I annan dimoun pe deside zot *retire* pou zot pa perdi

letan Gouvernman i fer son *assessment*.

So mon konnen lanons ki nou ti'n fer li depi 2017 *The State of The Nation Address*. Be selman prenon kont vi ki la, nou'n refer lanons i annan dimoun ki'n komans aproz. E zot, zot in deside letan zot Kontra pe fini, si zot in *reach the age of 60* pa renouvle, akòz zot krwar i zot pa pou kapab esper ziska 60an.

So i en pe bann desizyon ki i annan dimoun ki'n pran. E sanmenm sa i ou'n vwar i annan en total apre 313. Mersi.

MR SPEAKER

Mersi SS. Onorab Henrie.

HON GERVAIS HENRIE

Mesi Mr Chair. Bonzour tou dimoun. Mon premye kestyon. SS in dir nou poudir ti annan bann peyman ki ti *due* 2020, me selman ki ganny peye 2021.

So mon premye kestyon i se ki mon anvi konpran ki prosedir *the public service* i pase, pou asire ki lannen ki *due* i ganny peye sa lannen. Nou pa anvoy li sa, akòz pou nou pa ganny sa bann repetisyon? Sa i mon premye kestyon.

Dezyenmman eski swivan sanzman dan ladministrasyon in annan bann *sudden resignation* ki'n enpakte lo sa

Bidze, e fors en peyman ki otreman pa ti'n prevwar, e dan sa konteks ki kalite lenpak in annan? Mersi.

MR SPEAKER

Mersi Onorab. SS Payet.

SS PATRICK PAYET

Mersi Mr Chair. Mersi Onorab. I annan diferan bann sirkonstans ki kekfwa en *end of contract payment* pa ganny peye dan son lannen. Par egzanp i kapab arive ki en Zofisyé Gouvernman i pa'n soumet son *plans and target*.

Dan sa sirkonstans *Department of Public Administration* avek PSC, i pou pey li zis 5poursan. I *due up to 15percent* baze lo son *assessment, performance* evalyasyon ki ganny fer i pou *dir up to 15percent*.

Me selman si i pa ankor soumet son *plans and target* i pou ganny peye zis 5poursan. So i kapab arive dan sa 5poursan in ganny peye 2020. Me selman sa Zofisyé Gouvernman in soumet son *plans and target after* dan lannen 2021.

E la lanmenm la ki Departman *Public Administration* i re kalkil son *end of contract payment*, ki i sipoze *due* e i ganny peye sa

balans. So i kapab arive sirkonstans.

Lot sirkonstans se par egzanp nou vwar ki mete si letan zot pe soumet e Trezor pe fermen *by the end of the year*. Sanmenm sa ki zot pey li letan Bidze i ouver dan Bidze 2021. So i arive enn de bann sirkonstans.

Lo kote dezyenm kestyon wi definitivman bann *resignation* ki'n arive sa lannen, sirtou par egzanp letan ou regard dan sirkonstans bann dimoun ki'n ganny 60an. Kekfwa ou pa ti pe *forecast*, ou ti pe fer *forecast* kekfwa letan zot kontra i terminen dan 2an, dan 3an.

Me selman si zot decide zot pa *as per the PSC* kontra pou donn sa 2 mwan notice lanmenm la ki ou vwar ki i annan en adisyonnèl ki nou bezwen mete dan Bidze.

Me en keksoz ki nou pe travay lo se *through accrual accounting*, ki pou fer sir ki parey dan sekter prive Gouvernman i kapab met en provizyon lo kote *accrual* pou nou konnen ki kantite konpansasyon i sipoze *due*.

Si i arive par egzanp mazorite *public servants* i decide kite, konbyen sa konpansasyon? *At the end of the day* i en *liability* lo

Gouvernman. Me selman *this is something* ki nou pe travay pou nou *quantify*.

E avek (IFMIS) nouvo sistenm Gouvernman ki nou pe, met an plas nou pou fer sir ki sa bann *contingent liabilities* i ganny mete *properly* dan Bidze ;- ki piblik e menm Lasanble i ava konpran si i arive en sirkonstans ki kekfwa ou annan *so many public servants* i kite, konbyen adisyonnèl i pou koute. Mersi Mr Chair.

MR SPEAKER

Mersi SS. Wi Onorab Henrie oule *clarity*?

HON GERVAIS HENRIE

Zis en pti remark ki mon oule port latansyon Lasanble lo la Mr Speaker ki SS in dir nou. Ki nou'n vwar i en pratik ki'n arive dan lefase, e nou koman Lasanble nou bezwen demande ki sa i arete, kot kontra bann dimoun dan *public service* i fini e zot kontinyen la.

La letan nou pe koze i annan sa bann sityasyon. Dan Bidze par egzantp Onorab Arissol ti annan en lalis ki tanzantan letan bann *panel* ti vini, dimoun ki ti vin la devan nou zot pa ti lo kontra akoz ti'n ekspire. So nou bezwen anvoy en mesaz avek public *DPA* poudir *this cannot continue* !

E en dimoun prezan ki i fer zis i taye i donn nenport ki target, i pa al ant sa bann pilye ki Minister Finans pe egzize, zis pou li kapab ganny son konpansasyon byen.

But dezormen *this cannot continue as a way forward* dan sa kalite prodiktivite ki nou oule dan *public service*. Se sa ki mon i oule met lo rikord Mr Speaker. Mersi.

MR SPEAKER

Mersi. SS Payet oule komant lo la, oubyen nou a kapab kontinyen? Yes SS.

SS PATRICK PAYET

Wi Mr Chair. Zis pou azoute ki dan lankadremman *results-based management* ki nou pe met an plas, definitivman sa bann pratik pou arete.

E ki en endividi en travayer Gouvernman lo son *performance management framework* ki nou pe met an plas, i bezwen anliny avek stratezi *national development strategy* Gouvernman e osi stratezi son sektor e son Minister.

So sa en travay ki nou pe fer e *by 2023* nou anvizaze ki sa, *the whole framework* pou an plas. Mersi Mr Chair.

MR SPEAKER

Mersi. Onorab Lemiel.

HON SYLVANNE LEMIEL

Mersi Mr Speaker. Bonzour tou dimoun. Mon kestyon osi i lo sa kote gratwite avek konpansasyon ki nou annan pou nou pey bann travayer Gouvernman.

Mon ti a kontan SS petet konbyen dimoun, konbyen travayer li menm ki sipoze ganny peye anba sa Bidze R8milyon? Konbyen travayer ou pe anvizaze peye?

E apre ki bann Minister petet ki bann travayer plizoumwèn pa ankor ganny peye zot konpansasyon?

MR SPEAKER

Mersi Onorab. SS.

SS PATRICK PAYET

Mr Chair kekfwa. Mersi Onorab kekfwa mon ava eksplike ki i annan 2 provizyon ki nou fer, se bann anba sa gratwite ki li i en *general line* ki nou fer anba *'other goods and services.'* Sa nou pey plizoumwèn bann dimoun ki lo kontra, bann dimoun ki lo kontra *specific*.

Me selman anba bann lezot Minister zot osi zot annan en provizyon ki pey bann - sirtou par egzanp bann 5an, 10an, 15an, sa osi tou in ganny mete.

Me selman lo kote sa sonm ki nou'n mete ozordi pour nou kapab fini lannen, nou nou'n fer *forecast* ki nou *estimate*. *Anyway* sa i en lenformasyon adisyonnèl ki n ou kapab rode avek *DPA*, ki kantite kekfwa *file* ki lo zot latab.

Me selman sa sonm adisyonnèl ki nou'n mete se, bann sonm ki pa ti'n ganny peye mazorite dan 2020 ki'n ganny peye dan 2021, ki letan nou'n vwar aprezan dapre nou *forecast* pou Bidze 2021, akoz sa depans 2020 in ganny peye sa lannen, nou pou *short* pou nou kapab pey pou bann lezot ki arive letan zot *end of contract* i *due*.

Me selman nou kapab rod sa lenformasyon adisyonnèl pou nou regarde ki kantite kekfwa sa bann dimoun ki lo Kontra ki pa ankor ganny peye. Selman nou pa sipoze vwar li en kantite. Me selman zis akoz lafen 2020 ki ti'n *carried forward* dan Bidze 2021 ki'n fer li vin sa *shortfall*. Mersi.

MR SPEAKER

Mersi. Onorab Gill.

HON CHURCHILL GILL

Mersi Mr Chair. Bonzour SS avek delegasyon. Bonzour tou Manm. SS mon kestyon i lo

gratwite, mon santi ki i annan fason ki sa bann keksoz i kapab ganny peye dan menm lannen ki zot *due*.

Me selman fason fer ki i devret ganny organize. Par egzanp sa bann dimoun ki annan sa bann *deadline* ki zot, sa bann dimoun ki annan zot *targets to submit*. Mon krwar si i annan en *deadline* ki ganny set ki pou sonn Minister ase letan pou fer sa antre dan Bidze, i pou adres sa bout *overlap* lo en lot lannen.

Apré mon kontan mon'n tann ou, nou'n nonm sa bout *accrual* akoz mon dezyenm kekyon ti lo la. Tou sa bann dimoun ki dan Gouvernman *DPA* i annan tou zot rikord. Savedir *DPA* i pou konnen li kan ki group travayer i *due* pou konpansasyon.

E si nou annan sa lenformasyon i zis en *matter* ki sak fwa Bidze i ganny fer, sa bann lenformasyon pou sa bann lannen respektif, i ganny donner, i ganny *value* pou sa la kantite dimoun. E sa i ganny antre.

E nou pou napa, pou napa rezon ki nou pou annan sa bann peyman ki pou *overlap* lo en lot lannen. Mersi.

MR SPEAKER

Mersi Onorab Gill. SS ou ti a kontan adres okenn pwen ladan? Wi SS.

SS PATRICK PAYET

Wi Mr Chair, mersi. E mersi Onorab. Definitivman Onorab en keksoz ki nou pe travay lo la mon konnen apard ki (*IFMIS*) nou pe travay lo sa (*HRIS*) *system*.

E avek lankadremman *RDM* definitivman i en keksoz ki nou pou bezwen fer sir ki *at the end of the day Department Public Administration* i donn *notice*, i donn nou 3 mwan, i ekrir ou. So ou, ou bezwen asize ek ou Minister, ou *Boss* e pou fer sir ou kapab soumet *your plans and target* e en revi lo dernyen *plans and target* ki ou'n soumet.

Be selman en keksoz ki baze lo sa lagreman, lankadremman ki nou pe met devan. Nou pa anvizaze pou vwar sa bann sityasyon koumsa ariv ankor. Mersi.

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. Bonzour SS ek ou delegasyon. SS dan menm laliny en pe parey Onorab Gill. Etandonnen ki Gouvernman, administrasyon i

pe antretan bann diferan restriktirasyon dan bann diferan Departman. E kot i konsern size konpansasyon ouswa gratwite li menm li, ki mon konnen nou pou bezwen war ankor.

E parey yer Minis in la in fer resorti ki pou annan 15 dimoun ankor ki pou ganny fer *redundant*. Eski zot in annan en diskisyon pou vwar (i ti dir Onorab Henrie, Minis ti dir kot NSC 15 dimoun ankor pou perdi lanplwa. Si ou pa ti tande pa mwan lafot.)

SS, eski zot in annan en plan fiskal petet lonterm pou vwar ki kantite ki pou bezwen al peye dan sa levantay restriktirasyon, ki pou vini a lavenir? Mon mazine zot in asize ansanm lo *Cabinet* pou distrer serten sa bann diskisyon. Eski zot pe *plan* tousala ansanm?

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Parey mon krwar Onorab i okouran ki dan Bidze nou fer en provizyon, en provizyon e mon krwar parey Onorab Georges in mansyonnen *this morning*, ki nou fer *forecast* lo kote reveni avek depans.

Me i kapab arive bann evantyalite ouswa sirkonstans ki, i kapab arive ki nou'n demann adisyonnal ankor, baze lo bann diferan *headlines*. Baze lo sirkonstans. Me selman letan nou fer en prozeksyon par egzanp ki nou'n fer. I baze lo diferan travay ki nou'n fer avek bann diferan Minister.

Par egzanp mon konnen i annan sa nouvo Lazans ki nou pe diskite pour *Infrastructure Agency*. So sa osi nou pe regarde baze zis si i pran transfer *staff*, nou pa pe *anticipate* ki i pou annan konpansasyon ki pou ganny peye.

So definitivman i ban diskisyon ki nou gannyen avek bann Minister baze lo diferan sirkonstans e menm avek Biro *Attorney Zeneral* e menm ek Departman *Public Administration*. Mersi.

MR SPEAKER

Mersi. Onorab Hoareau e Onorab Loizeau ou a swiv so ou a vey moman apropiye pou ou al lo mikro. Onorab Hoareau.

HON JOHN HOAREAU

Mersi Mr Speaker. Bonzour Mr Speaker, bonzour SS ek ou delegasyon.

SS mon ti a kontan ou eksplik nou'n en pti pe ki sa

new Policy of over 60, '60's staff on contract being paid the compensation upon retirement,' ki annan ki'n lead to sa apeare 12milyon pou compensation for continuous service? Mersi.

MR SPEAKER

Mersi. SS.

SS PATRICK PAYET

Mersi Mr Chair. Lannen pase ti annan en sirkiler ki *DPA* ti fer resorti ki ti komans *in force* an Avril 2020. Par egzanp avan sa nouvo *Policy* avan sa sirkiler, bann dimoun k ti lo kontra zot ti ganny peye zot *end of contract payment*.

Me selman zot pa ti *entitled* pou ganny peye okenn konpansasyon. Anba Lalwa Lanplwa i annan en egzanpsyon pour sa - pour bann dimoun ki lo kontra.

Me sepandan pou ankouraz dimoun pou reste dan *public service*, desizyon se bann dimoun i *entitled* pou ganny peye zot konpansasyon si zot sorti dan *public service*, letan zot *reach retirement*. Ouswa dezyenm sironstans si zot *post* i ganny mete *redundant*.

So i annan 2 sironstans ki, 2 sironstans ki en dimoun i kapab ganny peye konpansasyon, letan i *end of*

contract. So si son *post* in ganny mete *redundant*.

Par egzanp si ozordi i annan en *post*. Me selman si demen sa *post* - me sa dimoun i lo kontra, i pou ganny peye tou son konpansasyon depi ler in al lo *PSC*. I menm parey avek en dimoun ki ariv 60an ki lo *PSC* ozordi i pou ganny peye son bann konpansasyon.

Be i en diskisyon ki mou pe gannyen, mon krwar i en *challenge* ki nou'n ganny demann avek bann lezot Minister, sirtou aköz i pa *apply* pour tou. Par egzanp letan ou regard Lapolis avek Defans zot, zot striktir i en pe diferan.

Zot *still* ganny peye bann *end of contract*, me sepandan zot *still* kalifye pou zot ganny peye zot konpansasyon at diferan *interval of time*. So sa i en diskisyon ki nou pe gannyen pou nou vwar kefwaw nou revwar en pe sa Polisi dan son totalite. Mersi Mr Chair.

MR SPEAKER

Mersi. SS. Onorab Loizeau e Onorab William ou a swiv. So ou kapab vey moman apropiye.

HON NORBERT LOIZEAU

Mersi Mr Speaker. Bonzour SS ek ou delegasyon, Mr Speaker mon anvi demann SS vi ki Onorab Henrie ti'n demann en

kestyon konsernan bann, vi ki apre sanzman Gouvernman, i annan bokou bann demisyon, bann *resignation* parmi bann zofisyé en pti pe o, ou pa'n dir nou, nou ti a kontan ou dir nou (akoz ou pa'n dir Onorab Henrie) ki sa bann pozisyon.

E osi SS eski ou kapab dir nou ki pli o peyman ki pou ganny fer dan sa ka? Vi ki mon war gratwite i 15milyon, ki pli o peyman ki enn sa bann endividi pou gannyen? Mersi.

MR SPEAKER

Mersi Onorab Loizeau. SS.

SS PATRICK PAYET

Mersi Mr Chair. Mr Chair kekfwa mon ava re demann li pour zis repet premye kestyon silvouple.

HON NORBERT LOIZEAU

Onorab Henrie dan son premye kestyon i ti dir ki avek sanzman Gouvernman ti annan serten o Zofisyé ki ti *resign*. Mon ti a kontan konnen ki sa bann *post*, ki ti zot *post*? E mon dezyenm kestyon mon krwar i kler non, ki pli o lapey ki peyman dan sa gratwite ki enn sa bann endividi pou gannyen?

MR SPEAKER

Mersi Onorab. SS.

SS PATRICK PAYET

Mersi Mr Chair. Mr Chair i annan bann diferan *level*. Par egzanp nou konnen i annan detrwa SS, i annan menm parey bann Anbasader. So kekfwa mon napa *the full list*, me selman i annan dan sa bann striktir koumsa ki'n, ki ti i annan *resignation* ki nou'n bezwen pey gratwite konpansasyon.

Lo kote gratwite ki i annan sa bout *end of contract payment* i tou depan saler sa endividi e i kapab arive depan 300, 300mil i kapab arive letan son kontra in fini. I annan bann kontra ki i lo 2an, i annan kontra ki lo 3an.

Lo kote konpansasyon sa osi i tou depan, ki kantite letan sa dimoun in fer dan *public service*. I kapab arive sa dimoun i ganny *up to* R700, 800mil akoz sa kantite letan ki in travay dan *public service*.

I kapab ariv en dimoun letan in *reach* 60, 61 in travay 40an dan *public service* e son saler kekfwa *at that level* i pou ganny peye sa bann konpansasyon koumsa. Mersi Mr Chair.

MR SPEAKER

Mersi. Onorab William.

HON WAVEN WILLIAM

Mersi Mr Speaker. Bonzour tou dimoun ki a lekout. SS premyerman mon ti a kontan demann ou permisyon Mr Speaker, akoz mon anvi retoun lo sa *MDAs* akoz mon vwar poudir i annan apepre en 30 ekek antite Gouvernman ki ou vwar i reflekte '*delays in recruitment.*'

E mon pe lev sa pwen akoz nou'n vwar dan plizyer Bidze kot bann Departman Gouvernman zot mete poudir zot bann *challenges* se akoz zot napa ase travayer.

So letan mon pe regarde anba *public bodies* ek *MDAs* i annan en bon pe antite ki ou vwar poudir i annan *delay with recruitment.*

E sa mon santi poudir i kapab kre lenpak dan donn servis. So mon anvi demann SS Payet egzakteman eksplik nou, mon panse osi piblik Seselwa ti ava kontan konnen e konpran kwa egzakteman ki kre sa bann *delays?*

Akoz ki arive se ki nou koman Manm Parlman ki vot Bidze, nou vwar parmi bann *challenges* zot pe dir poudir, zot napa ase dimoun kalifye pou fer travay. So egzakteman dan sa planifikasyon la ki zot pe fer, eski zot in dekouver kwa egzakteman ki kre sa bann *delays?*

Akoz ler ou regarde i annan plis ki 30ekek, e ler ou pe kont bann *public bodies* ankor i, son sif i vremen o. Eski bann pozisyon vremen kalifye ki nou napa isi Sesel akoz toulezan nou vwar poudir Gouvernman pe *train* nou bann zenn, zot pe *graduate*. Mwan mon ti a kontan ki nou ti a kapab ganny en leksplikasyon lo la. Mersi Mr speaker.

MR SPEAKER

Mersi Onorab. Wi SS.

SS PATRICK PAYET

Mersi Mr Chair. Mr Chair mersi Onorab. Kekfwa mazorite sa bann sironstans ki ou vwar ki annan sa *budget cut* apre *delay in recruitment*, se bann sironstans ki nou vwar *because of* sa *post* kekfwa son *level of* kalifikasyon ki demande.

E menm kekfwa dan *labour market* ki nou napa. Par egzanp mon konnen annou regard dan Minister Ledikasyon, mon konnen i annan en mankman dan *teachers*. Me selman letan ou regarde ti annan bokou pos ki ti ankor *vacant* letan nou ti pe fer *mid-year review*.

So kekfwa menm si zot pa pe *advertise* lokalman zot pa pe ganny dimoun ki pe aproz pou

vin dan sa lankadreman teachers. Ou ganny zis parey nou Departman Finans *for the past 2 months also* nou pe fer avertisman pou pe rod ekonomis.

E nou'n fer 2 fwa *advert* nou pa pe gannyen. I baze en pe kekfwa sanmenm sa ki nou pe travay konzwentman avek ANHRD avek Departman Lanplwa ek Minister Ledikasyon, pou nou vwar, fer sir ki nou kapab *close* en pe sa *skills mix match* ki egziste.

Vre kekfwa i annan bann nouvo *graduate* pe sorti me selman pa dan sa *field* ki annan en kantite demann. Me selman i partou dan bann Minister. Sa en problem ki zot pe rankontre menm si zot fer *recruitment*. Akoz *at the end of the day as* Gouvernman ou pa kapab zis akoz ou'n *advertise* pran nenport endividi menm si zot pa pe *meet* sa bann kriter.

Mon konnen i annan prosedir pou nou fer *on the job training*, me selman i en keksoz ki nou pe diskite osi avek Guy Morel *Institute*, pou zot kekfwa ki lankadreman ki nou kapab fer en striktir pou nou kapab ankouraz en pe plis bann *training* kekfwa ki nou napa lo market. So i en pe bann diferan rezon.

Me selman prensipalman akoz letan ou *advertise* ou pa pe gannyen sa bann pozisyon. Mersi.

MR SPEAKER

Mersi SS. Wi Onorab klarifikasyon?

HON WAVEN WILLIAM

Mersi SS. Mon anvi demann ou eski *then* pou Bidze 2022 sa menm kantite demann pou ganny reflekte? E mon konpran ki ou dir mon poudir zot pe travay an kordinasyon avek bann lezot Lazans parey ANHRD.

Me eski nou satisfè poudir ase zefor pe ganny mete? Akoz ki arive se ki nou pe anvi koup lo fer vini travayer etranze, me an menm tan i annan louvraz. Me selman vreman nou pa pe vwar sa lanfaz pe ganny mete, pou vreman kapab met ouswa donn Seselwa *training*, pou kapab antre dan sa bann pozisyon. Mersi.

MR SPEAKER

Mersi Onorab. Wi SS.

SS PATRICK PAYET

Mersi Mr Chair. Mr Chair mersi Onorab. Pou Bidze 2022 ki nou pe vwar se ki nou pe met lanfaz lo, akoz ki nou'n fer dan *mid-*

year review nou pa'n pran sa bann pozisyon.

Nou'n pran sa larzan ki zot in *save* premye 6mwan, zot pa'n kapab depanse, me selman sa dezyenm 6mwan nou'n kit sa larzan dan zot Bidze ki zot *still* kapab fer sa *recruitment*.

Me nou pa pe rebran li dan Bidze 2020. Dan Bidze 2022 ki nou'n fer se nou pa pe donn, kekfwa bann nouvo pozisyon pou 2022. Nou pe fer zot konsantre sa bann pozisyon ki nou ti'n donn zot 2021 e met en pe plis lanfaz ki lankadremman i zot kapab *recruit* e ganny travayer.

Definitivman nou pe travay konzwentman avek bann Minister Ledikasyon ek *ANHRD* pou nou kapab vwar ki kalite lezot lankadremman ki nou kapab met an plas, pou fer sir ki i annan *synergy between* ki bann - letan bann etidyan pe sorti lekol e ki demann ki Gouvernman i annan *actually*.

So i en travay ki nou pe fer avek Departman *Economic Planning* ki pe kont, *manage* sa travay pou nou *overall*. Mersi Mr Chair.

MR SPEAKER

Mersi SS. Onorab Pillay.

HON SEBASTIEN PILLAY

Mersi Mr Speaker. Bonzour SS ek ou delegasyon e bonzour tou koleg Onorab.

Mr Speaker annefe sa kestyon ki'n fek ganny demande i pou swiv en kestyon i *part of* en kestyon ki mon pe al demande osi akoz zis ler nou get sa bann *compensation for continuous service*, nou'n met li an perspektiv avek sa bann zafer *delays in recruitment* ki nou sey konpran serten keksoz.

So petet avek ou permisyon mon pou bezwen demann SS, sey eksplik nou ler par egzanp i annan bann plan *restructuring* ki sipoze pe ganny fer, par egzanp yer nou ti ganny okouran ki *NSC* ti pe ganny fer *restructuring* ki annan dimoun ki pe ganny *re deployed*, *post* ki pe ganny *phase out*.

Me selman *NSC* li menm i annan sepa, i annan apepre R1.2milyon '*delays in recruitment e restructuring*.' Konmsi sey eksplik nou ki manner bann antite pe zistifye sa ek Minister Finans?

Dimoun pe ganny met deor, me ou pa pe, ou annan larzan pou pey sa bann dimoun. Si ti en konsiderasyon finansyel pou, ki sa bann dimoun bezwen kit zot lanplwa mon ti a konpran.

Me *the issue* ki nou pe demann ou se *what is the*

explanation ki ganny donnen avek Minister Finans, ki sipoze planifye tousala kot en antite i deside pou met serten travayer deor. Me *still* selman ou vini ou war la dan Bidze ki i annan bann '*delays in recruitment*' en pti pe dan laliny kestyon ki Onorab in demande oparavan. *What*, ki kalite zistifikasyon ki zot *provide* avek Minister Finans?

E mon dezyenm pwen se eski ou kapab don nou en re asirans, ki ler nou pe get sa bann *cost cutting* ki pe ganny fer anba '*delays in recruitment*', e nou pe tande lo lot kote ki i annan dimoun i pe bezwen kot zot lanplwa.

Eski i annan en travay ki Minister Finans pe fer avek Departman Lanplwa, pour ki i annan en e lapros pli organize e ki bann Departman pa pe fer sakenn pou li? Les mwan klarifye sa Mr Speaker avek en pti prezizyon.

Mon'n vwar ki par egzanp *Local Government* pe recruit nouvo dimoun, *but at the same time* SNYC li i bezwen *get rid of some* dimoun, me apre nou war poudir SNYC li i osi pe fer *savings* anba '*delays in recruitment and restructuring.*' Konmsi sey eksplik nou ki lapros ki pe ganny pran?

Eski i en sak Minister pe pran en lapros apre ou *end-up* avek konpansasyon, parey Onorab Loizeau ti pe demande? Or i annan en lapros zeneral ki pe ganny etablir e ki Minister Finans ki i pe *lead* sa lapros? Mersi Mr Speaker.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Definitivman i annan en lapros organize. Par egzanp pandan sa 20 zour Lendi nou ti'n fek termin legzersis *and test* lo Bidze 2022 avek *Cabinet*. Pandan 20 zour nou'n asize avek *Cabinet* pour nou diskrit Bidze 2022.

E sa en lapros ki nou'n pran se, nou'n vwar ki i annan Minister per egzanp letan zot pe demann nouvo *post* pou 2022 par egzanp, se i annan Minister ki kekfwa zot ti annan kekfwa bann resours adisyonnal ki kapab ganny transfer *from* en lot Minister.

So sa lot diskisyon in arive ki dan plas donn zot nouvo larzan, me selman transfer sa bann dimoun kekfwa ki pa pe ganny *maximization of* zot use dan en lot Minister. So sa i en pe bann diskisyon ki nou pe gannyen avek bann Minister,

sirtou letan nou pe planifye Bidze, spesyalman la avek Bidze 2022.

E en konteni ki ou bezwen konpran Onorab se lo kote striktir Gouvernman. Nou bezwen mazine ki pa akoz striktir i koumsa, me selman avek nouvo striktir nou bezwen regarde si sa dimoun i dan sa pozisyon, sirtou avek sa lankadremman *results-based management* ki nou pe met an plas ;- si i pe ganny *fully occupied* baze lo sa nouvo striktir ki nou pe met an plas ?

So si nou vwar kekfwa ki premyerman si sa antite in vwar ki li i bezwen zis 12 *staff*, me kekfwa i annan 16 *staff*, sa 4 *staff* ki i pa pou bezwen nou bezwen vwar li eski i pou, son *skills* ki i annan i pou kapab ganny servi dan en lot Minister?

So sa i en pe bann travay ki ganny fer avan kekfwa *redundancy* i arive dan sa bann *particular agency*. So i en travay kontinyel ki nou gannyen nou as Minister Finans, diskite avan kekfwa ki nou fer en provizyon pou konpansasyon ouswa gratwite.

So i annan bann diskisyon ki ganny fer lo kote. Akoz nou, nou dan restriktirasyon nou donn larzan dapre son bann *post title* dapre son restriktirasyon. Mersi.

MR SPEAKER

Wi Onorab Pillay.

HON SEBASTIEN PILLAY

Mersi Mr Speaker. Mr Speaker mon konpran tre byen ki SS pe dir mwan.

Me selman konsern ki mon annan, zis parey Onorab William in souleve se ki ou annan ou 59milyon apepre ki pe ganny koupe. E ki dan sa 59milyon plizyer dimoun pe swa tonm dan sa *restructuring*, swa pe ganny met *redundant* swa ou annan *graduates* ki pa pe ganny pran dan serten Departman e ou war *recruitment* dan serten Departman.

So sa ki bezwen arive se sa ki Lasanble pe demande se, eski Minister Finans pou pare pou *provide* nou *across* bann diferan *MDAs* si zot annan lalis la kantite *restructuring*, la kantite dimoun ki pe ganny afekte par *restructuring*?

Akoz ler ou tir en dimoun dan en pozisyon ou anvoy li dan en lot, si i pa pe kontiny lo son servis, ou bezwen pey li son dues *and then* refer li antre dan sa pozisyon. E sa i al dan laliny sa kestyon ki ti ganny *raise* par Onorab Loizeau se ou pou bezwen annan plis larzan pou pey sa bann *past compensation*.

So eski zot mentenir en lalis Minister Finans lo sa bann diferan *restructuring across* bann MDAs lo nivo bann *desk officers* ki dil ek sa bann MDAs? Oubyen MDAs i zis donn zot en *general outlook* lo kwa ki pe pase dan sa Departman? 59milyon en ta larzan en ta dimoun ti kapab reste dan lanplwa. Mersi.

MR SPEAKER

Mersi. SS.

SS PATRICK PAYET

Mr Chair. Kekfwa en konteni kekfwa mon kapab dir Lasanble se a lafen Zen 2021 nou ti annan nou 10,511 travayer dan Gouvernman, 10,511 *as at June*.

E i annan bann diferan *post* ki bann Minister i annan. E letan ou regard nivo bidzeter 2021 total '*wages and salaries*' i 2.92bilyon e sa ki ekivalan 12.5 pou son *GDP*.

E en keksoz ki mon konnen ki parey nou'n dir ki nou pa pe vwar nou avek kapab donn ogmantasyon saler lannen prosenn, aköz ki mannyer nou krwasans i ete letan ou get son poursantaz avek *wages to GDP ratio*.

Letan ou regard li normal dan bann pei letan ou regard konpare avek Sesel, i sipoze

baze lo apepre 8poursan *GDP* saler.

Me selman letan ou regard lo kote pour nou Sesel, nou vwar i *still* ankor en target vremen o. 12.5 poursan *GDP*. So en keksoz ki nou pe diskite se ki mannyer baze - mon konnen bokou *Scheme of Service* in ganny demande pour Bidze 2022, nou pa pe kapab donner.

So nou bezwen fer sir ki tou dimoun dan *public service* i pe ganny *maximize*. I pe ganny servi *maximize*. Me sependan si i arive sironstans si nou vwar ki i annan baze lo nouvo fason fer, kote nou transfer sa bann dimoun?

E si i ariv bann *areas* ki nou pa kapab transfer zot dan Gouvernman, nou kapab donn zot lo bann nouvo loportinite dan *private sector*. So i en travay kontinyel ki Gouvernman i kontinyen fer.

E par egzantp, en legzanp ki nou'n donner ki nou'n servi lo kote Minister Finans avek *IFMIS*. Nouvo sistenm *IFMIS* ki nou pe met an plas *digitalization* i pou kapab arive ki ou pa bezwen sa kantite travayer *accounts*.

Me ki ou fer avek zot, ou *retrain* zot, *retrain* zot dan bann *areas* par egzantp *compliance*, oditer, so i bann nouvo *avenue*

ki *still* ou pou bezwen travayer. So sa i en pe bann *thinking* ki nou, nou pe fer dan Minister Finans letan nou pe travay avek bann *MDAs* dan restriktirasyon. Mersi.

GOODS AND SERVICES

MR SPEAKER

Mersi SS. Bon apre nou a pas lo seksyon swivan, ki *Goods and Services* e i annan premye *Ministries and Departments*. Kestyon lo la silvouple? Onorab Vidot wi.

HON AUDREY VIDOT

Mersi Mr Speaker. Bonzour SS ek ou delegasyon, tou Manm Onorab e bann dimoun ki a lekout.

SS eski ou kapab donn nou detay lo sa *deficit in office rent*, eski i annan logmantasyon *the rent* oubyen i annan en sanzman lokasyon? Petet si i annan en sanzman dir nou lo ki landrwa ki zot pe *rent* pou *Department of Culture*?

Apre i annan sa dezyenm pou sa *additional fund* pour *Advisory Board* ki'n ganny kree. Eski sa Bidze i sipoze zis pour sa bout fonksyonman ladministrasyon oubyen osi i enkli pou *allowance* pou bann *Board Members*? Ki pli o ki zot

pe peye lo la, pou konsider pou peye? *Thank you.*

MR SPEAKER

SS.

SS PATRICK PAYET

Mr Chair. Mersi Onorab. Kekfwa Onorab zis avek ou permisyon Mr Chair zis pou repet ou dezyenm kestyon silvouple?

MR SPEAKER

Onorab.

HON AUDREY VIDOT

Kot sa *Advisory Board*, eski i pour sa Bidze i pour son fonksyonnen sa *Board* lo baz *administrative*, oubyen osi i pou enkli si i annan okenn *allowance* ki sa bann manm lo sa *Advisory Board* pou resevwar, e ki pli o tarif ki zot pe gannyen atraver sa *allowance*. *Thank you.*

MR SPEAKER

SS. Onorab ou pe koz lo *Advisory Board* pour lekel?

HON AUDREY VIDOT

Lo sa *Department of Culture* mon pe koz lo la mon pe fer referans sa nouvo sa ki'n kree.

MR SPEAKER

Ok.

SS PATRICK PAYET

Mr Chair. Mersi Onorab pour sa kestyon. Kekfwa zot pou vwar ki *across the board* zot pou vwar ki i annan ki nou'n fer azisteman lo kote *rent*. Parey zot konnen ki Gouvernman ti fer en demann *up to 25percent discount* avek bann *landlord*, ki pe *provide renting space* Gouvernman. Me pa tou ki nou'n ganny sa poursantaz.

I annan ki nou'n ganny 10poursan, i annan ki nou'n ganny 15poursan, i annan ki nou'n ganny *the full 25percent*. So revizyon ki nou'n fer se nou'n vwar dan son totalite e Departman Kiltir sanmenm sa ki nou pe demann sa adisyonnèl. I pa'n ganny sa *fully* sa 25poursan.

Lo kote sa *Advisory Board* i annan sa nouvo lenstitisyon ki pou vin devan Lasanble tre byento. Nou ti anvizaze kekfw sa ti pou'n konplete, me selman kekfw *now* kot i ete dan lenstans, kekfw sa i pou vin devan Lasanble nenk *in October*.

So sa *Advisory Board* ki ti pou pran en pe plis tou sa bann lenstitisyon ki tonm anba Kiltir ti pou fer li vin *one entity*. Sanmenm sa ki nou ti pe met sa provizyon pour sa lannen.

Me i pou kapab annan *further savings*, menm si Lasanble pou aprouve i annan *further savings* ki pou arive. Vi kekfw sa i pou vin dan operasyonnel kekfw *by end of October*. Mersi Mr Chair.

MR SPEAKER

Mersi. Wi Onorab Gabriel.

HON CONRAD GABRIEL

Mersi Mr Speaker. Bonzour tou dimoun a lekout. Bonzour SS ek ou *panel*. SS petet dan Departman *Environment* nou pe vwar '*additional fund to cater for increase in contracts, rivers, channel marshes*.'

Eski zot pe met nouvo kontra, nouvo dimoun pe ganny nouvo kontra? Si wi eski zot in fer *tender* en pe dan sa laliny? Ou kapab donn nou en pe plis detay lo sa *rivers, marshes*? Mersi.

MR SPEAKER

Mersi Onorab. SS wi.

SS PATRICK PAYET

Mersi Mr Chair. Mersi Onorab. Pour lo kote Minister Lanvironnman i aktyelman *tender* ki tonm ganny fer 2020. Me sepandan akoz ti pou annan en revi lo tou bann kontra Lanvironnman.

Me selman sa legzersis pa ankor konplete. So sanmenm sa ki nou'n vwar ki nou'n bezwen met sa larzan adisyonnèl. Me i *tender* ki ti'n fini *awarded* 2020 i pe kontinyen. Me selman akòz servi pa ankor ganny konplete e nou'n *anticipate* revè pou ganny konplete by *early next year*. Mersi Mr Chair.

MR SPEAKER

Mersi. Onorab Cosgrow ou ti'n lev lanmen ou? Onorab Uranie. Mersi.

HON ROCKY URANIE

Mersi Mr Speaker. Bonzour *panel*. SS *just to go back on the rent*, mon pe get, mon konpran kot sa rediksyon ki i annan ki pa ankor donn sa 25 pousan.

Prezan sanmenm sa ki annan sa bann *shortfall*. Me mon pe get pou Departman Familyal, eski li in sorti dan en landrwa ki ti pli bon marse in al dan enn pli ser? Ou kapab eksplik nou silvouple. Mersi.

MR SPEAKER

Mersi. Wi SS.

SS PATRICK PAYET

Mersi Mr Chair. Mr Chair pou Departman Lafanmir avek tou son bann lenstitisyon ki tonm anba li, i pa'n gannyen sa 25

pousan in ganny *up to* 15pousan.

So letan ou regard tou son bann landrwa ki mazorite ki'n gannyen se *up to 15percent*. Mersi.

MR SPEAKER

Tre byen. Ankor, Onorab Uranie wi.

HON ROCKY URANIE

Mersi Mr Speaker. SS mon pe get kot *comments* kot Departman Familyal i dir in bouze li in sorti dan en landrwa in al dan en lot lokasyon. Mersi.

SS PATRICK PAYET

Mersi Mr Chair. Mersi Onorab. Wi Mr Chair i annan en bouzman ki'n arive ki lofis, me selman letan ou regard son lenpak menm si in bouze son lenpak i mazorite sa. Akòz i annan en nouvo landrwa kot in ale Oliaji *Building*, detrwa son bann *staff*.

Me selman dapre son restriktirasyon. Me selman mazorite letan ou regarde akòz zis sa 15pousan sa adisyonnèl. So i pa- Akòz letan ou regarde in kout li 974mil. Me selman i pa, i ti annan en pe larzan ladan e nou ti'n fini fer en pe *forecast* ki ti pou annan sa bouze. Me selman mazorite i akòz sa

larzan adisyonnèl ki'n bezwen mete. Mersi.

MR SPEAKER

Mersi SS.

HON SEBASTIEN PILLAY

Mersi Mr Speaker. Mr Speaker mwan mon oule *focus* en pti pe lo sa, lo Konsey *for the Disabled* en, mon konpran poudir Gouvernman i fer *budget cut from dissolution of the Board*.

Be *subsequent to that* apre Gouvernman in kre en lot antite, e mon pe *share* avek ou sa ki mon ti gannyen dan en *meeting*, ki i annan bokou mekontantman parmi sa bann dimoun.

So ler sa bann *Board* in fini ganny koupe la, eski ou Minister i *go back* pou regard fonksyon sa bann *Board*? E regarde ki mannyer sa fonksyon i ganny re entrodwir e pou ganny *finance* dan sa nouvo Minister, ki ava annan en antite ki pe vreman *follow* kwa ki pe pase avek - sirtou par egzantp ler nou pe koz bann dimoun otreman kapab?

Nou dir zot *disabled* be mon krwar *the term is the*, bann dimoun otreman kapab. Eski Minister Finans atraver Minister Lafanmir, in ganny lezot enterpretasyon pou rod

fason pou siport Konsey, (pa Konsey)

Me pou siport bann paran e bann zanfan otreman kapab, par lefe ki la, vi ki si zot pa pe servi. E bokou paran in bezwen aret zot lanplwa pou zot al okip zot zanfan, akoz zisteman zot napa landrwa pou met zot zanfan pandan lazournen. Mersi Mr Speaker.

MR SPEAKER

Mersi. *SS please*.

SS PATRICK PAYET

Mersi Mr Chair. Mersi Onorab. Pou nou, nou'n vwar ki par egzantp sa larzan ki nou'n fer *budget cut* anba *National Council for the Disabled*, i prensipalman akoz sa Konsey nepli egziste, me selman bann travayer Gouvernman ki pe travay lo sa Komite, pou revwar Lalwa an zeneral.

So sanmenm sa ki i annan sa *budget cut* dan sa *Council* li menm ki nou pa *anticipate* avek bann travayer Gouvernman menM ki zot pe fer sa legzersis pou zot ganny peye larzan adisyonnèl, akoz i en Komite dan Minister Lafanmir li menm.

MR SPEAKER

Wi Onorab Pillay.

HON SEBASTIEN PILLAY

Mersi Mr speaker. Be si mon kapab servi loportinite pou *press you for action* vizavi sa Bidze ki zot pe prezante.

Sa bann dimoun i sipoze pe travay lo en *revised* keksoz pou sa lasosyasyon e sa bann dimoun. Sa ki mon ti a kontan demande se, eski Minister Finans ler i annan sa bann travay ki pe ganny fer zot ganny en *deadline as to when* sa pou arive? Akoz sa ti ganny *costed* anba en striktir, e la i bezwen annan en striktir ki pou *cost* li.

Eski i pou annan en striktir adisyonnal ki pou ganny kree pou *cost* li, ki petet prezan *supplementary* pa pou prevwar pou sa? *This is my concern*, ou pe konpran mon konsern, nou pe tir sa larzan, be si i annan en striktir adisyonnal kote nou pou ganny sa larzan pou nou met li, pou kouver li? Mersi Mr Speaker.

MR SPEAKER

Mersi Onorab. SS wi.

SS PATRICK PAYET

Mersi Mr Chair. Mersi Onorab. Mr Chair kekfwazis pou azoute ki sa larzan in ganny tire dan Bidze 202 li.

Me sependan letan nou pe revwar li dan Bidze 2022 si i annan en lot striktir, baze lo bann rekomandasyon ki zot

mete e Minister Finans lanmenm la ki i revwar li dan son totalite avek sa Minister responsab pou sa Konsey.

So i en diskisyon kontinyel ki ganny diskite dan preparasyon Bidze. Me selman nou ki nou'n fer sa *forecast* la spesifikman akoz *savings* dan Bidze 2021. Mersi.

MR SPEAKER

Mersi. Onorab Henrie.

HON GERVAIS HENRIE

Mersi Mr Chair. Mon kestyon i konsern alokasyon ki pe fer pour bann kontra Larivyer, bann lanmar. Mon problem la mwan i valer pour larzan. Ou konnen akoz bann netwayaz i enn bann pli gro kopo kot *tax payers* pe depanse. E i sagrinn mwan toulezan pou nou vwar kantite larzan nou bezwen met dan netwayaz.

Be napa problem nou bezwen gard pei prop, touris i vini zot kontan, be solman mwan koman *MNA* i pa mon responsabilite ki mon merite pe tay deryer sepa mwan lekel ki pou netway larivyer. E nou ganny gran difikilte lo mon telefonn la, bann portre ki dimoun pe reste bann landrwa ki pa netwaye, zot anvoy mwan.

Nou war nou pe fer bann lezot louvraz an plis ki en boug

i ganny en kontra e peye pou li fer sa. So mon pledwari la avek *panel* akoz mwan ki bezwen koz avek sa bann MDAs pou asire poudir bann ki annan responsabilite pou fer sir ki bann Kontra i ganny swivi konmsi fer sir poudir *it's value for money before we pay you*, nou satisfè ki ou'n fer.

So eski zot kapab get dan sa sityasyon e tir en pti pe sa presyon lo zepol nou tou ki la anndan silvouple? Mersi.

MR SPEAKER

Mersi Onorab. SS.

SS PATRICK PAYET

Mr Chair definitivman sanmenm sa. Mersi Onorab, definitivman sanmenm sa pou nou, nou'n vwar ki nou bezwen revwar bann kontra netwayaz dan son totalite. Akoz nou bezwen met li dan en lankadremman ki larzan i enn, me selman sipervizyon i en lot.

So i dan son totalite ki nou pe fer diskisyon. E an menm tan ki kekfwa nou annan en propozisyon nou ava vin diskit en pe avek bann DA, avek bann nouvo Manm Onorab, kekfwa pou zot vwar sa propozisyon avan nou al lans *tender*.

So i en travay ki nou pe fer pou nou revwar li dan son totalite, akoz mon konnen

nou'n ganny bokou konplent lo kote *oversight* osi, ki mannyer nou met en lankadremman an plas pou fer sir ki *at the end of the day* ou pe ganny peye pou ofer sa servis ou bezwen *deliver* dan sa servis.

Me i en striktir ki nou pe travay lo la. E konzwentman avek bann lezot MDAs. Mersi Mr Chair.

MR SPEAKER

Mersi SS. Nou'n ariv 10er edmi ki i ti apepre letan ki nou ti a pe *plan* pou sa. Me selman mon krwar tan ki SS avek son delegasyon la nou a prolonz sa sesyon, koumsa nou a kapab termin avek zot e ler nou trounen nou a pran deba. Onorab Esparon.

HON REGINA ESPARON

Mersi Mr Speaker. Bonzour SS ek ou delegasyon. SS mwan mon ti pe zis fer klarifikasyon *Ministry of Internal Affairs*.

Mon war la kot *Prison Department* zot in fer en *savings*, me selman mon pe get dan *'comment's* i dir poudir zot ti pou, i annan sa 12 sekirite *Tanzanian* la ti annan, zot in fer provizyon pou zot saler ziske Out.

Ki'n arive avek zot, eski zot in ganny ranplase par bann Seselwa? Parske dan *comments*

i dir "*they were supposed to be replaced by local employees.* Eski sa in arive oubyen zot ankor la li *payroll* prizon? Mersi.

Mersi Onorab. SS.

SS PATRICK PAYET

Mr Chair. Mersi Onorab. Sa i en keksoz ki nou kapab revwar avek Departman Prizon pou vwar si sa bann dimoun in ganny ranplase ouswa zot ankor la.

Me selman mazorite sa *savings* ki nou'n gannyen se akoz *foreign exchange rate* ki nou ti servi pou sa bann *Tanzanian* e bann lezot ki zot annan pe *travel* avek zot. I ti pli o baze lo sa *average exchange rate* ki nou'n servi. So nou'n ganny en pe *savings* baze lo to *exchange rate*.

Me selman lo ou specific keston nou ava regard avek Departman *Internal Affairs* si sa bann dimoun i ankor la ouswa zot in fini ganny ranplase avek Seselwa. Mersi.

MR SPEAKER

Mersi SS. Onorab Gill e Onorab Loizeau i a swiv, so ou kapab met ou pare.

HON CHURCHILL GILL

Mersi Mr Chair. Mr Chair mon pou bezwen retourn SS lo paz 5

pou *Department of Tourism*. Akoz nou ti tonm dakor nou, nou pou al annord be apre mon war nou'n sote mon bezwen fer li retournen.

Mon keston lo la se ler nou ti pe diskit Bidze pour 2021 nou ti ganny dir ki bann biro *STB* deor pou ganny restriktire e nou ti ekspekte ki nou pa pou annan bokou bann konponan *foreign exchange* si sa ti pran plas.

Alor si ou kapab eksplik nou si sa restriktirasyon in pran plas, e si in pran plas ki kantite *savings* ki nou'n kapab fer? Pa lo son *exchange rate*, me son kou li menm vi ki restriktirasyon in ganny fer si in ganny fer? Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Restriktirasyon lo kote bann *overseas office* pou *STB* Departman Touris sa i ankor *ongoing*.

Mon konnen i annan ki zot ankor pe travay lo la pou vwar li dan son totalite, e baze lo sirkonstans lekonomi ki nou pe fer fas avek, e ki kalite lezot striktir ki zot met an plas sirtou lo kote *digital marketing*.

So i en *ongoing exercise* . me selman nou lo kote Minister Finans ki nou'n vwar nou'n met en *estimate* apepre 25milyon. Sanmenm sa ki nou'n vwar ki nou kapab fer sa *budget cut* ladan. Mersi Mr Chair.

MR SPEAKER

Mersi. Parey Onorab Gill in dir nou'n fini komans tous lo 2, lo seksyon swivan, so petet nou kapab prezan okenn lot kestyon ki reste lo '*Goods and Services* 'pour *Regulatory Bodies* ek *Public Bodies providing services*, sa 2 ki swiv. Okenn kestyon lo la? Onorab Esparon wi.

HON REGINA ESPARON

Mersi Mr Speaker. Lo *Regulatory bodies (TRNUC)*. Mon vwar poudir i annan en, *the Commission required houses* pou R15mil *each* pour 6 *International Consultant*.

Mon kestyon se eski sa bann *post* pa kapab ganny lokalize? Parski zot in ganny demann siplemanter 1milyon or 126mil la, siplemanter?

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab pou sa kestyon. Lo kote *TRNUC* in ganny zis en adisyannel. So

i pa'n gannyen sa totalite in ganny zis enn, nou'n donn li pou en *legal person*. Me selman sa *legal person* i pa pe, nou pa pe anvizaze pou li vin Sesel vi ki i kapab fer sa travay *virtual*.

E *TRNUC* in donn *estimate* ki zot pe pey pou sa servis apepre \$4mil par mwan. Pour en dimoun legal e apre keksoz ki nou'n mete lo la se adisyannel pou *TRNUC* balans ki akoz ot osi zot pa'n ganny sa *rent 25percent*.

Zot pe pey *the full rent* zot pa'n ganny sa *discount* e sa, sa larzan adisyannel ki nou'n mete. E apre mon krwar nou ti'n mank pour son *housing* letan nou ti pe prepar Bidze ki nou pa ti'n mete dan Bidze orizinal.

So sa 3 konponan ki nou'n mete pou *TRNUC*. So nou pa'n donn li *additional* nou'n donn li zis enn *legal person*. Be kekfwazis pou azoute Mr Chair sa i son demann orizinal ki i ti pe demande, pou tou sa bann dimoun. Son Bidze orizinal ki i ti pe demann sa kantite dimoun me selman nou pa'n donner.

MR SPEAKER

Byen. Mersi SS. Onorab Samynadin.

HON KELLY SAMYNADIN

Mersi Mr Speaker. Bonzour SS avek ou delegasyon. Mon kestyon i lo paz 7, '*public bodies providing essential government services.*' Pour Lenstiti Kreol kot i annan en *shortfall* R169mil.

Mon kestyon i eski Lenstiti Kreol i pe benefisyè avek sa rediksyon, an vi ki i pe *rent* lofis Providence, si i pe benefisyè avek sa rediksyon e ki poursantaz?

Aprè mon ti a kontan konnen vi ki sa lenstiti pe *rent* lofis Providence depi 2018. Eski i pou annan en alokasyon dan Bidze 2022 i pou *cater* anver sa proze renovasyon, ki mon konnen i lo latib. Mon pou kapab evit plis *shortfalls* dan le fitir. Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab Mr Chair pour *Creole Institute* li i pa'n gannyen sa *discount* pour sa lannen, menm i in apros *landlord*.

Me en keksoz ki nou pe travay akòz letan nou'n regard Departman Kiltir an antye, nou'n vwar ki'n en bon pe larzan pe al dan *rent* ki enkli *Creole Institute*. Me selman letan ou regard bann lezot

antite anba Departman Kiltir en kantite larzan pe al dan *rent*.

E en diskisyon ki nou pe fer *actually now* ki avan nou finaliz Bidze pou vwar si par egzanz ou kapab annan en *Culture House* ki kapab met mazorite sa bann antite, sa bann *staff* anba ki kapab servi sa bann larzan ki pe pey *rent* servi pou pey sa nouvo *building* ki nou anvizaze.

So i en diskisyon me selman *the thinking* i la Onorab definitivman pou nou vwar *potentially* pou annan *additional savings* lo sa bann *heads*. Mersi.

MR SPEAKER

Wi Onorab.

HON KELLY SAMYNADIN

Mon'n demann en kestyon vizavi renovasyon Lenstiti Kreol si i dan, i deza lo latib sa proze renovasyon, eski i pou dan Bidze 2022?

MR SPEAKER

SS ou kapab adres sa?

SS PATRICK PAYET

Mersi Mr Chair. Mersi Onorab. Definitivman nou'n met en provizyon dan Bidze 2022. Mersi.

MR SPEAKER

Byen avek sa. nou ankor lo sa seksyon. Onorab Lemiel Wi.

HON SYLVANNE LEMIEL

Mersi Mr Chair. Mon ti a kontan ganny en pti pe plis leksplikasyon kot i konsern SAA. Sa bann *subsidy* R55milyon ki pe ganny bidzete koman siplemanter.

Si SS i kapab donn nou en pti pe plis detay dan sa laliny e apre en pti pe plis detay osi kot i konsern *Health Care Agency* R1.5milyon, ki egzaktaman zot pe al fer? Mon konpran i en *shortfall* anba *security and enforcement*. Be nou ti a kontan ganny en pti pe plis detay. Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Pou lo kote SAA parey zot konnen i annan en sibvansyon ki nou pe donn bann *farmers* pou zot bann *carcass fees and day old chicks and animal feed*.

Letan nou'n fer *forecast* nou'n vwar dan Bidze nou ti'n met zis en alokasyon 10milyon. Me selman *as August* zot ti'n fini *spend* 36milyon. Me parey ou konnen lannen pase, akoz *exchange rate* ki ti fer en pe sa bann kou ogmante lanmenm ler

Gouvernman ti pran sa desizyon pou fer sa sibvansyon.

Me letan ou vwar ki *exchange rate* in desann, me i en diskisyon ki nou'n vwar ki dan *market* mondyal *the CIF rise* pou sa bann *material* avek prodiksyon in ogmante. Par egzanp *per metric ton* in monte sorti \$420 pou ariv \$1050.

So menm si ou annan sa *exchange rate* lo pozitiv, ou annan en *negative* lo kote *the cost*. So sanmenm sa ki i annan sa *significant increase*. Me selman nou annan diskisyon *now* avek sa bann Lazans ki pe *provide* sa bann *material*, bann *farmers*, pou nou vwar li dan en lankadremman ki mannyer nou kapab fer li vin pli soutenab.

So i annan en diskisyon e sa diskisyon pou dan preparasyon pou nou finaliz Bidze 2022 lo la. Lo kote Minister Lasante.

MR SPEAKER

Pa telman lo Minister, me lo *Health Care Agency*.

SS PATRICK PAYET

Pou lo kote *Health Care Agency* i pou son sekirite e sa osi ki nou ti ekspekte nou dan Bidze 2021 pou nou konplet sa legzersis, pou nou vwar dan son totalite parey Minis ti anonse dan son *budget speech* lo ki

lankadreman ki nou mete *for security*.

Akoz parey ou konnen nou kapab redwir kou, me selman met plis en pe lo kote teknolozi. Me selman sa legzersis parey ou konnen ki *POU* i fek lans *tender* pou nou kapab annan en *firm* ouswa en endividi ki *specialized* dan sekirite, pou zot fer en *thorough* assessment pou zot kapab propoz *something* pou Gouvernman.

So sa osi nou *anticipate* pou nou konplet sa legzersis. Snnan en premye *draft report by end of December* e pou nou kapab relans bann *tender early next year*. E nouvo kontra pou bann sekirite nou anvizaze pou komanse le 01 Zilyet 2022.

Me sanmenm sa ki kekfwa nou pa'n vwar *savings* sa lannen, ki nou ti pe *anticipate*. Me akoz nou anvi konplet sa legzersis. Mersi.

MR SPEAKER

Mersi. Wi Onorab Lemiel ou le kontinyen?

HON SYLVANNE LEMIEL

Zis en pti klarifikasyon SS. Pou pe koz sekirite kot tou bann klinik *etcetera*, ouswa nou pe koz ziz kot Lopital la letan nou pe koz sekirite? Mersi.

SS PATRICK PAYET

Mersi Mr Chair. Mersi Onorab. Nou pe konsantre lo 3 Minister Lasante, Ledikasyon avek *Local Government*.

So sa 3 Minister apre *hopefully* nou a kapab servi menm lankadreman pou nou kapab *apply* li, lo zot bann lezot Minister. Selman sa *tender* ki nou'n fer la pou fer sa legzersis nou pe konsantre li lo zis sa 3 Minister. Mersi.

MR SPEAKER

Wi klarifikasyon Onorab.

HON SYLVANNE LEMIEL

Mr Chair. Klarifikasyon i se ki pou zis *Health Care Agency* i 1.5milyon, nou pe koz sekirite kot son bann klinik dan bann distrik, ouswa nou pe koz zis anvil kot son bann *main* servis i ganny donnen? Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Wi i enkli bann klinik *as well*. Mersi Onorab.

MR SPEAKER

Mersi. Onorab Henrie.

HON GERVAIS HENRIE

Mersi Mr Chair. Mon pou fer referans avek sa sonm

55milyon pou SAA e partikilyerman akoz i annan en konponan *subsidy* ladan. E mon oule ki SS i donn nou en leksplikasyon.

Ou war sa zafer *subsidy* malgre son kompleksite e bokou nou i siport li dan diferan fason, me dan en keksoz en pe pli direk, mwan mon ekspekte poudir ok en sekter i ganny *subsidy* i sipoze enpakte lo kou lavi. Be i pa neserman leka. Par egzant dan lapas zot ganny konsesyon lo *fuel*, eski pri pwason i desann? Kestyon ki bann dimoun deor i kapab demande.

Prezan mon lobzekasyon avek sa zafer la se akoz en serten letan i plito benefisy bann *player* dan sa lendistri partikilye. Selman nou kontinyen donnen, akoz si nou pa donnen i vin size politik, i dir nou pa siport sa sekter koman en politisyen.

Me solman ki manner dimoun ki mon reprezante i sipoze benefisy avek sa? Prezan nou war en sonm ankor i ganny mete. So mon anvi donn zot en rekonfor poudir non, i dan en zefor pou nou kontinyen amelyor nivo e standar lavi. So *how do* Finans i zistifye? Kontinyasyon sa bann *subsidy*? Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab pou sa. I en diskisyon ki vremen pertinan, akoz mon krwar anba ki kekfwa mon pa ankor kapab vin avek en propozisyon lo ki striktir. Nou met par egzant nou pe koz lo Departman Lagrikiltir, ki kalite *subsidy* ki nou mete devan?

Konmsi letan nou, nou osi letan nou pe fer sa evalyasyon, nou pe vwar li vre *as* Gouvernman nou dir nou pe ankouraz *local productions*. Annou redwir plis lo lenportasyon. Ou pou annan son *exchange rate* presyon lo *foreign exchange* lo la ki *at the end of the day* kekfwa ou pe regard li dan son totalite, si ou annan plis Dolar dan sistenm *exchange rate* i a stabilize.

E ki endirekteman i mentenir, i annan en *stable cost of living*. I pa pe met sa presyon si ou pou annan *exchange rate* pou evalye tou lazournen. So i en diskisyon ki nou pe gannyen avek Departman Lagrikiltir, pou nou regard li dan son totalite.

Me selman parey ou pe dir ki manner endirekteman kekfwa en dimoun pa vwar li, be ki mon pe gannyen dan sa

subsidy letan ou pe regard li dan Bidze? So i dan son totalite ki nou pe regard li.

Me selman en diskisyon ki nou pe gannyen osi letan nou regard li, ki mannyer nou met en sistenm *subsidy* ki *at the end of the day* nou kapab fer sa fermye ozordi sorti kot i ete e demen vin en biznesmenn.

So letan nou regarde striktir ki an plas ozordi, kekfwa i pa direkteman sa bann fermye pe benefisyé, me selman kekfwa sa bann lezot gro biznesmenn ki pe fer vini sa bann *material*.

So i en diskisyon ki nou pe gannyen avek Departman Lagrikiltir avek Minister Finans avan kekfwa nou fer en propozisyon avek Lasosyasyon Fermye. Pou fer sir ki *at the end of the day*, nou bann fermye ki nou pe dir ki mannyer nou met zot dan sa *next level* lo kote biznes zot menm.

E *at the end of the day* vwar ki mannyer piblik Seselwa osi i benefisyé dan sa striktir ki nou met an plas. Me selman i en *valid point* Mr Chair. Mersi.

MR SPEAKER

Mersi. Onorab Gill ou annan kestyon? Wi.

HON CHURCHILL GILL

Mersi Mr Chair. SS lo sa *Health Care Agency* ki ou fek donn serten larepons lo la. Ou konnen i annan en keksoz ki mon bezwen fer sorti la, menm si ou'n dir ki sa larzan i pou sekirite pou tou bann klinik, petet i en keksoz ki ler ou, ler zot Minister Finans i pretan Bidze 2022 ki zot, zot get byen ladan.

Akoz par egzanp pou Praslin Minister Lasante i ganny en gro Bidze. Me selman nou war nou, nou bezwen vin lager dan Lasanble pou en keksoz kapab ganny fer lo Praslin avek striktir Praslin.

Alors i enportan ki menm si ou'n donn sa larepons la, eski realite i pou kouver pou Praslin ek La Digue? Nou pa konnen. Petet dan Minister Finans en keksoz zot, zot bezwen fer Minister konnen ki be donn en laliny ki pou ganny depans Praslin.

Akoz ler i napa en laliny Minister i deside e a lafen dizour nou, nou pa gannyen sa ki nou, nou bezwen. Menm si Bidze i gro. Alors mon ti anvi sinyal sa la byen boner en mannyer ler Bidze i vini pour 2022, sa i ava en keksoz ki devret ganny pran kont ladan. Mersi.

MR SPEAKER

Mersi Onorab Gill. SS ou a reponn?

SS PATRICK PAYET

Mersi Mr Chair. Mersi Onorab. Mr Chair pwen note e nou ava fer sir ki *at least* nou ava met en striktir an plas, pou nou fer li letan zot in dir pou sak klinik konbyen i koute e dapre *forecast* ki zot pe donn nou. Mersi.

MR SPEAKER

Mersi. Avek sa. Wi Onorab Pillay.

HON SEBASTIEN PILLAY

Mr Speaker zis ou a permet mwan en dernyen pti kestyon *please?*

MR SPEAKER

Sorry, en dernyen kestyon? Wi.

HON SEBASTIEN PILLAY

Mersi. Wi Mr Speaker. Mon ti demann SS, ou konnen i annan en kantite sonm ki SS pe koze *regarding* bann peyman ki pe ganny fer par bann *entities*. Swa SAA, swa lopital par egzant bann kontra, sekirite. Par egzant eski in ganny *tender* avek Lopital oubyen bann kontra ki SAA i annan par egzant avek bann ki zot pe peye *January to June?* Ki sistenm zot

annan an plas pou *monitor* ki i annan en *value for money?*

Mon ti tann sa kestyon taler ganny demande par Onorab Henrie. Be an relasyon avek sa zafer SAA osi, mon krwar petet ti ava enportan petet etabli sa.

So osi letan nou retournen petet Mr Speaker SS i kapab donn mon serten lenformasyon. Si i kapab donn mwan la, si ou permet li pou donn mwan la mon ti ava apresye oubyen si taler. Mersi Mr Speaker.

MR SPEAKER

Mon pe anvizaze fini sa kestyon Komite. SS wi silvouple adres son kestyon.

SS PATRICK PAYET

Mersi Mr Chair. Mersi Onorab. Definitivman Onorab en keksoz ki nou pe fer se bann verifikasyon tou sa bann *invoice* par egzant lo kote SAA ki'n ganny peye pou sa ban *subsidy*. En verifikasyon en legzersis ki nou pe travay konzwentman avek sekter prive, ki i annan bann lenformasyon adisyannel ki nou'n demann zot.

Lo kote sekirite, definitivman nou travay konzwentman avek *POU*, pou fer sir ki bann prosedir in *follow*. Mersi.

CAPITAL PROJECTS

MR SPEAKER

Mersi. Avek sa nou ava pas lo dernyen seksyon. *Capital projects* e nou ava pran tou le de *subsection* ansanm. Fotespere nou a terminen par 11er? Si nou pa fini 11er nou a pran en *break*. Onorab Esparon.

HON REGINA ESPARON

Mersi Mr Chair. Mr Chair lo kote *Ministry of Lands and Housing* en pti leksplikasyon SS. Mon vwar poudir dan *comments* la in mete poudir ‘*outside work has been transferred to SPDF.*’

Petet eksplik nou ki kalite louvraz kot *Housing and Lands* ki'n ganny transfer avek *SPDF*? Seksyon ‘*revised budget allocation foreign Grant finance project?* Mersi. Paz 9.

MR SPEAKER

Yes. Wi SS.

DEPUTY COMPTROLLER GENERAL ASTRIDE TAMATAVE

Mr Chair. Bonzour Mr Chair. Mersi Onorab pou ou kestyon. Sa *cut* 9.9milyon anba *MHILT*, 4.3milyon ladan i larzan ki'n al kot Ladefans kot *Coast Guard* i annan sa semen.

So ti annan en Bidze anba Ladefans me pa ti ase dapre *tender* e sa i sa 4.03 milyon ki *MHILT* ki ti *basically project manager* lo sa proze ki nou'n *cut*, nou'n transfer anba Ladefans.

E apre la diferans i pour *the foreign exchange component* letan nou ti pe prepar Bidze *forex* ti R22 e dan *revised* ti 18.02 apepre. So sa i sa rediksyon. Mersi.

MR SPEAKER

Mersi. Mon annan 2 Manm ki'n lev lanmen pou demann kestyon lo sa sesyon. Eski i annan lezot Manm ki pe anvizaz kestyon lo sa seksyon ‘*capital projects?*’ Byen.

Dan sa ka sa ki mon a propoze se ki nou pran en *break* la e nou retournen 11er edmi. E mon a bezwen gard SS Payet ek son delegasyon pou nou kapab kontinyen. Eskiz mwan SS Payet mon ti a kontan les ou ale, me nou a termin sa. Nou a pran en *break* la e nou a retournen 11edmi.

(BREAK)

MR SPEAKER

CAPITAL PROJECTS (Cont)

MR SPEAKER

Bon nou ankor lo kestyon lo *Capital Projects*. Mon annan Onorab Monthy ek Onorab Gill lo mon lalis. Lekel ankor ki ti'n lev lanmen silvouple? Onorab Monthy ou kapab komanse.

HON PHILIP MONTHY

Mersi Mr Speaker. Bonzour a tous. Kestyon i lo paz 8, *Ministry of Local Government and Community Affairs*. 'Slow implementation of projects to revive budget allocation for Grant finance project.'

Eski in annan retar pour konkretiz bann proze ki ti pou ganny finanse anba *India Grant* e si i annan okenn bann retar ki'n arive anba sa, anba *India Grant*, kwa ki'n fer ki'n annan sa bann retar? E eski sant sosyal Cascade mon distrik i tonm ladan?

E si wi kan ki nou pe prevwar annan finansman pou konstriksyon nou sant sosyal Cascade silvouple? Mersi.

MR SPEAKER

SS.

SS PATRICK PAYET

Mersi Mr Chair. Mersi Onorab. Wi i annan dan enplimantasyon bann proze dan *Indian Grant*. I annan en pe retar ki nou ti pe gannye dan son totalite.

I annan diferan rezon, me selman letan nou regard spesifik *for* pou Cascade ki nou ti'n mete sa 7milyon i dan *second phase*. Savedir li *now* tou bann file pe ganny evalye par *Indian Government* avan ki nou kapab siny *MOU*.

So nou *anticipate once* sa legzersis i konplete pou nou kapab *tender process*. So i dan *pipeline* li e ou pou war li definitivman dan Bidze 2022. Mersi Mr Chair.

MR SPEAKER

Mersi. Onorab Gill.

HON CHURCHILL GILL

Mersi Mr Chair. Mwan mon kestyon i lo *Industrial Estate Authority* apre lo *Transport Commission*. I annan sa 2 sonm, 13milyon avek 1.9milyon ki rezon ki'n donner se *delay* dan *project*. Mon premye kestyon se, eski dan Bidze 2022 nou pou war probasyon pou sa 2 proze?

Apre mon dezyenm kestyon se mon krwar ler nou en proze i ganny mete dan Bidze sirtou pou Praslin, nou bezwen fer sir ki egzekisyon i kapab bouze. Akoz par egzantp tou lede sa proze i bann proze ki lontan Praslin pe espere pou arive.

E la par egzantp pou sa *Vehicle Testing Station*, nou

ganny en kantite dimoun Praslin ki war zot pe pey sirsaz. Akoz ler bann dimoun i vin teste transpor Praslin, zot ler ki zot vini, sa kantite transpor ki annan zot pa ganny sans fini, aprezan dimoun i war li bezwen pey sirsaz, keksoz ki pa konsern zot.

Alors eski i pou dan Bidze 2022, pou fer sir ki sa bann proze i kapab ganny fer, e a soulaz sa bann difikilte ki sa bann dimoun ki annan transpor pe gannyen lo Praslin? Mersi.

MR SPEAKER

Mersi Onorab SS. *Panel*.

DEPUTY COMPTROLLER
GENERAL ASTRIDE
TAMATAVE

Mersi Onorab pou ou kestyon. *In regards to* sa proze anba (IEA) kot Eve Island parey nou ti diskite 2 semenn pase, sa proze i en proze ki *ongoing* i zis ki an vi retar dan pou komans sa proze. Se sa rezon ki nou pe fer sa koupe.

Sa larzan definitivman pou konplet sa proze in ganny mete dan Bidze lannen prosenn, ki pou vin devan Lasanble. *In regards* pou *Vehicle Testing Station* pou Praslin i osi sa larzan i - sa antite in rankontre serten

difikilte pou zot *finalize* son plan lokasyon. E sa larzan nou'n remet li dan Bidze lannen prosenn, pou ki sa poze i ganny komanse.

E nou agree ek ou ki petet vre i devret annan en pe pli bon planifikasyon, pou nou asire ki letan nou pe met larzan dan Bidze pou enplimantasyon proze larzan - proze i bouze e nou pa bezwen war nou pe koupe. Mersi.

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. SS mwan mon oule en leklersisman. *Department of* Defans, petet eklersi mwan en pti gin akoz ler mon pe gete sa rediksyon ki zot pe fer, sirtou i annan sa zafer bato, lekipman kominikasyon, *jetty*.

Pou sa bann proze li menm, ki pe arive egzakteman eski napa sa nesosite la, *or* ou bezwen pouse ki i a ganny fer a lavenir? *Thank you*.

MR SPEAKER

Mersi. Wi, lekel *panel*. wi madanm.

DEPUTY COMPTROLLER
GENERAL ASTRIDE
TAMATAVE

Mersi Mr Speaker. Anba Departman Defans i annan 2 sonm;- i annan en sonm adisyonnèl ki sa larzan adisyonnèl i pou peyman *coastal radar system* ki apepre R16milyon.

E apre li osi i enkli larzan ki Ladefans in ganny en nouvo *vessel en wave rider* ki i ti gannyen avek Gouvernman *Sri Lanka* ki sa i pa ti dan Bidze orizinal e sanmenm sa nou'n met li koman adisyonnèl.

Me parkont i osi annan en rediksyon pou son proze anba *Indian line of credit* nou ti'n - met en proze en Bidze pou nou fer *the new Coast Guard jetty*. E sa in ganny anvoye pou lannen prosenn. E osi i annan *foreign exchange component* pour sa *fast patrol vessel* ki in resevwar osi avek Gouvernman *L'Inde* sa lannen.

E se sa ki pe fer sa rediksyon. Mersi.

MR SPEAKER

Mersi. Onorab Pillay.

HON SEBASTIEN PILLAY

Mersi Mr Speaker. Mr Speaker mon ti a kontan ganny en klarifikasyon, i annan sa kestyon ki'n fek ganny pran, mon oule serten prezizyon.

An relasyon avek sa *revised allocation* nou vwar

poudir se i annan sa *cut of 24million for communication equipment* ki sipoze al pou Departman Ladefans.

E mon ti a kontan zot klarifye eski dan konteks operasyonnel, eski zot annan lenformasyon si sa pou annan en lenpak lo efikasite Lafors Defans?

Mon krwar nou tou nou'n swiv en raportaz lo televizyon ki montre lantouzyazm bann zofisyè dan Lafors Defans pou protez nou bann, nou pei. E mwan mon ti a kontan ki koman en Lasanble nou asire ki nou bann zonn dan liniform, i ganny tou bann lekipman neserer pou zot kapab fer sa travay ki zot bezwen fer pour ki nou tou nou kapab dormi anpe aswar.

So eski ou kapab eksplik nou, si sa i en keksoz ki pou vini, e rezon aköz sa *cut* li menm?

Apre dezyenmman mon ti a kontan ganny klarifikasyon osi lo sa *actual for the first 6months* an relasyon avek nou *radar coastal system*.

Kantite letan nou pou kontinyen p-pe eski nou pe kontinyen met larzan pou nou kontinyen *upgrade* sa sistenm eski i en nouvo sistenm? Aköz sa ki mon'n vwar la nou pe met en diferans ant bann *cuts* e

avek bann *Grant financing* ki pa pe antre.

Nou pe donn en Bidze adisyonnèl *around* 28milyon Departman Lasefans. So zis pour zot kapab klarifye sa pour mwan?

Aprè an sa ki konsèrn Departman *Blue Economy*, ti annan bann *commitments* ki Gouvernman ti'n fer o komansman lannen *regarding* bann lenvestisman dan *Blue Economy*.

Eski sa bann *Revised Budget allocations for Blue Economy Projects* pou afekte bann lapros Gouvernman, par lefe ki pei ti pe travay en kantite pou nou kapab diversifye nou baz ekonomik pou nou pa depans sa kantite lo tourizim?

E Departman *Blue Economy* ti annan en rol enportan pou li zwe e i ti *figure prominently* dan bann lanons ki ti ganny fer par Gouvernman lo komansman lannen.

So sa koupir 53milyon kote i vini, kote ki i sorti, eski i larzan ki sipoze antre atraver *Grant*, atraver *foreign financing*, oubyen eski larzan ki Gouvernman ti pe al mete prezan pa pe mete?

Aprè mon ti a kontan en klarifikasyon e serten presizyon. Nou vwar ki anba Minister *Local Government e*

Community Affairs, nou vwar i annan *slow implementation of projects and revised allocation for grand finance projects*.

Ou'n reponn serten eleman *for grand finance projects* me selman tou *MNA* la anndan mon krwar nou devret konsèrnè avèk bann proze ki al lo en nivo lokal.

Eski sa pou afekte bann proze ki Ankour la? Eski i annan larzan pou bann proze ki Ankour e ki dan okenn ka sa koupir li i pa pe afekte bann proze ki pe ganny fer dan bann diferan distrik *currently*, e ki sipoze pe al ver bann kominote? Mersi Mr Speaker.

MR SPEAKER

Mersi Onorab SS.

SS PATRICK PAYET

Mersi Mr Chair. Mersi Onorab. Mr Chair lo kote lekipman *for* kominikasyon *for SPDF* en keksoz ki letan nou'n diskite avèk *SPDF* akòz letan nou ti pe prepar Bidze nou ti met li dan *line of credit of India*, nou ti met en alokasyon ladan.

Me selman letan zot ti pe fer en pe zot *procurement* resers zot in vwar ki i pa nesèrman *the best* lekipman kominikasyon ki zot pou *procure from India*.

So sanmenm sa ki nou'n retir li anba *Indian line of credit* e nou'n met li dan alokasyon *domestic* ki zot kapab komans *procurement* sa lannen. Zot pe fer travay pou zot komans *procurement* e ou pou vwar ki mazorite sa kou i pou dan Bidze 2022.

So, zot pe travay pou zot vwar en lot *source of procurement* ki pa direktman *from India*. Sa definitivman i pa pe afekte sikonstans ozordi. Me selman zot pe fer sir ki *at least* zot azour avek modernizasyon zot sistenm.

Lo kote sa larzan adisyonnèl parey Ms Tamatave in mansyonnen ki, i mazorite pour sa radar sistenm 16milyon. E apre i annan en larzan adisyonnèl 8.2 pour sa nouvo *vessel* ki ti, zot in gannyen. Me osi parey nou'n dir en pe *savings* in gannyen, natirelman akòz to lesanz.

So i annan sa konponan ki nou'n bezwen retire, ki i annan *additional budget cut* ki nou anvizaze dan Departman Ladefans akòz sa.

Departman *Blue Economy* osi i annan 2 konponan. Parey ou konnen ki mazorite sa *the Blue Bond* e osi *the SwioFish Project*, ki annan mazorite i dan *foreign exchange*. E i annan sa konponan akòz to lesanz e osi i

annan sa konponan akòz proze dan enplimantasyon proze.

Me selman nou anvizaze sa bann larzan adisyonnèl en pe, i ganny mete dan Bidze 2022 pour kouver en pe enplimantasyon proze. Akòz parey ou konnen lagreman ki nou'n sinyen i pour 5an, pou nou enplimant mazorite sa bann proze.

Lo kote *Local Government* en keksoz ki nou'n vwar se mazorite fwa ki nou ganny en presyon dan Minister Finans pou nou swa *hold check*, bann proze pa ankor konplete *hold* en pe *check*, e sa proze i ganny konplete dan son lannen presedan zis pour nou kapab fer sir ki zot pa perdi sa larzan.

Me en keksoz ki nou'n travay avek *Local Government* ki pour fer sir ki *at least* donn nou en enplimantasyon tou bann proze, pour fer sir ki si i annan proze kekfwa ki pou fini dan Bidze 2022, nou met sa alokasyon *precisely* dan Bidze 2022. So okenn konponan.

Me selman mazorite konponan ki'n vini, i akòz dan *Indian Grant* nou ti'n met en pe larzan pou bann proze. Me nou'n *anticipate* ki to lesanz e an menm tan lenplimantasyon bann proze bann sikonstans ki sa bann proze kekfwa i pou fini 2022.

So nou'n met sa lot alokasyon osi pou fer sa. Akoz sa bann proze par egzanp in fini komans lo *tender process* e osi i annan keksoz ki zot in montre nou ki zot in bezwen sanze.

So ki pe al lo *tender now*. So nou *anticipate* kekfw kantmenm i pa lo *tender* nou pe pey *the full amount*. I annan en balans ki nou pou bezwen peye dan Bidze 2022. Mersi.

MR SPEAKER

Mersi. Wi Onorab Pillay.

HON SEBASTIEN PILLAY

Mersi Mr Speaker. Mr Speaker sa *issue* i en *issue* i vreman pertinan, akoz dapre mannyer mon konpran *Local Government* li in fer en lapros pou li *sort of* fer bann proze *by August 2021*.

Be prezan ou pe *hold checks* ou annan en sityasyon lot ou annan nesosite, tou *MNA* la anndan i pou konpran sa, bann *issues* ki dimoun i met devan ki bann *MNA* zot menm pe pouse.

Eski sa lenformasyon pe ganny donnen atraver *Local Government* or eski zot, Minister Finans zot in demann *Local Government* si ban Lotorite distrik sirtou bann *MNAs* zot pe ganny enformen lo sa lapros ki pe ganny pran?

Akoz i annan en sityasyon osi ki souleve kot kontrakter i vin demann *MNA*, akoz zot pa pe ganny peye zot bann proze ki zot in travay e bann *delays* ki pe arive eksetera.

So eski i annan sa lapros pou enform bann *MNAs* lo sa size? E si dan sirkonstans kot i annan distrik kot i annan proze ki pou bezwen ganny konplete. Kot par egzanp dan distrik Glacis resaman in annan dife, *North East Point* e *Local Government* ki pe *cater* pou sa. Ou annan bann lezot landrwa ki pa kapab ganny pran anba *contingency* oubyen *emergency*.

So mon vwar en koupir 16milyon, sa 16milyon i pa tou *grant* sa i enkli larzan Gouvernman ki ti'n Bidzete sa lannen pou sa bann proze.

So ki prosedir ki annan pour ki si i annan a evantyalite pour sa kapab ganny kouver *provided* ki i pa kapab ganny pran anba *contingency* nor ganny eksplike dan lafason pou li ganny pran anba *contingency*?

E apre Mr Speaker avek ou permisyon, si i posib pou mwan rod en presizyon lo en lot size, si posib?

MR SPEAKER

Wi presizyon wi.

HON SEBASTIEN PILLAY

Ok Mersi Mr Speaker. Mr Speaker mon oule rod en presizyon lo en lot size e sa i konsern *Land Transport Agency*. Mon vwar en *budget cut for 'FX component of rehabilitation of costal roads*.

Eski sa *budget cut* an relasyon avek *FX component* pou afekte an okenn ka travay ki *SLTA* i bezwen fer, lo bann semen lakot ki zot bezwen fer anba zot, anba *road management*?

Akoz ankor enn fwa in annan bann *commitments* e dan la mazorite distrik bann *MNAs* in enterakte avek bann Lotorite pou vwar si zot pou enplimant sa bann proze.

E mon dernyen kestyon se an relasyon ek *isolation unit project* for Baie Lazare, mon war ki zot in dir la, SS mon konsern i se ki pei i sipoze annan en *limit* en *ceiling* pou la kantite *capital projects* i kapab fer dan en lannen e kantite depans ki i kapab fer en lannen.

Sirtou son bann proze pa'n ganny fer dan sa lannen ou annan bann proze ki ti'n bidzete pou fer pou lannen prosenn e ou pe fer antre sa bann proze sa lannen dan lannen prosenn, reasir nou ki pou napa en lenpak dan bann sironstans

kot sa bann proze i sipoze ganny fer.

Zot ava ganny fer, e sa *ceiling* pa pou ganny afekte oubyen eski zot annan plan pou *revised* sa *capital budget ceiling*? Mersi.

MR SPEAKER

Mersi Onorab SS ou ava adres sa bann pwen silvouple.

SS PATRICK PAYET

Mersi Mr Chair. Mersi Onorab. Mr Chair lo kote *Capital project* letan nou fer *mid-year review assessment*, sanmenm sa ki nou pe met lanfaz lo sa *Infrastructure Agency* pou kapab fer sir ki lenplimantasyon proze nou kapab vwar li en pe pli vit ki pa zis *the last 6 months of the year* ouswa *the last quarter of the year*.

Akoz souvandfwa sanmenm sa ki nou'n vwar dan lepase ki Minister Finans i ganny presyon e in arive ki nou'n bezwen *hold check*. Me selman nou pa anvi anvizaze vwar sa anmenn sironstans dan le firtir, e mon krwar avek *the Infrastructure Agency* pou minimiz en pe sa bann striktir.

Me selman si spesifikman si nou al lo lenplimantasyon proze *as at June* nou pou vwar ki *Minister Local Government*

and Community Affairs i 26poursan *as at June. Seychelles Land Transport Agency* 27poursan departman Lenfrastruktir 24poursan, Minister Ledikasyon 18 poursan e *Health care Agency* 7 poursan.

So baze lo la sanmenm sa ki nou'n vwar ki Minister *Local Government* nou'n kapab retir e nou'n diskisyon avek zot. Retir en pe e kit en *buffer just in case* i annan bann lezot *emergency*. So i annan en *buffer* ki nou'n kite dan Bidze, aköz kekfwa nou i pe *anticipate* ki kekfwa nou pou tir plis baze lo lenplimantasyon proze *as at June*.

Me selman i annan en *buffer* si i arive i annan sirkonstans *emergency* ouswa letan zot pe *tender* zot vwar larzan ki zot bezwen adisyonnen.

So i annan sa striktir ki mou, nou'n met an plas nou kapab travay avek *Local Government* pou fer sir ki at least bann *MNA* i ganny detay lo enplimantasyon sa bann proze, ki zot in diskite avek Minister Finans. E kote sak poze i ete *at tender* si in konplete, ouswa prezan ki pe al lo *tender*.

So sa i en pe lo bann lenformasyon adisyonnenel ki nou kapab travay avek *The Public*

Health Investment Management Unit dan Minister Finans avek *Local Government* e donn zot en pe detay en pe plis lo bann *specific* lo sa bann sak proze dan bann distrik.

Lo kote *specific* Mr Chair an zeneral baze lo *budget cut*, e nou konnen nou *anticipate* i pou met bann presyon dan Bidze ki pe vini a lavenir. Me selman ki nou'n vwar letan nou regard li dan *the macro economic framework*.

Nou'n vwar ki baze aköz dan diskisyon ki'n gannyen avek *IMF* sirkonstans ekonomik ki mannyer i été, nou'n vwar ki nou pou annan lespas lannen prosenn ek 2023 baze lo sityasyon ekonomik pei, ki nou *anticipate* pou pli bon konpare 2020 avek 2021.

So definitivman baze lo la nou pou annan sa lespas pou nou kapab met en pe sa bann proze, sa bann proze ki pa'n kapab komanse sa lannen, e osi bann nouvo proze i ti *anticipate* pou konmanse 2022.

Me selman sepandan en keksoz ki nou bezwen fer sir ki *at least* i napa sa *major impact* lo sityasyon ekonomik ;- ki si nou vwar letan nou pe fer nou *assessment* ki nou bezwen retir en pe i dan sa diskisyon definitivman i annan ki nou pou tire.

E en lanfaz ki mou pe mete se sanmenm sa ki dan nou *financing requirement* ki nou pe vwar ki nou annan sa bann *financing* ki nou pou gannyen ek *budget support* ek *IMF World Bank* avek *African Development Bank*.

Me selman dan diskisyon avek bann lezot *bilateral partners* par egzantp nou konnen ti annan en vizite *Saudi* ki ti arive Sesel, ki nou'n met bann proze lakaz. So pou minimiz en pe lenpak so nou *financing* li zis dan domestik. Nou konnen sa i pou annan *major impact*, akoz ou pou bezwen lenportasyon.

Mon konnen *labour* i annan son bout *foreign exchange* ki'n kapab met presyon lo *BOP*. Me selman sanmenm sa ki nou revwar li dan son totalite ki nou kapab ganny en pe finansman *external*. So tousala i dan nou *macro framework* ki nou pe *anticipate e estimate*. Mersi.

MR SPEAKER

Nou pou bezwen terminen ennler Onorab Pillay.

HON SEBASTIEN PILLAY

Mersi pou ou lendilzans e ou pasyans Mr Speaker.

Savedir SS de pti kestyon *very simple*, enn, eski ou kapab

dir nou konbyen sa *buffer* ki zot pe anvizaze mete, so *that* bann *MNA* i konnen Lasanble i konnen konbyen sa *buffer* i annan, sa lespas ki egziste pou bann proze ki si i annan *emergency contingency* i kapab ganny pran.

E dezyenmman lefe ki ou dan preparasyon Bidze ki fason Lasanble pou konnen, *how you go about* swazir bann proze ki pa pe ganny fer ki pou ganny mete dan Bidze akoz i ti en *commitment* akoz sa Bidze ti en *commitment* sa Bidze sa lannen ki nou, nou'n aprouve.

So i esansyel ki nou bezwen *at least* ganny en nide kwa ki pe vini, kwa ki pe antre vizavi lafason ki i afekte sak bann distrik ki annan serten bann *major projects* ki pe vini? Mersi Mr Speaker.

MR SPEAKER

Mersi. Wi SS si ou'n pare.

SS PATRICK PAYET

Mr Chair lo kote sa dernyen kestyon apre i en keksoz ki nou kapab travay avek bann Minister.

Me selman i en keksoz kekfwa Mr Chair mon pa konnen si Onorab ti pe dir *specific Local Government* ouswa oule war li dan son totalite. San son totalite mon

konnen aktyelman zot annan kopi *PSIP* pou sa lannen.

Me selman sa pou ganny revize pou lannen prosenn, baze lo bann enplimantasyon proze. Me selman nou kapab donn zot en lendikasyon letan nou pe pas lo *PSIP* dan Bidze 2022. Letan nou pe konpar 2021 kote i annan ki nou'n tire ouswa i annan ki nou'n re mete ouswa i annan ki nou'n anvoy li dan *outer years*, 2023.

I annan kekfwa ki ti pou komans 2022 ki nou'n anvoy li *outer years*. Be nou kapab donn zot en gidans lo la letan nou pe prezant Bidze dan diskisyon Bidze avek sak Minister. Sa nou a kapab travay li la pou fer sir ki *at least* i annan sa gidans.

Lo kotye premye kestyon Mr Chair *just one minute please*. Mr Chair lo kote *local component* pou Minister Lokal e *Community Affairs* nou'n koup zis 2.5milyon - *local component* en? Dan sa 16milyon 2.5 i konsern zis zot bann proze domestik.

So nou'n kite an zeneral mazorite sa *buffer* e sa i ava ede sironstans, si i annan okenn *emergency* e dan sot lenplimantasyon proze osi. Ms Tamatave i a regarde en pti kou apre i a donnen. Mersi.

MR SPEAKER

Wi Ms Tamatave i a donn li sa larepons apre. Kot mon'n arive la? Onorab Cosgrow.

HON WALLACE COSGROW

Mersi Mr Chair. Mr Chair mon kestyon i an relasyon avek *Seychelles Energy Commission*. I annan en *budget cut* R19milyon pou *Grant projects*, *Grant finance projects*.

Si SS ti kapab donn nou en pti pe nide kwa sa bann proze ki tonm anba la, eski i sa bann proze ki relye avek sa *Grant* ki nou ti gannyen avek Gouvernman Sinwan?

Apre an zeneral Mr Speaker, Mr Chairman *capital projects*, i *cuts* dan *capital projects* i apepre R800ekek milyon - *by far the biggest cut* ki i annan dan bann diferan program ki devan nou.

Eski SS i kapab eksplik nou aköz sa kantite *cut*, e la mon pe sey mon pe prezimen i ava klarifye si mon byen. Eski la mazorite aköz ou konnen kantite *capital projects* i konsern *Grant funding*. Eski bann *Grants* pa pe antre eski i annan *issues* avek resevwar *Grants* avek bann Gouvernman ki ti promet nou?

Ouswa eski i annan *issues* avek bann Minister bann departman avek bann Lazans, ki pa pe kapab enplimant sa

bann proze parey zot sipoze enplimante? Ouswa trwazyenm eski i an preparasyon pou nou program *IMF* ki nou'n anbark ladan? Eski sa i an preparasyon kot nou bezwen ferserten kantite *cut* avek capital *projects*? SS ava eksplik nou. Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Kekfwa mon a komans lo ou dernyen kestyon apre mis Tamatave i al lo ou premye kestyon lo kote *Energy Commission*.

Mr Chair letan ou regard Bidze for *capital projects* orizinal ti apepre R1.99bilyon. me selman lo Bidze revize i 1.86bilyon. So ou vwar dan total sa *savings almost* R800milyon. Me selman letan ou regard li, mazorite dan *Grant* parey Onorab in mansyonnen e *almost* 580milyon i dan *Grant* component.

Me selman i ti annan bann gro proze *Grant*. I annan sa konponan to lesanz *foreign exchange* ki nou'n vwar ki in redwir so i annan i en sirplis ki nou'n gannyen lo la.

Akoz dan enplimantasyon nou'n servi en exchange rate pli

ba konpare avek *forecast* ki nou tib pe fer dan Bidze. Me sependan letan ou regarde i annan de gro proze ki nou ti *anticipate* pou komanse sa lannen.

Indirectly 3 gro proze. I annan Biro Prokirer Zeneral. *Headquarters* Lapolis avek *Government House*. Sa 3 gro proze. Me selman avek pandemik *COVID-2019* nou'n vwar sirkonstans i pa zis aköz Sesel, me selman aköz sa don kot nou ti pe gannyen *from India* zot osi zot ti dan en *lockdown almost* 3mwan.

So sirkonstans se par egzant letan nou get biro Prokirer Zeneral avek *Headquarters* Lapolis, sa bann *preselected* kontrakter i ti sipoze vin Sesel pou fer en vizit. Me selman zot pa'n kapab vini pandan *almost 3 months*, aköz nou ti dan en *closedown* avek *India*.

So menm si proze i *actually at planning stage*, me selman zot pa'n kapab vin sis pou zot kapab domenn zot *final drawings, final* dokiman pou ot kapab al dan *final tender*. So tousala i bann sirkonstans ki'n *because of the current* sityasyon *COVID-19* ki'n arive en pe, sirtou lo sa bann *Grant*. Me selman nou pa *anticipate* sa

pou ariv, nou pou vwar li *hopefully* 2022.

I annan bann lezot par egzanp bann demann *Grant component* mazorite zot bann *small ones* larzan i la, me selman lo kote lenplimantasyon sirkonstans bann Minister me selman lo kote *Grant* mazorite ti pou sa 3 gro proze ki nou'n vwar ki nou'n bezwen redwir Bidze. Mersi.

MR SPEAKER

Mersi nou a pas laparol Onorab, Mr Tamatave pou larestan kestyon.

DEPUTY COMPTROLLER
GENERAL ASTRIDE
TAMATAVE

Mersi Mr Chair. *In regards to Energy Commission* sa proze i lo kar bann *pilot for adjusting climate change*. I en proze solar *panel* e sa i ti pe ganny finanse avek *Chinese Government*. Son rediksyon i, nou pa'n redwir li *in trend of the US Component* or son deviz etranzer.

I zis sa rediksyon *in terms of son foreign exchange of sa sum* ki nou ti'n bidzete. Savedir sa proze i sipoze ankor pe ganny enplimante sa lannen nou pa'n fer rediksyon dan son *foreign exchange part*. Mersi.

MR SPEAKER

Wi klarifikasyon Onorab Cosgrow?

HON WALLACE COSGROW

Yes. Mersi Mr Speaker. Zis en pti klarifikasyon. Savedir SS'ler ou pe dir nou *Grant* - sa *Grant component* i *still* la, proze i *delay*.

Savedir dan Bidze nou pe get en *delay in implementation, rather than a savings* parey Minis ti dir.

So i pa en *saving* li. Sa larzan pou bezwen ganny met lot lannen pou kapab enplimant sa proze. Mersi.

MR SPEAKER

SS.

SS PATRICK PAYET

Mr Chair. Mersi Onorab. Mr Chair kekfwa poudir Onorab i tou le de, i pou *savings* sa lannen me selman *delay in implementation as well*.

Akoz letan ou regarde lannen prosenn vre ou pou met li, me selman sa lannen mon'n ganny sa *savings*. So i tou le de konponan Mr Chair. Mersi.

MR SPEAKER

Mersi. Onorab Roucou. E apre Onorab Loizeau.

HON MICHEL ROUCOU

Mersi Mr Chair. Bonzour SS avek ou de koleg. Bonzour osi zabitan Mont Fleuri.

SS anba sa bann *Grant* la mon pa'n vwar sa akoz *Rehabilitation Centre* ki sipoze fer kot Mont Royale anler Mont Fleuri Foret Noire.

E si ou kapab elabor en pti pe lo la, kan ki nou pe mazin, kan ki zot pe mazin pou konmans bouz lo la? E ki zistans bann negosyasyon in arive?

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Nou *anticipate* pou nou konmans sa proze 2022.

So mon krwar i annan gran diskisyon ki pe arive. Me selman nou *anticipate by 2022* baze lo bann diskisyon pou konmans sa proze. Mersi.

MR SPEAKER

WI Onorab.

HON MICHEL ROUCOU

SS zis note ti ava bon ki zot zwenn avek bann zabitan osi dan sa rezyon la, pou fer bann konsiltasyon avek zot. Mersi.

MR SPEAKER

Mersi. Onorab Loizeau.

HON NORBERT LOIZEAU

Wi mersi Mr Speaker. Mr Speaker mon annan zis en pti kestyon mon anvi demann SS. Vi ki mon vwar i annan, mon pe demann sa akoz vi ki mon *Vice-Chair COGA* nou ti annan en vizit kot *IEA* lo *Zone 20*. Nou'n vwar ki i annan en *cut* 13 milyon 600mil lo (*IEA*) *Industrial Estate Authority*.

Vi ki *Zone 20* mon konnen ou'n fini eksplik lo kote Zil Eve. Vi ki *Zone 20*, i annan en problem *utilities* semen *whatever*.

E i osi annan en problem avek kontrakter ki pa'n termin louvraz zafer i Ankour *whatever*.

Be vi ki i annan sa *cut* la, eski sa bann pti kontrakter *class 2* ki pe espere pou ganny en morso laba, eski zot pou esper ziska 2022 *or* mon pa konnen? Ouswa zot annan en lot fason ki zot pe planifye ansanm ek *IEA*, pou zot kapab *generate* larzan, pou zot kapab fer sa bann proze semen bann lezot *utilities* pou sa bann pti kontrakter kapab antre konmans zot loperasyon? Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. lo kote bann proze lo *Zone 20*, mon konnen ti annan diskisyon pou fer avek en kontrakter ki son *case* ti Ankour. Me selman desizyon ki *Cabinet* in pran dan diskisyon dan preparasyon Bidze 2022 semenn pase, letan nou ti pe diskite, pou nou fer sir ki nou pa prolonz enplimantasyon ankor sa proze.

Nou fer *tender*, me selman nou enkli sa kontrakter ladan. So i en diskisyon ki nou pe al gannyen avek *IEA*, pou fer sir ki *at least* sa proze i konmans enplimante sa lannen. E nou kapab diskite avek bann endividi ouswa bann biznes ki deza annan ban *small* kontrakter osi. Mersi.

MR SPEAKER

Mersi Onorab Vidot.

HON AUDREY VIDOT

Mersi Mr Chair. Mr Chair mon kestyon pou SS Payet. SS mon'n konpran ou'n dir poudir sa formalite pou bann *foreign loan* i en pti pe long son prose.

Me *what about* bann ki ti'n deza konmans depanse? Mon donn en legzanp parey kot lekol Plaisance primer ti deza annan en miray, ki ti pe benefisyé anba sa bann *Grants*.

E i pa'n ganny sans fini pou plizyer rezon. I annan sa 3 *lane* semen ki Gouvernman napa finans pou fer. Sa *issue* trafik e sekirite pou bann zanfan la kot sa lekol, kot i annan sa bazar vizavi *Fresh Cut*.

So bann proze parey ki ti'n deza konmans ki pou arive avek eski i pou fini? Gouvernman pou pran en desizyon lo la pou fini sa bann proze, oubyen li osi i pou ganny zis abandonnen koumsa menm? Mersi.

MR SPEAKER

Mersi. Wi SS.

SS PATRICK PAYET

Mersi Mr Chair. Mersi Onorab. Mr Chair si en proze in konmans, definitivman nou pa pou kapab aret li dan semen akoz premyerman si in fini *tender* i annan en kontra, ou pa kapab aret li dan semen.

Sirkonstans kekfwa en proze kapab arete si i annan en lenpak lo en lot proze. Par egzanp mon konnen dan diskisyon dan avek Minister Ledikasyon lo kote Plaisance, lo kote sa miray.

I annan lenpak osi ki nou pe fer lo diskisyon *any* konmans nou konmans sa proze nou

bezwen mazin sa *roundabout* ki *SLTA* i anvi fer *Plaisance*.

So sanmenm sa ki nou pe met tou dimoun lo latab, pou fer sir ki *at least* letan zot konmans sa proze, i pa ganny arete. Akoz *once* ki ou konmans enn ki manner lenpak ki i annan lo lot.

So definitivman si bann proze in fini konmanse, ouswa i annan enplimantasyon, non larzan pa'n ganny tire pou fer sir ki *at least* zot fini konplet sa legzersis a proze. Mersi.

MR SPEAKER

Mersi. Nou'n termin lo sa seksyon. I reste nou *E, F, ziska H*. Zot ava regarde zot ava vwar bann *item*. Mon pa ava repas lo tou.

Bon i annan bann keksoz parey '*Subvention to public enterprises,*' – '*Benefits and approved programmes of ASP*' and so on. Lekel ki - ? Tre byen ok Onorab Gill.

BENEFITS AND APPROVED PROGRAMMES OF ASP

HON CHURCHILL GILL

Mersi Mr Speaker. SS mon kestyon i lo *disability benefits*. Pou sa 14milyon, dan son *description* ki'n mete leksplikasyon, i dir la zot pe met sa 14milyon, lezot sonm ki zot

pou bezwen, zot pou tir *from other votes*.

Mon lenpresyon lo sa latab ki ou'n donn nou, sa total 303 milyon se en sonm ki *basically* ou'n *beat the ceiling*. Ou'n ariv dan *ceiling*.

Si ou kapab donn nou en nide, ler zot dir *from other votes*, ki bor pou sorti sa bann *votes*? Akoz tou *votes* la in fini *allocate* i tonm R303 milyon. Sa mon premye.

Aprè mon dezyenm i lo sa *subscription to international organizations*. Mon rapel ler nou ti pe diskite Bidze ankor pou 2021, nou ti ganny dir ki pou annan i annan en revizyon. Ou ti fer nou konpran ki i annan en revizyon ki sipoze ganny fer, en keksoz ki mon ti demande depi sizyenm Lasanble.

Me la *still* i annan ankor R16milyon ki pe ganny mete pou peye. Eski sa revizyon in ganny fer? E ler in ganny fer eski rezilta se nou'n vwar nou'n bezwen ogmant nou bann souskripsyon? Oubyen i pa ankor fini, nou ankor pe pey lo sa lalis ki nou ti annan avan? Menm si nou pa pe benefisyè 100poursan lo tou konponan sa lalis? Mersi.

MR SPEAKER

Mersi SS.

SS PATRICK PAYET

Mersi Mr Chair. Mersi Onorab pou sa de kestyon. Mr Chair premye kestyon lo kote *disability benefit* ; - kekwfa deskripsyon ki nou'n mete nou pa *anticipate* pran li dan bann laliny ki devan nou ozordi, dan bann laliny ki nou pe fer *appropriation*.

Me selman ki nou'n dir dan laliny *Benefits and approved programme of ASP* ki ti'n fini ganny *appropriate*. Dan lo sa bann laliny dan son Bidze, i annan bann diferan *budget line*. Par egzanp *retirement benefits, invalidity benefits, home carer Unemployment Relief Scheme, SPTC travel konsesyon*.

So nou pe vwar en pe baze lo *retirement benefit* ouswa bann lezot laliny, ki kekwfa *the full year implication* nou pe vwar bann *savings* en pe partou, ki kapab servi aprezan pou met sa ladiferans. *The same vote Benefits and approved programmes*.

So i pa bann lezot laliny dan *goods*, dan *wages*, me selman dan sa laliny.

Lo kote *Subscription international organization*, Mr Chair zis pou mansyonnen ki nou'n konplet en legzersis avek Departman *Foreign Affairs*. Aktyelman apre midi nou

annan en *meeting* avek zot pou pas lo sa dokiman avan ki nou soumet li avek *Cabinet of Ministers*, pou pran en desizyon avan nou finaliz Bidze 2022.

Me selman zis pou mansyonnen ki dan sa legzersis ki nou'n vwar, nou annan nou 176 *different subscription* ki nou peye. Sanmenm sa ki nou bezwen sa larzan adisyonnèl. E ladan bann legzersis ki bann Minister in fer, i annan total apepre 10 *international organization* ki nou *anticipate* pou retire.

Me selman apre Minister Finans in fer en lot legzersis ankor, nou'n vwar ki i annan en pe ankor ki nou anvi propoz *to Cabinet*. Sa premye 10 i en lavalèr apepre 1milyon Roupri. Me selman bann lezot ki nou'n vwar ki apepre 5 a 6milyon Roupri.

Me selman *at the end of the day* i en diskisyon ki nou pou gannyen avek *Cabinet of Ministers* avan ki nou kapab annan en desizyon lo la.

Zis pou mansyonnen ki letan ou regard bann *total 'Subscription international organization'*, ladan zis lo kote apepre 21 zot son total i *almost 31million*. Savedir nou pe koz par egzanp *AU, Common Market COMESA, SADC*, tou bann lezot

i annan apepre zis 21 zot ki *almost 31million*.

So i montre ou ki manner in monte e ki kantite sarz sa bann *international organization* pe sarz nou.

E nou nou'n fer en legzersis pou nou revwar dan son totalite ki benefis nou pe gannyen osi. Mersi.

MR SPEAKER

Onorab Cosgrow.

HON WALLACE COSGROW

Mersi Mr Speaker Mr Chairman. Mr Chairman mon keston i an relasyon avek '*Benefits and approved programme ASP.*' 14milyon pe ganny mete dan *disability benefits*.

Mon ti a kontan zis demann SS, ki zistans nou ete avek sa reform ki ti ganny anonse pou bann *social programmes (ASP)* sa enn ki *World Bank* pe asiste pe finanse? E ki manner sa i kapab *improve* sa kantite larzan ki nou pe servi dan sa bann diferan laliny, enkli *disability benefit*? Mersi.

MR SPEAKER

Mersi Onorab. SS.

SS PATRICK PAYET

Meri Mr Chair. Mersi Onorab. *The enplimantasyon sa proze li menm i ongoing.*

Mon konnen nou'n fer bokou travay lo sa Komite. I annan en Komite ki *meet* tou le mwan. Par egzantp lo kote *disability benefit* premye se definisyon ki nou ti pe servi avan, pou fer li anliny avek *WHO – (DAS)*.

So sa en pe zot striktir ki zot pe sanze. E osi ki manner nou kapab armoniz en pe *the* sa *Board* ki egziste ozordi. I annan 2 *Board*, i annan en *Board* par egzantp kot Fon Pansyon, apre i annan en *Board* kot ASP.

So nou bezwen armoniz en pe. Nou annan en sel *Board* ki *at least* letan i pran desizyon nou kapab swa sa *Board* in pran desizyon, pran donn sa *disability benefit through ASP* e osi lo kote Fon Pansyon. 4

e osi ki manner nou kapab travay annan sa *social registry system in place* ki pou fer sir nou pa pe met bann striktir an plas ki pou fer bann endividi al kot bann diferan Minister pou ganny diferan lasistans.

So dan *social registry once* ki ou bann lenformasyon ki sa bann dimoun pe ganny lasistans *through ASP*, Minister Lakaz i kapab servi pou donn lasistans si *through Housing*.

Ministry of Family Affairs osi i kapab servi pou fer sir ki *at least* sa bann dimoun i ganny plis *targeted*.

So i en reform ki pe kontinyel. Me selman i annan travay ki'n konmanse e dan diskisyon avek *World Bank*. Me selman a tou staz sa proze, nou pou vin devan e nou pou diskite avek bann diferan kous popilasyon osi, pou fer sir ki letan nou konmans enplimant sa proze tou dimoun i okouran e tou bann *MDAs* i okouran ki manner zot, zot sipoze *fit in*. Mersi Mr Chair.

MR SPEAKER

Onorab Bistoquet.

HON ROSIE BISTOQUET

Bonzour M r Speaker. Mersi Mr Speaker. Bonzour Minis avek ou delegasyon (*SS sorry*).

SS mon ti oule demann de pti keston. I annan sa bout lo *tax exemption* ki 13milyon e sa i kouber bann *reduction and claims*. Si ou kapab donn nou en leksplikasyon lo la?

Aprè i annan *contingency for Health Care Agency* pou *COVID expenses* i tre zeneralize, vi ki annan apepre en 2.7 milyon, eski akòz sa i lafen pou sa lannen vi ki zot annan *strategy plan short term*? Eski ou kapab eksplik nou anba sa

Funds ki si sa, sa zot pou depanse? Mersi.

MR SPEAKER

Meri Onorab. SS.

SS PATRICK PAYET

Mersi Mr Chair. Mersi Onorab. Lo kote *tax exemption* mazorite nou annan bann *claim* ki ;- par egzantp i annan bann sirkonstans *because of* lasarite . Par egzantp letan par egzantp letan nou ti annan *Regatta* ki zot ti pe fer en pri ki zot ti pe ganny *sponsorship*. E parey ou konnen letan ou pe *purchase* en kar mete en lakonpanyen pe donn ou sa loto. I annan son *tax component* ki nou peye.

So ladan ki Gouvernman ti met en pe bann kontribisyon, me selman letan nou'n vwar ki bokou aktivite pa pe ganny fer sa lannen, ouswa bann lezot proze ki nou vwar ki bann lagreman ki Gouvernman in sinyen avek bann *loan* ki i pran. E tousala nou vwar akòz enplimantasyon proze i en pe *slow*. Sanmenm sa ki kekfwa nou'n bezwen retir en pe sa larzan.

Lo kote *contingency* mazorite ti pe vin lo kote depans pou Minister Lasante, sirtou lo kote sirtou lo sityasyon *COVID*. Menm si nou ti annan sa *COVID Fund*, me selman la dan *COVID*

Fund, me selman dan *COVID Fund* ti reste apepre 8milyon, me i annan bann lasistans ki spesifikman pou al dan administrasyon, ki ti relye avek *COVID*, nou ti pe servi *contingency*, me sepandan dan *COVID Fund* nou ti pe servi pou nou aste bann spesifik lekipman.

So sa i en pe bann depans ki nou fer dan *contingency* apard ki bann lezot depans irzan me selman pou sa lannen i ti pou mazorite *for COVID related expenditure*. Mersi.

MR SPEAKER

Mersi SS. Onorab Pillay.

HON SEBASTIEN PILLAY

Mersi Mr Speaker. Mr Speaker mon oule rebran sa premyerman kestyon lo *disability benefits* mon krwar nou napa eleksyon sa lannen. So nou pe met larzan dan *disability benefits*, so sa largiman ki sak fwa eleksyon nou met larzan dan *disability benefits*, fotespere Seselwa deor pe ekoute *ok?*

Sa lannen nou napa eleksyon me selman i annan larzan ladan. Mon kestyon, ki vremen relevan e enportan. Gouvernman in propoz en bann *review* partou pou fer koupir.

E ler i ti vini nou, nou ti argimant kont *review* ki pe propoze vizavi lenformasyon ki i ti annan sa letan pou li al propoz sa sonm ki ti pe propoze. In antete in ale, e la ou vwar ou met en rezon, ou dir koumsa, "*based on 15 hundred beneficiaries in view of expected reforms.*"

Me selman *due in payroll amounts to 11.7 million with 1960 beneficiaries*.

So kestyon pou ou se ki eski pou *still* annan 1960 apre sa *review* ki sa sonm pou desann?

Oubyen eski i riske annan ankor *beneficiaries* ki'n ganny azoute ki fer ki largiman ki nou'n toultan dir ki ou pa kapab pran *disability benefits* met li ansanm avek - e sey fer en sel largiman sey fer dimoun krwar poudir Gouvernman avan ti zis donn, donn *welfare*. Sa i en rezon eksetera.

So eski ou kapab klarifye sa pou nou, akoz la nou bezwen met R14milyon adisyonnal.

Prezan an relasyon avek sa *disability benefits*, eski ou pe reasir nou ki lafason ki bann dimoun ki otreman kapab, pou ganny akse ek servis ek benefis, pa pou vin restriktir ki ava fer sa bann dimoun ganny difikilte pou zot ganny siport ki zot

bezwen, ler zot bezwen li? Sa i mon premye kestyon.

Mon dezyenm kestyon Konstitisyon i prevwar poudir anba lartik 156 ki nou annan en *Contingency Fund*. Mon pa konnen si nou pe koz menm *contingencies* la.

Konstitisyon u osi prevwar ki si i annan en depans ki in ganny fer anba *Contingency Fund*, nou bezwen regilariz li.

An relasyon avek *COVID* nou pe fer depans dan diferan landrwa. Nou pe fer depans anba *Health Care Agency budget*. Nou pe fer depans anba *COVID Fund* e la nou pe fer depans anba *Contingency*.

Eski ou kapab dir nou a sa moman konbyen larzan nou'n depanse, anba *Contingency Fund* pou *COVID*, e akoz ki dan sa enn Bidze nou pa pe regilariz okenn depans ki'n ganny fer anba *COVID*, akoz la nou pe met larzan adisyonnèl an relasyon avek *COVID*?

E mon dernyen kestyon e an relasyon avek sa *PUC on lending* mon pa konnen si sa i afekte sa *33KV* proze ki'n la pou en bon pe letan.

Eski sa *on lending* prezan li in ganny *move* pou lannen prosenn? E prenon kont ki la nou annan *fluctuation foreign exchange*. Eski alor nou pe prevwar ki sa pou annan en

logmantasyon dan sa *on lending*. Mersi Mr Speaker.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Premye kestyon lo kote revè, nou pe get li dan sirkonstans dan totalite, pou nou fer sir ki bann benefis ki nou donnen ouswa bann program ki Gouvernman i donnen, i *small targeted* ki dimoun ki bezwen.

So sa i en program ki nou pe travay avek Labank Mondyal. Pou par egzant en keksoz ki nou'n vwar ki letan nou pou'n met sa *WHO - DAS* pou evalye bann dimoun ki bezwen benefis anba envalidite, en keksoz ki nou bezwen mazinè par egzant souvandfwa kekfwa en dimoun i annan en sirkonstans medikal, kekfwa i pa kapab fer en *particular* travay.

Me selman nou vwar ki i pe ganny lasistans pou lemoman. So pou nou en diskisyon ki nou pe gannnen, si sa dimoun eski sa dimoun pa kapab fer en lot travay ki i kapab fer, ouswa sa dimoun i pa kapab fer okenn travay?

So sa i en pe bann diskisyon ki nou pe gannnen avek bann profesyonnel. I pa

zis Minister Finans i Departman Sosyal, e osi Minister Lasante, *Family Affairs* i en *team effort* ki nou pe vwar baze lo bann kriter.

Me selman nou pe fer sir ki *at least* bann servis, bann program bann benefis, i *more accessible*, pou nou bann pou nou popilasyon e *it's more targeted* sa avek *the aim*.

Me selman i en diskisyon nasyonal ki nou pe ki pou arive *once* ki nou annan en propozisyon pou met devan lo la.

Lo kote *Contingency* mon konnen dan Konstitisyon i annan en provizyon *for Contingency* sanmenm sa ki souvandfwa sa *Contingency* ki egziste anba Konstitisyon, nou pa ti anvi tro servi, akoz tou le lannen nou ti bezwen retourn dan Lasanble pou demande pou *replenish* sa fon.

Me sependan ki nou ti fer dan Lalwa *Public Finance Management* 2012, nou ti met en provizyon osi pou kapab kouver en *Contingency Fund* e ladan se seksyon 10 *PFM Act* 2012 nou ti dir ki *the Minister* seksyon 10 (3) "*the Minister may include in the budget a contingency appropriation which shall not 3% of the total amount of appropriation in the proposed budget.* "

So nou ti fer sir ki *at least* pou nou kapab anpes sa *replenishment* arive par Konstitisyon, nou ti met dan sa provizyon ki pou fer sir ki nou annan en *contingency appropriation* dan Bidze. E si i arive ki nou bezwen larzan an plis, lanmenm la ki nou met sa larzan adisyonel dan Bidze siplemanter.

Me pou reponn kestyon spesifik lo kote *COVID related expenditure*, anba *Contingency so far* nou'n depans 22 milyon e anba *COVID Fund expenses* nou'n depans 706milyon ki fer en total 92.6 milyon *to date for COVID related expenditure*.

Lo kote trwazyenm kestyon lo kote *PUC*, kekfwa mon ava pas laparol avek Ms Tamatave i ava reponn ou kestyon Onorab. mersi.

MR SPEAKER

Yes madanm.

DEPUTY COMPTROLLER GENERAL ASTRIDE TAMATAVE

Mersi Mr Chair. Mersi Onorab. anba *net lending* pou *PUC*, *PUC* i annan 3 *major project* ki i annan. I annan sa 33KV. I annan La Gogue.

Sa letan nou ti prepar Bidze nou ti fer provizyon \$21.7 milyon pou depans lo lannen

2021, me baze lo *delay* ki *PUC* in rankontre dan son bann proze, son prozeksyon pou fini lannen i apepre \$12.1milyon ki pou depanse. E sa bann lefe natirelman i ganny bouze dan Bidze 2022. Mersi.

MR SPEAKER

Onorab Pillay wi annou sey terminen.

HON SEBASTIEN PILLAY

Mersi Mr Speaker. Mr Speaker mon oule zis aport latansyon SS. Lartik 156 i zisteman tyer provizyon ki ou annan en fon. Ki anba *appropriation* ler nou met li - akoz sak *head* i annan son larzan e Gouvernman pa kapab varye sa bann *heads* san ki i vin kot Lasanble. Akoz sa i ti retenir kontrol Lasanble.

PFM Act ti donn zot sa ki ou vwar zot *basically* en *petty cash*. Be *still* selman sa *petty cash* i egziste dan en *ambit* Lartik 56. E i annan en *accountability system* ki egziste dan kwa ki ganny depanse anba sa *fund*. 22milyon in ganny depanse anba *COVID Fund*.

Eski ou dan en pozisyon pou dir nou ki bann lezot depans ki in annan anba *Contingency*? E *just to remind you* mon ankor *still* pe esper sa *buffer* ki sipoze egziste avek *Local Government* an relasyon

avek bann proze ki konsern bann proze *Local Government*.

So eski ou kapab donn nou detay lo konbyen larzan ki'n ganny depanse lo bann diferan *major line items* anba *contingency*, e pou nou kapab konnen *in terms of oversight* kwa ki pe ganny depanse vremen dan lespri Lartik nou Konstitisyon. Mersi Mr Speaker.

MR SPEAKER

Thank you. SS.

SS PATRICK PAYET

Mersi Mr Chair. Mersi Onorab. definitivman e nou kapab fer Lasanble ganny en detay detaye lo sa ki nou'n depanse anba *Contingency Fund*.

E an menm tan plis ankor mon konnen nou ti *share* ek Lasanble lo sa *COVID Fund* bann depans e nou ava donn zot en *up-to-date* lenformasyon lo sa *COVID Fund* osi depans detay. Sa i *ok* Mr Chair nou ava fer Lasanble gannyen apre midi. Mersi.

MR SPEAKER

Good.

SS PATRICK PAYET

Lo kote *Local Government*, Ms Tamatave i ava zis mansyonn sa *data* en pti kou. Mersi.

MR SPEAKER

Wi Ms Tamatave ou ava azoute.

**DEPUTY COMPTROLLER
GENERAL ASTRIDE
TAMATAVE**

Mersi Mr Chair. Mr Chair dan Bidze 2021 pou *Local Government* son konponan lokal, ti en sonm R26.3milyon ki ti ganny bidzete. E dan letan nou'n fer sa koupir 2.5milyon i reste li R23.8 milyon.

As July nou dernyen *fiscal report* ki nou annan, *Local Government* in depans R8.8 milyon. Savedir i annan sifizaman Bidze ki reste li pou li kapab pey bann depans ki pou vini ziska lafen lannen. Mersi.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Mr Chair, *anyway* enn mon kestyon in fini *sort out* zafer *Contingency*. E nou ava esper SS ek sa dokiman apre midi.

Me selman lo kote sa *buffer* ki SS in dir zot met en kote, mon ti krwar zeneral mwan. Me letan mon pe ganny en konpran zis pou *Local Government* sa.

Parski ki mon pe vwar, si mon vir en paz an ayer lo kote

NSC mon vwar i annan en problemm kot zot in koup R5 milyon dan son Bidze ki ti sa.

E mon vwar poudir '*delay*' pou enplimant proze. SS akoz mon pe re anmenn sa lo latav, parske an se moman la nou konnen poudir nou annan leokri ki *Palais des Sport* i koule.

E larzan ti'n ganny mete pou prepar *Palais Des Sport*. E proze pa'n ganny enplimante.

Prezan nou pe antre dan en sezon lapli la. *Ok* Lasante in ouver pou annan serten aktivite spor san spektater. Me prenon kont ki *Palais Des Sport* li i koule li.

Nou pou antre dan sezon lapli. Si i arive ki sa proze i ganny anmenn devan, eski dan sa *buffer* mon ti pe demande, eski pou kapab ganny fer dan sa *buffer* ki ou'n dir zot in met en kote? Parske zot in deza koup 5 milyon dan sa Bidze. Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Akoz ki nou'n fer li *specific* kekfwa for *Local Government*? Akoz *Local Government* i annan bann bokou pti proze ou kapab dir, ki fer li en pe difisil ennlér

pou kapab kekfwa regard li dan totalite.

Me selman letan ou regard bann gro Minister. Annou pran legzanp *specific* parey in dir NSC, zot napa sa kantite proze.

So i pli fasil pou ou konnen ki *phase* zot ete avek sa bann gro proze, e ki lenplimantasyon zot kapab fer dan *next 3 to 4 months*.

Par egzanp letan ou regard dan NSC la, nou ti donn li en Bidze 8milyon ziska la i pa ankor depans okenn larzan dan son proze. Me selman sanmenm sa ki nou'n tir sa 5 milyon.

Aprè an menm tan lannen pase akòz zis pou li pa perdi nou ti'n met larzan dan *Suspense Account* osi, pou en bann proze spesifik pou zot kapab sirtou lo kote *swimming pool*.

Me selman nou kapab diskite avek NSC spesifik parey ou pe dir *Palais des Sport* pou vwar ki mannyer nou kapab regarde lo ki mannyer nou kapab konmans sa proze en pe pli irzan, baze lo larzan ki annan.

Me nou ava diskite en pe lo avek NSC. Mon konnen sa i en konsern osi ki *Cabinet* osi in met devan. Mersi.

MR SPEAKER

Mersi. Onorab Aglae.

HON EGBERT AGLAE

Mersi Mr Chair. SS kot i konsern APDAR la, i annan sa larzan ki'n ganny revize, mon ti ava kontan petet eklersi nou en pti gin ki zistans, akòz nou'n arive kot i konsern sa *Rehab Centre*?

Akòz mon konpran poudir i annan enn de pti vatevyen lokasyon. Eski nou ankor lo menm plan, ouswa i annan en gran revizyon ki pe bezwen ganny fer pou sa?

Aprè lo kote SPTC, mon konnen Minis ti'n vi eksplik bann diferan senaryo avek sanzman bann pri bis pou redwir en pe lenpak sa sibvansyon.

Petet SS vi ki pri pou pran lefe an Oktob si mon pa tronpe, petet son retonbe li menm fas a sa demann *shortfall* ki zot pe demande la, ziska lannen prosen. Mersi.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. lo kote APDAR mon konnen ki diskisyon ki ti pe gannyen avek *the donor*. Premye site ki zot ti ofer *the donor* pa ti tro satisfè. Sanmenm sa ki en diskisyon ti pe diskite lo en *alternative site*.

An menm tan baze lo la ti pe revwar son plan li menm an zeneral.

Me selman nou kapab *find out* avek Minister konsernen pou vwar ki zistans sa in arive, diskisyon si zot in kapab terminen *before* kekfw zot kapab diskit avek bann lezot *stakeholders*.

Selman ti prensipalman akoz sa premye *site* ki zot ti'n ofer e *donor* li pa ti dakor avek sa premye *site*.

Lo kote *SPTC* sa larzan ki nou'n mete i an diskisyon avek *SPTC* avek Departman Transpor. Si par egzanp nou ti kit sikonstans parey, nou ti pou bezwen dan plas 27.4 milyon met en adisyonnèl 40 milyon adisyonnèl.

So sa i baze lo lenplimantasyon sa ogmantasyon pri bis le 1 Oktob, sa *shortfall* ki pou annan. Mersi.

MR SPEAKER

Mersi. Onorab Labonte.

HON ANDY LABONTE

Mersi Mr Speaker. Mr Speaker. mon keston in deza demann en bout par Onorab Aglae. Me selman petet mon ti ava kontan SS i donn en pe plis detay.

Akoz vi ki nou ti tande lo televizyon ki i annan serten

parti politik ti pe konplent dir konmsi nou pa pe sibvansyon *SPTC*.

So parey ou'n dir la poudir, si nou pa ti met sa 27 milyon 400mil nou ti pou bezwen met nou 40 milyon.

So i vedir dan Bidze ti deza vote boner sa lannen, nou ti'n deza met en sonm. Si petet ou kapab fer li pli kler konbyen total ki Bidze Gouvernman in *cater* pou sibvansyon *SPTC* pou sa lannen? Mersi SS.

MR SPEAKER

Mersi Onorab. SS.

SS PATRICK PAYET

Mersi Mr Chair. Mersi Onorab. Dan diskisyon si par egzanp pri ogmantasyon pa ti pou arive le 01 Oktob, nou ti bezwen met dan Bidze 90milyon.

E *actually* dan Bidze pou sa lannen nou ti met 50 milyon. So nou ti bezwen met sa adisyonnèl 40milyon.

Me avek sa logmantasyon le 01 Oktob, nou deza annan dan Bidze 50milyon. E avek sa adisyonnèl ki nou pe propoze 27.4milyon i pou fer li en total R77.4milyon an total ki Gouvernman pou *still* sibvansyon me selman sa pou redwir lannen prosenn osi. Mersi.

MR SPEAKER

Mersi SS. Avek sa nou'n termin kestyon lo *Supplementary Budget*. Mon remersye bann Manm pou zot bann kestyon tre asidi. Me sirtou mersi SSek zot ek ou zofisye pou en reprezantasyon tre kler.

Nou ava remersye zot e nou ava dir zot bonn apre midi e bonn kontinyasyon travay.

Pou Manm mon krwar nou ava pran poz la e nou ava zwenn 2er edmi pou deba e annou dir annou dakor ki Komite ki'n previ pandan *lunch break* i ava ganny retar par en demi erdtan. Savedir sa ki ti 1.15 i ava vin en 1.45.

Tre byen mersi bokou. Nou ava pran poz. Mersi.

(BREAK)

MR SPEAKER

Bonn apre midi tou dimoun. Mon ava demann *Sergeant-at-Arm* pou nou retourn dan Staz Lasanble, pou nou kontinyen e nou ava ouver lasal pou deba lo Mosyon pou *Supplementary Budget*. Manm ki oule entervenir. Tenir en pti moman mon ava pran sa ki i annan la.

Byen mersi. Mon ava zis repas lo lalis pou verifye. Mon annan Onorab Monthy, Hoareau, Bistoquet, Labonte, Labrosse, Lemiel, Aglae, Gill,

Vidot, Gabriel, Cosgrow, Uranie, avek Onorab Pillay e Onorab William, e Onorab Woodcock. Byen mersi. Mon pou Onorab Arissol.

Mon konnen zot ava realize letan i en pe soz nou oule fini apre midi. Mon ava envit bann Manm pou limit zot lentervansyon pou 10 minit apepre. Mersi.

Bon be la mon'n napa okenn lord lekel ki'n lev lanmen avan, alor mon pou balans le de kote. E les mon konmans kote isi dan milye mon ava konmans avek Onorab Vidot.

HON AUDREY VIDOT

Mersi Mr Speaker. Mr Speaker bomaten nou'n ganny sans ekout bann repons, bann kestyon an referans avek sa siplemanter ki Mosyon ki Onorab Georges in anmennen.

Mon pwen lo sa bann deliberasyon lo sa Mosyon, se ki nou'n vwar kot Gouvernman in montre nou poudir zot in met plizyer finansman pou dan diferan Departman, pou ki i annan bann *recruitment* dan serten pozisyon kle.

Me malerezman nou pa'n vwar okenn sa bann *recruitment* ki pou ganny fer, larzan pa'n ganny depanse. Pa vreman i annan en *savings* me i sa larzan i la nou kestyonnen si prezan

dan nouvo Bidze ki pou vini ki Gouvernman pou vin avek, eski sa bann pozisyon ki plizyer repriz nou'n vwar sa bann departman in montre poudir zot anvi fer *recruitment*, zot anvi serten Departman bouze marse. Pou ki bann travay i ganny fer i fonksyonn byen.

Me malerezman nou pa pe vwar sitan lespwar an term si vreman sa ban *recruitment* pou ganny konsidere. Nou'n vwar poudir i annan en kantite Bidze ki'n ganny koupe. Me selman parfwa i mank serten plis leklersisman an term kote vreman, e lo ki baz ki sa bann koupir pe vini?

Nou ti tann dir poudir Gouvernman pa pou fer okenn restriktirasyon. Me apre parol in ganny sanze, nou'n vwar poudir Gouvernman pe fer restriktirasyon. I annan en kantite dimoun pe ganny fer arete travay.

Me parkont i annan serten landrwa ski zot, zot pe dir kle. Me selman *still* zot pe fer serten *recruitment*, zot dir zot pe redwir lafors Gouvernman.

Me napa ankor lasirans bann travayer servis piblik ki vreman zot pozisyon dan sa reform ki Gouvernman pe fer. Dimoun i annan lenkyetid la deor an term zot louvraz. Baze lo bann restriktirasyon lo bann

reform, ki Gouvernman pe konsidere pou fer.

Nou'n vwar poudir Gouvernman parfwa zot dir ou dan sa enn nouvo Gouvernman ki la. parfwa ou demann kestyon, ou dir si ou pa ti dan sa soulye, ou pa konnen vreman ki mannyer keksoz i ete.

Zot ti dir poudir letan bann *rent* zot pou revwar bann revizyon bann *rent* pou fer sir ki Gouvernman pa pey bann pri egzorbitan, pou fer posibilite pou kapab redwir sa bann kou *rent* ki egziste ozordi.

Me nou pe vwar poudir dan zot dan sa diskisyon bomaten, malerezman bann negosyasyon, bann travay ki zot pe fer pa vreman realite parey zot ti toultan krwar e koz for lo la.

Nou'n dir poudir dan bann program pou bann aktivite pou rezon pandemik, i annan bann resours ki pa'n ganny servi.

Me parkont i annan bann program ki pe ganny neglize, pe enport si i annan en pandemik i annan keksoz ki ti kapab ganny itilize pou ganny akse avek finansman, pou fer serten program.

Nou bezwen mazine poudir letan zot pe limit serten sa bann aktivite lo nivo

kominoter, nou konnen ki bann lenpak lo nivo sosyal i annan e i anmennen lo nivo distrik.

Nou'n tann disolisyon bann *Board*. Nou zis kestyonnen eski bann disolisyon bann *Board* ozordi menm si Gouvernman in retenir sa bann finansman, eski sa bann plan bann gran stratezi, bann gran plan ki zot annan, pou fer sa bann program sa bann diferan Konsey ki ti egziste pou kontinyelman fonksyonnen, dan ki fason?

I ankor *still* pa kler ozordi i annan en kantite sa bann konsey ki bann ki ankor la sa bann dimoun ki pe fer marse, volonterman pou fer marse sa bann diferan program. Malerezman zot pa pe vwar sipor.

I annan en kantite pe konplent e ankor i vin en kestyon lo disolisyon sa bann *Board*. Travay kwa ki siport zot an term Gouvernman e pou zot kapab fer marse pou get sa bann diferan program ki egziste.

E ankor enn fwa nou vwar poudir lenplimantasyon bann *Grants* ozordi, i annan menm si nou'n ganny dir poudir sa striktir i en pti pe konplike e i pran bokou letan pou kapab enplimant serten proze, nou vwar poudir i annan serten

proze ki ti kapab ganny fer fini, me malerezman nou ti ganny dir poudir sa enn Gouvernman ki la i pa la pou li trenn lipye. Zot la pou fer keksoz marse.

Me malerezman nou santi i ankor *still* annan landrwa ki ankor pe trenn lipye zot ti kapab fer bokou pli byen. E fer sa bann proze konplete montre poudir vreman zot kapab, fer bokou, bokou pli byen ki sa.

Me malerezman zou pa pe vwar leka. So vwala mon bann pwen ki mwan mon'n anvi touse atraver sa Mosyon. E mersi pou zot latansyon.

MR SPEAKER

Mersi Onorab Vidot. Mon ava apel Onorab Labrosse.

HON RICHARD LABROSSE

Bonn apre midi Mr Speaker. bonn apre midi tou dimoun isi prezan e bann ki pe ekout nou dan lakour ouswa dan travay nou dan Sesel dan lemond antye.

Mr Speaker, dabor mon ti ava kontan dir ou mersi pou donn mon laparol pou dir de mo lo sa Mosyon ki devan nou.

Ozordi devan nou i annan en Mosyon sorti kot nouvo Gouvernman dizour ki pe demann Lasanble pou aprouv en Bidze siplemanter.

Mr Speaker, ler mon'n al dan bann dokiman ki mon'n ganny sans lir, mon'n vwar en gran zefor ek disiplin ki laplipar Minister in etabli. Mon'n kapab vwar en zefor dan koup depans e pli enportan se gaspiyaz ki'n redwir.

Mr Speaker sa ki mon'n osi konstate ler mon pe get sa bann dokiman, bann re alokasyon sa Bidze in ariv avek bann striktir ki'n sanze. E sa ki ankourazan osi Mr Speaker, kantmenm Gouvernman pe vin demann en Bidze siplemanter apepre 304milyon, sa ki ankourazan pou vwar, se ki Gouvernman pe osi demann en pli gro koupe dan ki pa'n zanmen arive sa i en sonm 1.4 milyon plis ki 4 fwa ki sa Gouvernman ti pe demande konman Bidze siplemanter.

Mr Speaker, en keksoz osi ki mon'n osi note dan sa dokiman se plis bann lorganizasyon i annan bann pos ki ankor *vacant* parey in ganny dir.

Mr Speaker mon rekomande ki en *assessment* i ganny fer pou rode aköz ki serten pos pa ganny ranpli. E ki zefor ki Gouvernman ansanm avek bann Minister parey ANHRD e Departman Lanplwa, i travay ansanm pou met an plas sa ki nou apel '*Strategy*

human resources management and planning.'

Sa i ava ede pou redwir sa bann *savings* ki apre nou pou bezwen vwar li pe vin ganny koupe ankor.

Mr Speaker, si i annan *vacant post* Mr Speaker i vedir ki Gouvernman pa pe kapab osi donn sa servis parey i ti ava voudre, pou serten lorganizasyon.

E sa i fer mon konpran aköz ki dan serten lorganizasyon, dimoun i ankor pe santi zot dekouraze menm fristre avek servis ki zot pe gannyen.

E dan menm laliny la mon ti ava kontan dir Mr Speaker, ki mon krwar osi ler nou pe koz lo *recruitment*, nou osi pe mazin *reskilling*. Seselwa in demann sanzman 2020 mon krwar lafason fer osi i merit mars parey.

La osi Mr Speaker, dimoun dan prive osi ki i annan en lentere avek kapabilite pou travay dan Gouvernman, ava santi zot ganny sa loportinite pou ganny *train* dan bann *field* spesifik ki Gouvernman i annan mankman ladan a se moman.

Mr Speaker, anba byen e servis nou'n vwar en zefor pou koupe, e Mr Speaker mon swete ki sa bann koupe i osi ganny reflekte dan Bidze 2022

ki byento pou vin dan sa Lasanble.

Mr Speaker anba bann proze kapital in montre ki fodre annan en pti pe pli bon planifikasyon osi. Lo laliny Mr Speaker yer nou'n osi isi dan sa Lasanble nou'n fer Speaker yer nou'n diskrit isi dan sa Lasanble, ki dimoun osi pe espere la deor lo sa bann ka koripsyon ki'n ganny masyonnen a plizyer repriz.

Sa i bann ka sa i bann ki apartyen a lepep Seselwa. Mr Speaker lespwar deor se ki sa bann larzan i ganny tournen dan sistenm finansyel Sesel sa pou ede ki Gouvernman i avogmant son reveni.

Ki ava soulaz det pei, e i ava retourn lo sa pa e de pli soutenab pli vit Mr Speaker.

Alors Mr Speaker i enportan ki mon kapab dir mon bann koleg lot kote latab silvouple donn nou lanmen pou fer rann Cesare sa ki apartyen pou Cesare.

Lo kote pri lavi e bann komodite esansyel Mr Speaker. la mon mazin parey delo, elektrik ek bann komodite debaz e bann fanmir pe ankor vwar zot pe ganny difikilte pou fer de bout zwenn, me ler mon ekout sa nouvo lekip kot *STC*, mon napa okenn dout dan zot travay ki zot pe fer.

I montre konfidan ki dan sa bann mwan ki pe vini, nou kapab espekte vwar ankor rezilta pozitiv.

Menm mon'n konmans vwar bann sanzman lo *TV*, bann *advert* ki zot fer lo sa (*RRP*) ki plizyer lezot biznes osi pe enplimante.

Mr Speaker i enportan pou masyonnen ki nou tou nou osi nou merit konnen en pti pe pli nou priyorite, nou merit osi viv selon nou mwayen.

E sa i enkli pou Gouvernman osi kapab depans dapre sa ki i annan.

Mr Speaker lo sa not, mon oule remerci Minister Finans pou sa prezantasyon detaye ki zot in fer sa semenn e de semenn pase lo revi Bidze. Bokou dimoun in apresye sa legzersis byen ouver.

E alors pou terminen Mr Speaker, mon pou donn mon sipor pou sa Mosyon. Mersi.

MR SPEAKER

Mersi Onorab Labrosse. Mon ava apel Onorab Gabriel.

HON CONRAD GABRIEL

Mersi Mr Speaker. nou'n ekout bann deliberasyon bomaten. Lefe ki Gouvernman son priyorite prensipal se pou garanti ki redwir fiskal. E pou arive fer sa nou bezwen redwir

depans labi retir koripsyon, e tir lasistans sosyal. Se sa ki Minis Finans ti dir nou dernyenrer.

Me an fezan sa, Mr Speaker nou konnen ki lenpak k i pou anmennen, sa kalite reform bokou dimoun pli vilnerab pou ganny afekte e deza nou pe vwar son lefe e lenpak.

Fodre pa ki nou bliye ki nou'n pret larzan \$100milyon kot deza nou'n ganny 34milyon avek sa reform ki pe al ganny arive i annan serten keksoz en serten sanzman ankor pe ganny fer, partou, partou dan bann Minister.

I annan Lapolis, *Internal Affairs* ki nou aprann in fer sanzman. So lepep i ankor pe espere pou konnen kwa ki'n bouze kwa ki'n ale kwa ki'n reste.

E an zeneral i annan serten kot nou pe koz lo redwir depans i annan bann lanbasad 3 zot ti fermen. E 9 ki reste. Tousala nou bezwen ganny plis detay, kantite nou'n depanse, ki kantite nou ankor pe depanse, e avek sa bann koupir ki'n arive dan bann Lanbasad ki konbyen reveni nou'n anmase *so far?*

So an zeneral sa Bidze pe montre nou, poudir i pou en lannen tre sere ser sang. Nou pe vwar ki i pe tir en pe larzan dan pos Seselwa ordiner e

andotmo bann malere met dan pos gro businessmen.

I kler Sesel pe ganny *run* parey en biznes. Legzanp i la. tre byento pou trouve ki mon pe sey dir. *The rich will indeed get richer and the poor get poorer.*

Andotmo nou serten ki bann reaksyon ki pe ganny anmennen par piblik deza, nou'n vwar kot Lorloz dimoun pe konmans ralye. I montre ki i annan en mekontantman terib. I annan en mekontantman terib ki pe sorti kot popilasyon deor. Kot i pa sa sanzman ki zot ti vote pou trouve.

I kler serten dimoun potansyel kle ki'n ede dan sa pei pe ganny kit ater pou nanryen ditou. Bann ankadrer spor ki en keksoz ki mon'n konekte avek en bon pe lannen. *Sport* pe tonm an rin, *sport* pa pou avanse, nou pou esper rezilta byento anba sa nouvo Gouvernman.

Bokou lensertitid san zeneral. So an fezan sa Mr Speaker mon ti ava demann Gouvernman silvouple pou partaz sa gato byen.

Mon demann Minister Finans ek Gouvernman dizour balans byen balans byen e redonn pep Seselwa sa zwa de viv.

Lefe i la ki nou en Lopozisyon ki pa zis pe vin kritike, nou la pou donn koudmen. Nou pa vin la zis pou kritike mon bann frer ek ser. Nou la pou donn koudmen pa get nou sa 10 nou la konman fouter dezord *or* pou ensit okenn vyolans dan pei.

Mr Speaker atraver ou mon ti ava kontan demann tou Onorab ki la, vin fran, travay byen lo zot *constituent* anmenn problem zot distrik, pa akoz zot dan Gouvernman ozordi, ki zot pe les zot pep ganny afekte.

Avek sa de pti mo Mr Speaker mon ava dir zot mersi.

MR SPEAKER

Mersi Onorab Gabriel. Mon ava apel Onorab Woodcock.

HON WAVEL WOODCOCK

Mersi Mr Speaker. Mr Speaker ler mon'n ekout enterven an avan mwan, mon krwar i enportan ki nou met keksoz an perspektiv. E mon konnen ou konn en pe laliny ki lot kote latab pou vin avek, ler mon'n ekout lapant zot keston bomaten.

Me zis met keksoz an perspektiv, i enportan pou nou tous en pti lo leta lo lekonmi ozordi.

Pilye prensipal nou lekonmi Sesel ozordi se

tourism. E Gouvernman avan Gouvernman presedan, ti met preski tou dizef dan menm pannyen.

An 2019 lannen avan ki *COVID* ti tape, *tourist arrival* ti 384 mil 204. Savedir 384 mil 204 viziter ti vin Sesel.

An 2020 premye *quarter* savedir premye 3 mwan, ti annan 88 mil 912 viziter ki ti vin Sesel.

Me malerezman apre premye *quarter*, *COVID* ti tap nou for kot nou ti bezwen ferm nou lafrontyer, nou *borders*. E nou ti *end-up* avek selman 114 mil 858 viziter ki *minus 70% arrival* konpare avek lannen 2019.

E i enportan pou note Mr Speaker ki premye *quarter* 2021, an Zanvye ziska Mars ti annan zis selman 6,785 viziter ki ti vin Sesel.

E nou Erport ti reouver le 25 Mars - nou Erport nou *borders* ti reouver le 25 Mars an 2021 sa lannen.

E zis akoz desizyon Gouvernman pou reouver Erport, *tourist arrival* in sorti 6 mil 785 viziter lafen dimwan Mars pou ariv 90mil 217 *by* lafen dimwan Out.

Dan lespas zis 5 mwan, *tourism arrival* in ogmant par 83 mil 432 viziter en logmantasyon plis ki 92poursan dan 5 mwan.

E dapre rapor, dapre *mid-year review* ki ti ganny prezante par Minis Finans, *tourist arrival estimate* pou sa lannen i anviron 150mil viziter me nou'n osi tande yer swar dan Nouvel, dapre Departman *Tourism* avek retour *Air France* e *Condor*. Byento i posibil ki *arrival* sa lannen pou ariv anviron 189 mil viziter.

Mr Speaker ou kapab mazine si Gouvernman pa ti'n reouver nou pei, ki leta nou ti pou ladan ozordi?

Ki leta nou lekonomi ti pou ladan ozordi? Annou pa bliye ki *IMF* ti *praise* nouvo Gouvernman anba *leadership* Prezidan Ramkalawan, ti felisit sa Gouvernman pou bon desizyon pou reouver nou Erport.

E annou pa bliye Mr Speaker ki *US* ti kont reouver Erport e i kler Mr Speaker e mwan mon krwar e nou tou nou konnen poudir *US*, mon krwar ti anvi ki nou manz kanmarad.

Zot ti oule vwar sa pei lo son zenou. Zot ti oule vwar dimoun mont lo semen. Ozordi ki nou vwar, nou vwar bann rakay politisyen avek bann plakar anvil, mon pa konnen konbyen zot in ganny peye, apre zot ava fer krwar avek nou poudir dimoun i mekontan.

Me nou tou nou konnen lekel sa bann dimoun ki pe desann anvil. Bann ki napa plizyer sa bann dimoun sa detrwa dimoun, ki napa en lanver ek en bon kote, ozordi siporte en parti demen i siporte en lot. E nou tou nou konnen bann maginans politik ki pe ensite par detrwa grenwir.

Bann dimoun ki ou pe vwar ozordi lamazorite se bann dimoun ki annan rankin ki annan problem personnel avek Prezidan, enkli 3 *fail* politisyen avek politisyen avek bann azanda personnel ki swaf pouvwar, ki pe gronnyen, en fwa par mwan.

E si ou ekout byen ler ou vwar poudir i annan en lanfaz ki zot pe mete, ou vwar poudir zot anvi en sit serten keksoz dan nou pei. Zot pa enterese avek progresyon nou pei. Zot pa enterese avek *recovery* nou pei.

Zot pa oule respe swa Lepep Seselwa pou met *LDS* o pouvwar, pou tir sa pei dan sa trou ki *US* in met nou ladan.

Mr Speaker Seselwa pa bet. Seselwa i konpran ki nou dan en kriz ekonomik. Ou pa kapab konpar reveni ki Gouvernman ti anmase an 2019 avan *COVID* avek 2021, kan nou ankor pe lite kot sa pandemik e Gouvernman pe fer

son mye pou nou lekonomi *recover*.

Sa lannen nou kapab *end-up* parey mon'n dir avek 190 mil viziter. Ki en gro *improvement* konpare avek lannen pase. Avek lannen 2020.

Me i pa vedir ki tou keksoz i an roz Sesel, akoz ki nou vwar ki nou lekonomi ki *tourism* lendistri *tourism* pe *recover*.

Pa akoz ki ozordi nou vwar poudir avyon pe konmans vin plen ki reveni pe antre a labondans. Sa lannen i kler e Minis in fer sorti, ki nou pou dan en defisit sa lannen. E nou'n bezwen en led *IMF* pou *bail* nou *out*.

Sa ki enteresan se ki Mr Speaker, se ki *leadership United Seychelles* pe sey donn lenpresyon ki dan sa kof vid ki zot in kite, nouvo Gouvernman in fini ranpli sa kof, e i pe deborde, kan zot konn tre byen ki i pou pran en pe letan pou bous sa trou ki zot in fouye.

La ozordi dapre zot, se zot ki enterese avek vant Seselwa, pou met larzan dan pos Seselwa apre ki zot in ganny tou zot bann aki. E annou pa bliye tou sa bann aki ki zot in gannyen pandan sa dernyen 43an.

Sa ki sa de *ex-SS* ki lo Komite Santral *US* pa dir ler zot pe *croak, croak, croak* enn fwa par mwan dan zot *press*

conference, se ki dan sa Bidze siplemanter i annan en sonm R16milyon pou gratwite. Ki enkli gratwite pou bann *SS* ek Anbasader ki'n *resign*. Sa 2 *ex-SS* pe al tous zot en zoli milyon gratwite.

La, la larzan pou ed zot frer ki zot pe koz bon labous. E nou konnen si nou pa donn zot, zot larzan parey zot fer sa byen, zot pou al met Gouvernman Ankour. Ouswa *unless* ou pou vwar en lot zafer '*forgo*' ankor zot fer krwar zot pa pran apre zot pas par deryer an misouk, misouk zot pran zot pran zot larzan anba, anba!

Sa Mr Speaker i bann ipokrizi ki sa Gouvernman lepase in abitye fer. Me Mr Speaker, Sesel pe al dan en bon direksyon. Deviz etranzer, in desann, touris pe revin Sesel. Gouvernman pe met plis lanfaz lo lezot sekter parey lapes, *offshore* ek lagrikiltir pou anmenn plis reveni Sesel.

Mr Speaker, ozordi nou lekonomi pe refer akoz Gouvernman anba direksyon Prezidan Ramkalawan, in anbark lo en program vaksinasyon. In fer demars pou nou ganny bann diferan vaksen parey *Sinopharm, Covishield, Sputnik, Pfizer*.

Ziska pou nou zanfan Gouvernman in fer demars ki

ozordi nou bann zanfan 12an a 17an zot osi zot kapab ganny vaksen.

Nou annan en Prezidan proaktiv, ki pa zis 'bawawa' parey bann grenwir dan labou. I malere ki bann *leader US* pe fer politik bonmarse avek sa maladi.

Personn pa demann *COVID*. Ozordi *COVID* i partou dan lemonn. E nou tou ki la anndan nou'n perdi swa en zanmi swa en dimoun ki nou konn tre byen, swa en manm nou fanmir avek sa maladi.

E Gouvernman in fer demars pou etabli bann Lopital okipe pou sonny nou frer ek ser ki ganny enfekte avek sa maladi.

Akoz sa bann bon desizyon Gouvernman, lemonn i annan konfyans dan Sesel. Bann *airline* pe retournen parey *Air France, Condor*.

Mr Speaker, nou pe vwar progre ki sa Gouvernman pe fer. Kot i konsern bann *cuts* en keksoz ki kler, se ki bann *cuts* prensipal i kot i konsern *recruitments*.

Delay in recruitment and proposal for budget cuts. E sa ki kler Mr Speaker se dan plizyer Minister nou'n vwar *delay in recruitment*.

E Gouvernman nou Gouvernman in koz bokou lo en

leaner government. E pa zis nou Gouvernman ki'n koz lo la. mon rapel dan sizyenm Lasanble Nasyonal Onorab De Commarmond ti koz lo nou bezwen en Gouvernman ki pli *lean*.

Me ki nou'n vwar dan lepase, nou'n vwar bokou bann post in ganny kree pou bann dalon, e bokou sa bann dimoun sa bann pos i ganny kree pou bann kandida pou bann eleksyon lepase.

Ti en letan mon rapel 20 kandida ki pa ti ganny elekte in ganny met dan bann diferan pozisyon. Bann *ex-MNA*, bann kandida, bann aktivis bann dalon. Bann pos zis i ganny kree pou met dimoun ki *inflate* Gouvernman dan lepase.

E bokou fwa bann dimoun ki'n ganny mete pou bann pos i bann dimoun ki napa konpetans ki napa kapabilite. E i pa'n zanmen annan en *performance audit* dan plizyer Departman Gouvernman Minister, pou *assess* performans sa bann dimoun.

E ki in fer ki nivo performans dan plizyer landrwa antite Gouvernman servis dan *civil servant* ti'n desann en kantite.

An menm tan in annan landrwa ki ler ou gete Mr Speaker, ou vwar poudir dan

Bidze ou bezwen. Nou bezwen en travayer. Nou bezwen plis travayer. Mon pe gete mon vwar dan Minister Ledikasyon en sonm R19milyon in ganny koupe. E vre nou bezwen plis *teachers*.

E ler Minis ti prezant son *mid-year review* ti fer resorti en defayans dan Gouvernman presedan, ki malerezman sa Gouvernman ozordi zour ozordi in erite.

E Minis in dir ki nou bezwen *improve* kot i konsern *recruitment* - rekritman dan bann diferan antite dan bann diferan Departman Gouvernman.

I en keksoz ki'n ganny fer sorti se ki, nou'n vwar Mr Speaker ki sa zafer *recruitment* la i pa en zafer ki fek vini ozordi dan sa Bidze ki la. Sa problem *recruitment* in la pou plizyer lannen aköz mwan mon'n dan Lasanble nou'n vwar sak fwa Bidze in vini in toultan annan en problem konsernan *recruitment* e larzan in toultan ganny *cuts* in ganny koupe aköz *recruitment* pa'n ganny fer a tan.

Me sa ki kler Mr Speaker mon rapel enn bann rezon prensipal ki'n toultan ganny resorti dan sizyenm Lasanble, menm ozordi par bann *CEO* bann *PS* dan lepase, menm dan

Gouvernman avan, ki ozordi *US* pe sey fer nou krwar poudir sa pwen *recruitment* i en keksoz ki fek arive dan Gouvernman dizour.

Pli gro konplent dan lepase par plizyer departman elaz Gouvernman e Minister kot i konsern saler ek *recruitment* sete kot *DPA*.

Konplent sirtou parey mon'n dir i sorti kot bann *PS* ek *CEO*. I annan bokou *block* kot *Public Administration* pou *recruit* nouvo *staff*.

E plizyer bann *CEO* bann *PS* ouswa bann o zofisye dan Gouvernman ler zot oule fer *recruitment*, zot bezwen zistifye aköz zot bezwen nouvo *staff*.

Kontrol lo ki kalite saler pou donner. Bann kriter ennler ki pa fer sans. Ki dekouraz dimoun pou travay pou antre travay dan sekter piblik.

Mon ava donn ou en senp legzanp. Ozordi *DA*, tou *DA* ozordi Sesel i fer menm louvraz i annan *DA*, i annan *DA* kekfwa ki travay en pti pe pli dir ki lot. Me sa ki kler se ki tou *DA* pe fer menm louvraz.

Me sa ki pa fer sans Mr Speaker, parey en *DA* e sa i pa zis *DA* lezot post en *DA* i annan enn i annan *A Level* lot i annan *Diploma*, enn i annan *Degree* kekfwa lot i annan zis sertifika

lot kekfwa in travay dan *DA* pandan plizyer lannen. Zot pe fer menm louvraz, me sa ki nou vwar *DPA* enn ler ou krwar i pa pe kont leksperyans sa bann dimoun.

Ou vwar poudir i annan en de-balansman dan saler. Akoz ou, ou en *DA* ou pe fer menm louvraz, selman ou, ou annan en Degre ou ganny saler pli o ki sa enn ki annan en Diploma.

Mr Speaker sa i en keksoz ki nou bezwen regrete. Sa bann keksoz i dekouraz dimoun ki konnen ki pe, ou konnen nou *believe* dan *equal work for equal pay*. De dimoun pe fer menm louvraz i dan menm pos me selman enn pe ganny saler bokou pli o ki en lot. Me zot pe desarz menm responsabilite.

I annan bann kriter ki bezwen ganny revize, si nou anvi ankouraz dimoun pou vin travay dan sekter piblik.

La mon pe get dan *Department of Climate Change and Environment*, i annan 7.64 milyon Bidze siplemanter. *“Additional funds increase in contract for rivers and unlocking rivers, unblocking rivers.”*

E mwan mon bezwen dir poudir mon'n vwar en *improvement* lo kote mon distrik kot i konsern netway bann lanmar sirtou. Mon'n vwar la mon pe fer en konparezon obor

Legliz Saint Mathier. Lanmar obor *Cable and Wireless* e partou dan fon obor Tamatave Estate in ganny *thread* e netwaye.

E plizyer lezot lanmar ankor e mon remersye *DA* osi ki pe fer bon travay pou *monitor* sa bann travay dan distrik Grand Anse Praslin.

MR SPEAKER

Onorab ou pe al lo 15 minit.

HON WAVEL WOODCOCK

Ok mon ava wrap-up Mr Speaker. si ou fer *Constellation National Unity Commission* in ganny li R1.33milyon. E mon rapel zot ti pe met zot konsern devan. Kot i konsern *shortfall* ki zot bezwen, pou zot kapab pou loperasyon zot sa *Commission*. E Gouvernman in ekoute, Gouvernman in ed zot.

Kot i konsern mon ava tous de pti pwen lo Praslin mon ava *close* Mr Speaker. i annan en koupir 13.6 milyon lo *Zone 20* e Eve Island.

E Minis in fer nou konpran poudir le rezon ki i annan sa koupir, 13.6milyon se akoz proze in konmanse me sa proze pa pou konplet sa lannen, alor zot in koup en serten sonm larzan. Me sa proze pou kontinyen e ziska lannen prosenn.

Me mwan mon ti anvi fer en lapel avek Gouvernman ki, an vi ki i annan plizyer dimoun biznes pe sey espere pou ganny en bout later Ile Eve, mon ti kava fer pledwari avek Gouvernman, pou konsider bann dimoun ki annan sa mwayen pou zot fer zot prop semen, met zot bann koneksyon kouran, elektrisite kekfwa zot kapab met sa dan zot *lease* osi, en kondisyon ek zot *lease* ki bann dimoun ki pare pou zot *move* lo en bout later e zot menm zot met sa bann lenfrastruktir an plas.

Vehicle station i malere ki proze pa pou konmanse sa lannen, me i en keksoz ki nou vreman, vreman bezwen. E mon pe priye ki sa proze i ava konmanse lannen prosenn. Ou konpran sityasyon ekonomik pei.

E sa i en proze pertinan e mon ti ava voudre vwar ki dan Bidze ki vini sa proze ladan ki nou ganny sa proze *by* lannen prosen.

Mr Speaker en keksoz ki mon bezwen fer sorti, se ki retar dan bann proze ki pe arive i lo kot i konsern bann *capital project*. Nou annan en kantite fason kot i konsern bann *capital project*. Proze pa'n konmanse, ouswa proze pa'n konplete e le rezon pou sa se ki i annan

plizyer bann konsern, bann problem dan bann diferan Minister kot Minis in fer propozisyon ki pou annan en Departman pour Lenfrastruktir ki pou *deal* avek tou bann proze.

Akoz osi nou'n vwar bokou lo lannen pase kot bann proze i ganny *inflated*, kot gro sonm larzan plizyer milyon i ganny depanse dan bann proze. E ler ou gete i pa vo sa travay - i pa vo sa kantite larzan ki'n ganny peye pou peye pou bann proze.

Nou vwar bann *bus stop* in ganny fer R1.5milyon pou en *bus stop* ki pa fer sans. Nou vwar plizyer bann proze ki'n ganny fer, me solman ki pa *value for money*.

E petet avek en lenfrastruktir parey, en nouvo Departman ki pou *deal* avek lenfrastruktir i kapab ed en pe sa bann problem ki enkli bann size renovasyon lo bann batiman ki Gouvernman avan in les tonm an rin, parey ozordi nou pe *deal* avek problem lopital Baie Sainte Anne e osi avek bann lenfrastruktir sport lo Grand Anse dan mon distrik.

Mr Speaker mon annan en kantite keksoz mon anvi dir me selman aköz ou donn nou 10 minit, mon ava aret la. Me selman sa ki mon pou dir se ki mon satisfè avek travay ki

nouvo Gouvernman pe fer, nou Gouvernman pe fer pou re evant nou pei, pou *diversify* nou lekonomi, pou met lanfaz dan bann lezot sekter, parey lapes, lagrikiltir ek *offshore*.

E an menm tan pou koup bann gaspiyaz koripsyon ki'n arive dan plizyer antite Gouvernman. E osi pou nou pei *recover* e pou sa bon desizyon ki zot ti pran le 25 Mars pou reouver nou pei, ki ozordi ou vwar touris pe vin Sesel e nou lekonomi pe refer. Avek sa de mo. Mon dir ou mersi Mr Speaker.

MR SPEAKER

Mersi Onorab Woodcock.
Onorab Aglae.

HON EGBERT AGLAE

Bonn apre midi Mr Speaker. Mersi. E bonn apre midi tou dimoun a lekout.

Mr Speaker, ler mon'n ekout sa entervenans ki'n koze avan mwan, i kler ki in pri dan en gir ant ler i ti dan Lopozisyon e la ozordi i dan Gouvernman.

Mon ti espekte li petet pou anmenn bann solisyon vi ki la pouvwar i dan zot lanmen, me in retourn dan en topik lepase konmsi i ankor dan Lopozisyon.

Mr Speaker 2008 Sesel ti pas dan en Reform Ekonomik. Kan bokou ti krwar Sesel pou

bezwen tonm lo son zenou, Sesel apre 2an ti vwar li lo en larout ver prosperite ziska ki *COVID* ti fer son laparisyon.

E tou resaman bann *expert IMF* ti konfirm sa dan *interview* ki ti dir ki Sesel ti fer vreman byen apre sa Reform Ekonomik ziska laparisyon *COVID*.

E si nou'n ekout byen osi Mr Speaker, Gouverner Labank Santral ti fer kler ki napa en kof Gouvernman, me Labank Santral ki annan en kof ki ler le 25 Oktob zot ti pran pei, ti annan omwen \$500 ladan! Sa i vedir ki kof pa ti vid.

E si nou konpran ki manyer Bidze en Gouvernman i fonksyonnen, se Gouvernman dan en lannen atraver son sistenm takszasyon bann lavant, ouswa bann don ki i gannyen, sa bann larzan i al dan prozeksyon bidzeter ki ganny servi pou bann program sosyal, program devlopman.

E si Gouvernman i annan sirplis nou konnen poudir sa bann sirplis i al dan bann repeyman det entern ouswa eksteryer. E se sa ki Gouvernman ti pe fer pou li ariv lo sa 50poursan *debt per GDP* ki nou ti lo en bon semen lo la.

Gouvernman ki ti pli responsab pou li pa depans sa larzan, met a kote, pa pey son

det ki ti pou met li dan en problemm avek son bann krediter. Nou konn byen sa.

So Gouvernman in fer son travay, e si ler zot krwar poudir zot in erit en pei kales kase, lemond in montre nou poudir non, Sesel in fer vreman byen. E tanzantan nou pe ganny bann rekognisyon lo nivo enternasyonal. Sa pei ti dan bon lannen.

Mr Speaker ozordi pep Seselwa i anvi vwar en soulazman dan bann difikilte ki pe pase.

E ler Bidze pou ganny prezante ki swa en siplemanter ouswa en Bidze anyel parey i sipoze ete, i le vwar li parey i ti ganny promet pou annan plis larzan dan son pos. Son lavi i vin pli meyer.

Me ki nou pe vwar ozordi Mr Speaker, Seselwa i dan difikilte, Seselwa pe mandyan, Seselwa pa konnen ki mannyer i pou fer enn ou de bout zwenn. Sa i larealite Seselwa.

Ler mon pe get sa siplemanter Mr Speaker, Gouvernman LDS pe met lanfaz lo fer *savings*, lo koupir, kan nou konnen poudir dan bann moman difisil ou rod en pe fason osi ki mannyer ou *cushion* ou pep.

Se sa ki nou ti fer 2008, ler nou ti anvoy entrodwir sa *safety*

net pou kapab anpar sa Seselwa ki dan bezwen. E zot konn byen sa zot. Me selman zot in bliye.

Me ler mon pe get bann program sirtou program sosyal, dan sa siplemanter li menm li, mon pa pe vwar en gran rannman soulazman petet pou kapab anpar sa pep. Anpes zot al met laliny kot *Red Cross*.

(Interruption)

MR SPEAKER

Ale Manm silvouple. Evit bann komanter *off-mic* silvouple. Kontinyen.

HON EGBERT AGLAE

Al mandyan kot *Red Cross*. Depi kan ki Seselwa i al kot *Red Cross* pou al dan en demann? Sa i bann letan kriz imaniter ki sa bann keksoz i arive. Mon pe vwar *Madagascar*, wi laba i annan lafamin, laba *Red Cross* i dan bezwen. Me Sesel nou pa dan sa pozisyon. I vreman fermal Mr Speaker.

En keksoz enportan mon krwar ki zot in koz lo la osi se fer kou lavi desann Mr Speaker. Zot ti pres leloz lo la letan zot ti dan Lopoziyon. Kou lavi i ser! Seselwa pe soufer!

Me eski ou kapab fer kou lavi desann ler ou pe konmans tir bann sibvansyon ki pou

mwan bann *timing* pa bon. Akoz Seselwa i bezwen kapab ganny *cushion*.

Ou pe tir bann sibvansyon, ler ou tire pou sa bann servis i vedir ki pep Seselwa i bezwen tir plis larzan dan son pos, pou kapab pey sa bann servis. Eski sa nou pou vwar kou lavi desann Mr Speaker?

Ler Gouvernman i dir ou ki poudir pri bis pou monte, i fer nou krwar zot fer mont R15 apre i desann R10 apre zot dir nou zot in ekoute zot in fer pri bis desann. Kan lefe i reste parey, pri bis in monte. Mon pa konnen lekel ki zot pe anbete.

Mr Speaker, ozordi pou en malere ki napa, al tap laport kot Lazans Proteksyon Sosyal, i bezwen parey i pe al fer en legzanmen ki ganny li en papye *A to Z* pou li *meet* sa bann kriter, pou li kapab ganny en pti 25 sou. Eski i normal sa?

Mon konpran zot anvi koup gaspiyaz, zot anvi redwir koripsyon, be ou pa ferm tiyo ler ou pe fer sa.

Mazin bann ki'n met zot la ki ozordi malgre zot ti dir Seselwa i regrete, bokou Seselwa i regret sa desizyon ki i ti fer Oktob le 25 Oktob lannen pase!

(Off-mic)

HON EGBERT AGLAE

Wi mon pe dir akoz kot ou pase partou dan kwen semen ou tande poudir "manrmay!" Ouswa zot dir "zot ki'n nou'n al fer?" I kler sa.

E zot konnen zot. I annan pa kapab pase dan son distrik, i annan i kasyet, pou fer fas avek en larealite.

Mr Speaker, en lot pwen ki mon anvi tous lo la se sa bann proze kapital. Mon krwar i mank en pe direksyon i mank en pe sinerzi lo kwa ki Gouvernman li menm li i anvi fer lo proze kapital.

Mon vwar poudir zot in fer en pe koupir, dan diferan direksyon. Me lefe ki zot bezwen vin en pti pe pli kler kot i konsern bann lenfrastriktir ki enportan pou kapab ankouraz devlopman.

Me enn sa bann sekter se Minister konsern lenfrastriktir li menm. Ki mon santi petet i merit ganny regarde avek sa resours en pti pe pli byen. Akoz i annan dimoun ki ankor pe esper son bann proze materyalize, semen, devlopman *land bank* pou kapab annan plis devlopman, e annou pa oubliy lo proze lakaz osi.

Me ler mon pe regarde Mr Speaker, *Local Government* li

menm li sa lannen i pa'n kapab fer okenn bann gran proze.

Sa ki mon'n vwar zot in prezant nou se R200mil par distrik. Mon pa konnen petet zis pou distrik *LDS* ki'n ganny 200mil petet *US* in ganny 200 mil e lo kote *LDS* in ganny plis mon pa konnen.

Me larealite i reste ki keksoz pa pe bouze. E ler nou get *Local Government* avek sa swadizan restriktirasyon ki zot pe fer Mr Speaker, i pa pe neserman anmenn bann gran soulazman ki nou ti ava swete.

Nou'n vwar rotasyon *DA* ki'n vini Mr Speaker. E bokou *DA* pa konn sa bann distrik ki zot al ladan. Menm si in dir louvraz *DA* tou i parey, wi tou i parey.

Me selman ler ou ganny mete dan en teritwar ki ou pa okouran sirtou son zabitan, ou louvraz pa pou fasil. E se *MNA* ki pe fer louvraz *DA* ozordi dan diferan lenstans.

Wi nou ki pe bezwen al konpanyen al fer keksoz vin sa *institutional memory* dan sa distrik. E pou mwan sa i poz bann bokou kestyon lo direksyon ki nou pe ale.

Ler nou fer sa bann prop malere *field technician* aret travay, apre nou tann *NSC* i dir, nou pou donn sa bann travay

maintenance, sa bann *field technician* ki zot in pouze.

Me i annan distrik napa, i annan zis sa nanm mon pa konnen oli lekel ki pou travay mon. Annou serye !

Ler nou vwar osi Mr Speaker, Minis menm i vini i dir nou pou annan plis *redundancy* ki pe vini. Kan lefe dan zot konpanyi zot ti dir, Seselwa dan servis piblik pa pou perdi son plas travay.

Pa mwan ki ti dir sa. *LDS* ki ti dir. Me ki nou vwar, plizyer ozordi i annan plis ki santenn in perdi plas travay. E i annan ki pe vini ankor.

Apre ki nou vwar, rezondet ki zistifye se nou bezwen restriktire pou koup bidzeter. Me selman apre ou vwar diferan fason menm dan zournal lo medya, zot pe *recruit*.

Mon pa konnen lekel ki zot pe anbete la mwan. Me pou mon sa bann keksoz koumsa i senm dout, i senm konfizyon. Ou bezwen kler. Si nou anvi swiv en program *IMF* kot i dir nou bezwen *downsize by* 4poursan, 3poursan dir, "nou pou bezwen pous tan kantite travayer." E la bann travayer Seselwa i ava aziste li.

E nou, nou ava konnen ki manner nou pou siport sa ki nou krwar nou bezwen siporte nou osi lo kote *US*.

Me pa vin dir nou, nou pe vin fer keksoz gradyelman e ler zot fer gradyel, zot krwar dimoun pou bliye. Me i pa leka.

Alors mwan Mr Speaker, sa Bidze siplemanter ki devan nou, i pa port soutyen dan en direksyon zis pou serten osi.

MR SPEAKER

Ou pe ariv lo 15 minit Onorab.

HON EGBERT AGLAE

I pa pe ed sa malere sa vilnerab. Mon pe *wrap-up* Mr Speaker. e sa ki mon ti ava swete se parey zot dir “en leker pou tou Seselwa,” – “Sesel pou tou son zanfan,” annou azir onnet ek sa parol nou ti presye annou *lead by* nou aksyon. Mersi Mr Speaker.

MR SPEAKER

Mersi Onorab. Mon apel Onorab Labonte.

HON ANDY LABONTE

Mersi Mr Speaker. Bonn apre midi Mr Speaker, tou bann Manm koleg Onorab e tou sa ki a lekout.

Mr Speaker avek benediksyon Bondye papa, mon pou fer mon lentervansyon lo sa Mosyon, ki pe demande ki sa Lasanble i aprouv en Bidze siplemanter ki en valer 303 milyon 911mil 788 Roupri 83

sou, ki Minis Finans, Minis Naadir Hassan ti prezant devan sa Lasanble Mardi le 7 Septanm 2021, 2er apre midi.

Boner sa lannen sa se tyenm Lasanble ti aprouv en sonm R11bilyon 13milyon 648 mil 286 konman Bidze pou permet Gouvernman Sesel fer son depans finansyel pou sa lannen 2021.

E pou la premye fwa ki Gouvernman Sesel in vin avek en rediksyon bidzeter nasyonal pou en valer 1milyon 429mil 423.55sou pou diferan rezon akseptab ki Minis Finans ti donner dan son reprezantasyon.

E Onorab Cosgrow pli boner in eksplik sa tre byen. Wi ki en rediksyon ki zot Gouvernman pou 43an pa’n zanmen kapab vin avek en rediksyon! Savedir kit antet poudir nou pe travay.

Mr Speaker en Gouvernman ki serye i responsab, parey sa Gouvernman LDS pa kapab depanse zis akoz larzan in ganny bidzete e vote.

En Gouvernman ki fer sa, set en Gouvernman ki fer son pep vin en pep iresponsab, lesefer e vilnerab. Proverb i dir “Ler napa bon direksyon Nasyon i tonbe. Me bokou konsey i asir laviktwar.”

E la mon anvî motiv pep Seselwa pou nou vin pli responsab. E disiplinè ler i konsèrn nou depans kot lakour.

I enportan ki nou aret kwa petet fer gaspiyaz e vin pli sivilize dan nou depans. Ki bann bon pratik vreman senp ki nou merit adopte. Bann legzanp parey; pa kit delo ouver ler pa nesèser, pa alim lalimyer si ou pa bezwen, pa kwi manze an ekse apre zis pou zete e ankouraz bann vermin parey lera.

E aret viv en lavi diverti /kontan, bwar, fimèn, abiz sibstans. Me plito konsantre lo nou depans e lo nou priyorite pou byennet familyal. Arete aste tou sa ki nou vwar dan magazen menm si nou pa bezwen. E sa nou ava annan plis larzan dan ou pos.

Koumsa nou ava arete dir ki sa ki nou ganyen pa ase se ki i pa fasil pou fer de bout zwenn. Me i osi pa enposib avek bokou determinasyon e solider konman en fanmir. Nou pou reisi.

Me pli enportan dan tousala se ki tou endividi adilt ou manm en fanmir ki annan laz travay i merit pe travay anmenn en kontribisyon kot lakour.

Akoz sa ki pa travay e pa kontribye kot en lakour, pe ede

met son fanmir dan lapovrete i finalman deklar zot lekor konman vilnerab.

Mr Speaker, ler mon get sa dokiman Bidze 2021, revî milye lannen, mon oblize felisit Biro Prezidan ki pe donn legzanp kot mon'n vwar en koupir 3milyon 700mil avek Polisi e lespri kot nou anvî en Gouvernman kot travayer i vin pli efikas e devoue dan zot responsabilite.

Mon osi soulaze pou sa sonm 1milyon 500mil rediksyon dan *rent* pou lofis ansyen Prezidan.

Bokou sa bann koupir dan Bidze 2021 i akòz restriksyon e retar dan *recruitment* dan sa bann tel pozisyon. Alor mon anvî fer en pledwari avek Gouvernman, pou ankouraz sa bann travayer ki 'n donn tou e delivre par konsider lo en baz *appraisal* ki sa bann travayer i kapab benefisye swa en Trezyenm Mwan Saler oubyen en *bonus* a lafen sa lannen 2021, kot i ava osi motiv sekte prive pou fer parey.

Nou bezwen kontinyen vin en Gouvernman ki donn legzanp e fer aksyon.

Me parkont mon krwar ki sa koupir 9milyon 400mil dan Bidze Departman Imigrasyon ek *Civil Status* pou biro *matrix passport* sa proze i merit ganny akseler-e. Apre ki sa *advance*

payment i ganny materyalize avek plis avek lespri pou bouz ver *e-Government*.

Sa 2 milyon koupir dan Bidze Minister Gouvernman Lokal, e *Committee Affair*, akoz program limite lo nivo distrik, akoz sa pandemik mon ti ava swete ki sa larzan ti ava kapab ganny *top up* lo Bidze proze distrik, koumsa Onorab Aglae pa ava kapab dir ki se *LDS* distrik kot *LDS* in *win* ki pe ganny plis larzan. E nou tou nou ava ganny parey.

En koupir 34 milyon 497 mil 78 sou, anba '*Capital project APDAR*' pou sant reabilitasyon, mon krwar pli zefor en senserite i demande.

Akoz mon leker i fermal ler mon get sitan kantite zenn in vin viktim bann *hard drug*, parey eroin, koka e lezot ankor.

Mon krwar ki *methadone* i pa sel solisyon. Me son *after care* i osi vremen enportan e obligatwar. Konstriksyon sa sant pou ede realiz sa. La mon krwar ki nou merit pans seryezman lo si vremen kanabis i merit reste ilegal. Me sa i merit en diskisyon Nasyonal.

Mon pe mazin seryezman lo en menm sa diskisyon par en Mosyon isi dan sa Lasanble lo sa size. Mon osi krwar ki *ANB* i merit vin pli agresiv lo sa size drog. Sirtou avek bann trafiker.

Mr Speaker, ler mon get bann Departman Gouvernman kot in annan demann pou en ogmantasyon dan zot Bidze, mon pou siport desizyon ki Gouvernman dizour in pran.

Me parkont mon annan serten konsern. Par egzanp Minister Lagrikiltir, Sanzman Klima e Lanvironnman prensipalman Departman Sanzman Klima e Lanvironnman, in ganny en logmantasyon 256mil pou en *recruitment manager of Waste Management Trust Fund*.

Plus 7milyon 641mil 11 sou finansman adisyonel. Enn bann rezon sa logmantasyon se akoz ogmantasyon pou bann Kontra lo netwayaz tel ki larivyer, santye eksetera.

LWMA i ganny en logmantasyon 656mil konman finansman adisyonel ki'n ganny transfer sorti anba bann kontra netwayaz (*SSI*.)

Alor mon ti ava voudre ki *LWMA* i donn en pli bon servis e *monitoring* lo nivo netwayaz e lanbelisman pei.

Mon anvi felisit sa bann kontrakter ki pe fer en zoli travay netwayaz, e retir salte dan distrik La Rivière Anglaise, malgre ki annan bokou lespas amelyorasyon parey *Condominium Estate Union*

Vale, La Rivière Anglaise Santral e lezot landrwa ankor.

Mon ti ava swete ki ler i annan en travay netwayaz volonter dan distrik, sa bann kontrakter i osi partisipe vi ki se zot ki benefisyé avek kontra netwayaz dan distrik.

E anver sipor pou bann ferme, *Seychelles Agriculture Agency* in ganny en Bidze siplemanter konsiderab 55 milyon 58 mil. 47sou e sa se pou *subsidy* bann ferme.

Alor mon krwar poudir i merit annan en keksoz vizib. En logmantasyon 502mil pou Minis Lazenés Spor e Lafanmir spesifikman anba Departman Lafanmir.

Mon apresye ki apre mon'n demann nou fasilite spor dan distrik parey kort ek laplenn Union Vale pe ganny netwaye regilyerman. E mon felisit Minister pou sa.

Me mon swe se pou vwar plis zefor e sipor pou fondasyon bann fanmir solid, kot bann koup ava kapab planifye avan fer zanfan e konn vre responsabilite paran.

Mr Speaker. pli gro konsern sa pep la deor se sa *Anti-Corruption Commission* ki yer nou fek koz lo la.

An plis ki sa Bidze inisyál 15milyon 740mil zot pou benefisyé avek en sonm

adisyonnél pou en valer en milyon 14mil ankor. Transfer sorti kot Bidze *Public Officers Ethics Commission* dan son restriktirasyon pou fer li pli performans.

Seselwa mon repete ankor i anvi fri e rezilta avek sa Komisyon. I enportan pou note ki malgre konsern piblik lo logmantasyon pri, bis *SPTC*. Bomaten SS Payet pe eksplike Gouvernman *LDS* in pran kont e konsidere, Minis Finans ti'n fini fer provizyon pou en Bidze adisyonnél 25milyon 400mil pou siport loperasyon *SPTC* pou sa lannen. Menm ki pep Seselwa pa pe tann tapaz grenwir lo sa bann larzan ki pa pe antre dan kont *SPTC*.

Mon osi vremen apresye ki Gouvernman in met en sonm adisyonnél 1milyon 326mil 77 sou pou loperasyon Komisyon Laverite Rekonsilyasyon e Linite Nasyonal.

Mon swete ki bann agreser i reponn rapel sa Komisyon pou ki nou pei i ava kapab geri enn fwa pou tou.

E la mon swete ki sa bann parti ki afilye avek sa bann krim, zot osi zot fer en evalyasyon konsyans. Akoz lazistis i delivre ou dan lanmor.

Mr Speaker mon pou repete en parol ki mon ti tann dir lo televizyon, parfwa dan lavi plito

ou mor ek ou dignite ki ou mars an zenou dan imilyasyon.

Alor mon retour sa avek son met sa konversasyon.

Mr Speaker, mon pa kapab terminen si mon pa koz lo sa 8milyon 366 mil . 29sou, azout 104milyon 973mil .94 sou ki'n ganny mete adisyonnèl pou Minister Zafer Etranzer ek Tourizm anba Departman Tourizm an partikilye pou son restriktirasyon sorti anba saler *STB*.

E nou Prezidan ki'n relans nou lekonomi pou reouver nou Erport apre sa program entansif vaksinyasyon ki pe kontinyen.

Me i fer lapenn, ler en paran i telefonn mwan e dir mwan ki en Dokter kalifye i dir li pa les son zanfan pran vaksen, kan en zanfan ilezitim sa menm Dokter ki lekol ek son zanfan, pe pran sa vaksen!

Mon oule dir bravo Msye Prezidan Wavel pou ou senserite pou gard ou parol e fer vaksen disponib pou nou popilasyon!

Mon konnen ki bann mwan Onorab lo lot kote latap pa pou kontan. Me zot pa'n zanmen an faver reouver nou Erport.

E zot ti montre nou klerman kan zot ti abandon diskisyon lo de Mosyon sitan

enportan Merkrede le 8 Septanm 2021. Zot pa ti donn zot sipor e ratifye *framework* lo Konvansyon etik *Tourism* ek son *Optional Protocol*.

Zot ti *walkout* e fonn parey lanez. Parey sa proverb i dir. "Ler tanpet i vini, malfeter i fannen".

(Interruption)

HON ANDY LABONTE

Me sa enn ki zis i reste pou touzour.

Mr Speaker pli boner mon'n tann ki en Onorab in dir se ki ti pou napa restriksyon. Me parler mon demande par ki zorey sa Onorab in ekoute, akoz toultan nou Gouvernman in dir poudir restriksyon i pou annan, malgre ki serten pa pou kontan akoz i dan benefis nou pei.

E mon'n tann en lot Onorab ankor i dir, ki i annan laliny kot *Red Cross*. Mon demande in koz lo gir, be li son gir i bon, oubyen i pa regard televizyon?

Akoz yer swar nou'n ganny dir par *Red Cross* poudir napa laliny kot *Red Cross* !

(APPLAUSE)

HON ANDY LABONTE

Mr Speaker ...

MR SPEAKER

Ou pe al lo 15 minit Onorab.

HON ANDY LABONTE

... Mr Speaker pou terminen, mon anvi dir avek tou pep Seselwa pran konsey *Bishop* Alain Harel "pti pa, pti pa, nou pou arive."

Avek sa de mo mon pou donn mon sipor total sa Mosyon. Mersi Mr Speaker.

(APPLAUSE)

MR SPEAKER

Mersi Onorab. Mersi Onorab. Mon ava apel Onorab Cosgrow.

HON WALLACE COSGROW

Mersi Mr Speaker. bonn apre midi Mr Speaker. Mr Speaker apre midi ler mon ekout bann entervenans Parti *LDS* lot kote latab ki'n koze, mon fer en pti sourir. Mon fer en pti sourir aköz avan eleksyon, avan sa zour ki zot kontan koz lo la zot kriye, parol ti diferan.

"Sesel pou tou son zanfän."

"Nou pou sakrifye !"

"Personn pa pou perdi son travay !"

"Nou pou met larzan dan pos Seselwa !"

Me apre eleksyon tou dimoun ki pe ekoute la, in

tande ki sa bann Onorab in dir. Zis 10 mwan anba *leadership* zot *Leader* zot *Leader* dan Lasanble Nasyonal ki'n toultan dir ki i en gran *liberal* - zis 10 mwan apre mon krwar son bann prensip *liberal* pe *brush off* lo zot, e zot osi zot pe vin bann *liberal*. Zot pe pratik bann prensip, "bef dan disab sakenn vey son lizye." E zot pe bliye ki zot ti fer, ki zot ti dir avan eleksyon lannen pase.

Mr Speaker me solman sa mon les avek zot, zot ava rekonsilye avek zot lekor e *time will tell*.

Mr Speaker sa dokiman ki'n ganny prezante devan nou ozordi. *Well* in ganny prezante avek nou semenn pase, Lasanble pou deba e diskisyon i en legzersis ki neserman bezwen ganny fer, par Gouvernman ler i ariv milye lannen fiskal, pou evalye si oule performans fiskal Gouvernman.

A sa pwen relasyon avek Bidze ti ganny prezante pou sa lannen, e an relasyon avek bann plan ki Gouvernman ti met dan Bidze. I enportan ki nou met lo labaz pou sa prose.

Bidze i ganny formile lo en lasonpsyon fondamantal. E sa i lo reveni ki Gouvernman pou anmase atraver diferan form, diferan diran lannen.

Ler Gouvernman i fer Bidze, i pa fer Bidze lo en larzan ki egziste. Savedir kontrerman avek sa ki'n ganny dir taler in ganny dir dan leparse, napa en kof parla dan Minister Finans ki'n anmas en larzan ,e dir konmkwa nou pe al servi sa larzan sa lannen.

Sa fodre i kler pou tou dimoun konpran. Sa bann dimoun ki la anndan zot konpran zot. Me selman zot rod diferan fason pou anbet nou pep deor.

Nou koz lo *financial literacy* Mr Speaker pou nou pep. Gouverner Labank Santral i koz bokou lo Labank Santral pe fer bann program lo la. I bezwen konmans par nou Gouvernman. Nou bezwen donn bann keksoz ki vre ki larealite pou nou kapab edik nou pep lo *financial literacy*.

Si nou dakor Mr Speaker, sa ki mon fek eksplike, i pou permet nou ozordi de konstri en *statement* ki Minis ti fer ler i ti pe prezant Bidze siplemanter ek Lasanble semenn pase. Sa i annan pou fer avek *savings*. Mon'n koz lo la bomaten.

Ou pa kapab *save* en larzan ki ou napa, ouswa ki pa ankor ariv dan ou lanmen. Sa i en legzersis pou Gouvernman revwar son priyorite, ler in egzamin larzan ki in anmase

pandan 6 mwan sa lannen. E osi prozeksyon ki i pe fer pou sa prosen 6 mwan.

Annou pa bliye ki Gouvernman atraver Minis Finans ti dir nou, ki nou pou annan en defisit R2.64bilyon. Savedir en larzan ki nou pa pou anmase, e ki nou pou bezwen rod diferan fason pou kapab siplemant nou Bidze.

Dan mon pwennvi Mr Speaker, sa *supplementary estimate* ki devan nou i eksplik performans pei e Gouvernman pandan sa dernyen 6 mwan e i donn nou en apersi sa prosen 6 mwan.

Ler mon dir performans Gouvernman, mon oule eksplike Mr Speaker. Mazorite bann koupir ki pe ganny fer swa dan bann nouvo pozisyon ki bann Minister Departman e Lazans ti demande pou sa lannen, e osi dan bann proze kapital. Nou'n vwar sa bomaten letan nou ti pe diskite.

Nou'n ariv 6 mwan e en kantite bann pozisyon pa ankor ganny ranpli, e Gouvernman pe dir pa pou ganny ranpli aprezan.

I tre probab ki sa bann *recruitment* pou dekoul dan lannen ki pe vini. Sa i annan en lefe direk lo Seselwa, an mazorite pou ganny en travay

dan sekter piblik sirtou dan sa bann letan difisil.

E tou dernyerman, mon ti dir ek Minis, ki a mon lavi i reflekte lo linefikasite sa bann Lazans kot bokou i bezwen refer plan e zot ankor pe fer plan, pe fer plan e pa ankor kapab etabli kler ki mannyer zot pou bouz de lavan! Bokou bann Minis ki'n vin devan nou in ankor pe fer plan!

I en sir kler en Gouvernman ki pa'n prepare pou vin o pouvwar. Nou'n vwar dizan Lasanble pandan sa lannen' parey mon'n dir, bann diferan Minis ki'n vin devan nou, nek kas en striktir isi, met en lot laba apre pep i konplent, akoz pa'n ganny byen konsevwar, apre Gouvernman i tournen i dir i pe revwar.

Pa tro lontan tiket bis i en legzanp tipik, e pa bliye nou ankor pe esper nouvo Polisi Lakaz ek Later.

Kot i konsern proze kapital Mr Speaker, nou konnen vre ki akoz ki akoz bann prosedir *procurement*, touzour i annan serten *delay* o konmansman lannen pou bann proze demare.

Me parkont parey nou'n vwar dan diskisyon bomaten, mazorite koupir i dan proze kapital. E ki bokou proze pa pou fini materyalize sa lannen.

Sa i annan en lenpak direk lo lapopilasyon e lo sekter biznes.

Pa bliye ki Gouvernman i ofer bokou loportinite biznes pou sekter prive. En koupir dan proze kapital, pou definitivman enpakte lo sekter prive lo sa bann pti kontrakter, ki depan lo sa bann kontra pou zot kapab fer zot biznes.

Mon anvi retourn lo sa size *savings* Mr Speaker. annou dir zot mentenir sa ki zot in dir zot in fer *savings*.

Alors mon *challenge* Gouvernman ozordi pou remet *saving* dan bann keksoz ki tre enportan pou nou pep.

E la mon pe mazin *SPTC* Mr Speaker, Gouvernman si vre in fer *savings* i kapab servi *savings* pou *extend* son sibvansyon avek *SPTC*.

Bokou in koz lo sa 27 milyon. Si vre nou'n fer *savings*, *extend* sibvansyon avek *SPTC*, mentenir pri tiket bis R7 omwen pou en serten kantite letan ziska ler keksoz i ava stabilize. Sa i ava ed bokou fanmir Seselwa soutenir zot prop Bidze. Si nou'n fer *saving* nou pa kapab fer sa?

Mon'n osi fer refleksyon lo Trezyenm Mwan Saler Mr Speaker. Si vre nou'n fer *savings* ankor, annou soutenir nou pep e fer provizyon dan

savings a donn travayer Seselwa en pti morso zot osi.

Mr Speaker ler nou pe pas lo sa Bidze siplemanter bomaten ankor. Nou'n, fer en remark, nou vwar bokou dekoneksyon dan lafason ki Gouvernman pe opere.

Nou vwar bokou Minister Departman ek Lazans ki pa pe fer rekritman. Zot bezwen dimoun, selman zot pa pe pran.

Lo en lot kote nou vwar bokou sa bann Minister menm Minister Departman e Lazans pe fer restriktirasyon pe fer *redundancy*. Dernyen legzanp ti yer dan diskisyon ki nou annan avek NSC. E nou annan plizyer ankor.

Si Gouvernman ti planifye e konekte, zot ti pou annan en bon program redeplwayman e re lantrenman pou plas dimoun.

Mon'n santre mon lentervansyon koumsa ozordi apre midi Mr Speaker, aköz mon anvi montre pep Seselwa ki ozordi nou annan en ladministrasyon ki a latet zot partou, partou.

E sa i pe reflekte dan zot bann desizyon e reflekte dan sa revi Bidze ki devan nou.

Boner parey enterven an avan in koze in dir, Gouvernman in rod vaksen. Si i annan en landrwa kot zot in

fail plis se lafason ki zot in zer COVID. Letan ki Prezidan li in pran son kat doz vaksen in pare pou *travel* dan nenport ki kwen lemonn, nou dan Lasanble nou ankor pe kennsel *Sitting* aköz COVID.

Sanmenm sa bon *management* ki zot koz lo la. Plis ki 110 nou frer ek nou ser in perdi zot lavi zot. E pep nou ankor pe espere ki pou arive. COVID i kontinyen ravaz nou kominote, restriksyon i ankor preski dir an fors.

An somer Mr Speaker, sa Bidze siplemanter i penn en portre en Gouvernman ki pa konnen ki i pe fer. Ki pe trenn lipye e pe fer pep soufer.

Byento lan LDS preski napa naryen pou montre e pou zistifye sanzman ki zot ti koz lo la. Mon dir mon'n dir yer pep Seselwa in aste en kabri dan sak!

Zot promes eleksyon pa akorde avek zot krwayans e tandans *liberal*. Mersi Mr Speaker.

(APPLAUSE)

MR SPEAKER

Mersi. Mersi Onorab. Mon ava apel Onorab John Hoareau.

HON JOHN HOAREAU

Mersi Mr Speaker. Bonn apre midi Mr Speaker. Bonn apre midi tou dimoun ki a lekout. Mr Speaker apre eleksyon kot Prezidan Wavel Ramkalawan ti raport en gran laviktwar an 2020. I pa nouvel ki ladministrasyon Prezidan Ramkalawan ti erit en pei ki lekonomi ti'n ganny trangle par pandemik *COVID-19*.

Sityasyon pei ti'n ganny dekrir konman en kales kase aköz bokou bann move desizyon ekonomik ki ti'n ganny pran tel konman *FA4JR* pou tou biznes san pran kont kapasite sa biznes pou pey son travayer, sa ti zis en bal dan larzan piblik.

Koripsyon ti pe tous lesyel, problemn sosyal e labi drog parmi bann zenn ti pe touy bann zenn, ti pe touy sa zenerasyon vitman.

Zot ava rapel byen ki moter lekonomi vedir bann biznes prive sirtou bann biznes ki relye avek lendistri tourizm, ti lo zot zenou lannen pase.

Answit Gouvernman ti bezwen met an plas en Bidze defisiter e osteriter.

Debt to GDP ratio ti'n ariv 94poursan an Zanvye. E parey in ganny dir nou target se pou fer li apepre 50poursan pou li vin soutenab.

Se larzan ki ti pe rantre dan kof Leta sete larzan prodwir

atraver lendistri pwason e bann biznes *offshore*.

Parmi bann premye aksyon ki Prezidan Ramkalawan dan son gran sazes e gran vizyon pou Sesel ti deside pou rod en led avek bann Pei Zanmi pou vaksin nou popilasyon, avek bi pou ganny *herd immunity* pou li reouver pei.

Answit reouver nou lendistri tourizm, ti anmenn plis deviz dan nou lekonomi. Mon bann zanmi sa pa'n fasil. Aköz Lopozisyon *US* ti pe toultan swete ki pei i reste fermen e larzan pa rantre dan lekonomi. Seselwa ti ava konmans fristre, problemn sosyal ti ava ogmante, koerans sosyal ti ava dezekelibre e dimoun ti ava mont lo semen.

Mr Speaker zot rev pa'n vin en realite. Aköz Prezidan Ramkalawan ek son tim in reste *focus* lo sanzman fondamantal lo lafason pei i ganny dirize. E bann *prophets of doom* i kontinyen zis reve e akont zot rev dan en konferans depres tou le semenn.

I enportan pou lepep konpran, ki premye keksoz ki Minis Finans in fer, apre ki lekonomi in revitalize, se pou rod tou sord fason pou finans sa Bidze ki ti'n ganny propoze e vote par Lasanble.

Nou ava rapel sa Bidze ti'n ganny fer par Gouvernman presedan, akoz nou ti antre dan Gouvernman an Oktob, selman.

Treasury Bills ek *Bonds* ti ganny lanse. Minis Finans ti renouvle son zefor pou fer sir ki SRC i anmas plis reveni kot pa ti pe ganny ranmase.

E se sa Polisi *Broadening the tax base*. Answit demars i konmanse pou rod *loan* avek IMF. E sa in fer ki nou'n bezwen negosye avek en lorganizasyon pou nou ganny sa *loan*. Parkont nou'n bezwen rantre dan en program osteriter kot i neser pou koup depans e striktir bann plizyer antite piblik.

Se pou se la, ki bokou *recruitment* e nouvo proze, e bann proze kapital ti ganny *freeze*.

Mr Speaker sa in donn sa pep sa pei en *breathing space*. Dezyenman in osi ede pou prodwir en sirplis bidzeter ki parey nou konnen sirplis bidzeter i ganny prodwir avek bi pou re servis bann *loan*.

I parey kot en lakaz ler ou pran en *loan* pou re aranz ou lakaz ou fer sir, ki ou pa servi 5 glob ou servi 2. Ou fer sir ki olye servi delo PUC, ou met en barik deor e anmas delo lapli ou servi pou aroz zarden. Ou fer

sir ki si ou ti abitye bwar de boutey diven par semenn ou pa bwar. Alors sa pti larzan ki ou'n met de kote ou fer sir ou met de kote, pou fer sir ou met lo sa *loan* ou rann li.

Non pa ou pran sa larzan e ou al distribye ankor avek sa bann zanfan ki ou annan, pou zis bal bise e depanse.

E se sa ki Gouvernman in fer. Gouvernman pa kapab pran sa larzan fer sirplis e pran donn Trezyenm Mwan Saler, donn *increment* par R2000 parey *Leader US* pe demande. Akoz i bezwen re-pey *loan* ki nou'n pran Mr Speaker.

E Dr Herminie i konn sa tre byen li. Me selman i swazir pou li pa dir sa bann keksoz ki realite, me i swazir pou fer politik popiler !

Mr Speaker avek en legzersis koumsa i osi neser revwar alokasyon bidzeter e reaziste kot fodre.

Se pou se la ozordi nou pe ganny demande pou nou aprouv en Bidze siplemanter, akoz restriktirasyon in fer bokou antite bouze, oubyen bann ki i pe replik serten travay in bezwen frenmen.

Dan sa Bidze siplemanter par egzanp, NISTI ki ti en lorganizasyon endepandan in zenn Minister Lendistri Lantreprenarya.

Alors son Bidze in bezwen rantre dan son *parent Ministry. Public Officers Ethics Commission* in zwenn avek ACCS. Alor li osi son Bidze in bezwen rantre dan Bidze ACCS.

Bann propriyeter ki ti pe lwe lofis avek Gouvernman ki pa'n fer desann zot *rent*, malgre Gouvernman ti demann zot pou fer li par 10poursan ou plis ki sa, e osi in fer ki nou'n bezwen vwar larzan an plis pou nou donn diferan antite kot zot pe zwen lwe lofis Gouvernman.

Mr Speaker, 27milyon pou SPTC zisteman pou fer sir ki pri bis i reste abordab pou tou dimoun. I osi dan sa Bidze.

Larzan pou permet LWMA pou pran responsabilite netwayaz sit Bazar Labrin Beau Vallon ki ti anba SSI i osi ladan.

Bann dezabilite pa'n ganny oubliye. ASP in ganny 14 milyon anba '*Approved programme and benefits.*'

Alor Mr Speaker atraver sa *mid-year review* menm si bokou bann *capital expenditures* lo nouvo proze in koupe, e bokou *recruitment phase* in anmenn en nouvo fason fer kot lanfaz in ganny mete lo *leaner Government* e lefikasite dan servis piblik.

Mr Speaker lekspektasyon nou performans sa Gouvernman i o. Mon kapab

konpran akoz, sirtou pou bann ki'n esper sa sanzman pou 45an.

Me mon osi anvi demann zot pou pran en pti pe plis pasyans. I pa fasil pou sanz *mindset overnight*. Sirtou akoz komikman sa Prezidan ki'n anmenn en kanpanny e antre lo platform "Seselwa i pou tou son zanfana," alor i pa'n fer en *witch hunting* parey son bann pwen neserer ti fer avan li ler zot ti antre o pouvwar.

Nou pep i bezwen sanz son *mindset* sirtou dan *civil service*, akoz bokou bann pozisyon ki'n ganny akoz bokou bann pozisyon ki'n ganny mete par bann dimoun ki pa'n ganny mete akoz merit, in ganny mete akoz pozisyon politik dan lepase, i osi pe fer bokou ditor dan sa Gouvernman ki la ozordi.

Zot pe trenn lipye, zot pe fer sir ki keksoz pa marse. E nou, nou pou donn zot letan pou zot prouv zot lekor. Me si zot pa prouv zot lekor, zot kontinyen trenn lipye zot kontinyen fer sa pep soufer, mon krwar zot pou bezwen rod en lot plas!

Mr Speaker sa Bidze siplemanter i osi montre nou ki avek bann koupir ki Gouvernman in fer, nou bezwen

nou'n vwar sa sirplis primer ki R1.4bilyon.

E pou sa arive, in bezwen nou'n bezwen bokou disiplin fiskal e pou sa mon felisit Minis Finans pou sa lakonplisman.

Mon sir ki bann lorganizasyon multilateral ki ed nou atraver bann *loan* pe note sa lakonplisman.

Avek sa Mr Speaker mon pou siport sa Mosyon pou aprouv sa Bidze siplemanter, aköz mon vwar ki sa Bidze pou ede mentenir progre e soutenir travay ki bann diferan Minister pe fer, *until* ki sa lot Bidze i retournen. Mersi.

MR SPEAKER

Mersi Onorab nou a pran en poz la e nou ava rezwenn 4er edmi pou kontinyasyon deba.

(BREAK)

MR SPEAKER

Byen nou a re pran deba. Mon a donn laparol Onorab Churchill Gill.

HON CHURCHILL GILL

Mersi Mr Speaker. Bonn apre midi tou Manm e to dimoun a lekout.

Mr Speaker, ozordi nou vwar nou pe diskite lo en Bidze siplemanter an rezilta boner sa

lannen nou ti fer en gran diskisyon lo en Bidze R11bilyon. Nou tou nou kapab mazine diskisyon ti tre alimen, e nou tou anndan nou ti pe lager pou fer sir ki i annan serten keksoz, pou bann dimoun ki nou pe reprezante dan nou distrik.

E ler sa Bidze ti fini ganny aprouve, i ti kler ki ti annan bokou lekspektasyon ki ti'n *build up* dan sa diskisyon tre alimen ki nou ti gannyen pou aprouv sa Bidze 11bilyon.

Ozordi nou annan sa siplemanter R303milyon ki vedir? I montre nou en portre ant sa Bidze ki ti ganny aprouve ozordi kot nou été, ki'n pas dan sa dernyen 7 mwan an term fiskal pou Sesel.

Ki mannyer nou bouz devan prezan? nou bezwen travay avek s aki nou annan. Groser Bidze i bezwen ganny revwar.

Si nou dakor avek sa, alors nou bezwen revwar sa proses pou fer Bidze ki pe vini dan 2022. E pou nou fer sa kestyon se ki, vi ki nou annan sa leksperyans sa 11bilyon ki ti ganny aprouve pou 2021, eski *ceiling* pou groser Bidze pou 2022 i devret kontinyen reste parey?

Eski sa bann alokasyon ki ti ganny fer dan sa Bidze 2021,

Eski i devret ganny revwar? Eski egzekisyon bann sif ki ti dan sa Bidze 2021 ti ganny byen distribye? Ler nou get sa siplemanter, i fer nou realize ki menm si tou sa letap preparasyon in fer, Bidze in ganny aprouve, i kler ki bokou sa bann lekspektasyon pa'n kapab ganny egzekite.

Alors an retour bann dimoun ki nou reprezantan, zot in kapab realize ki bokou keksoz z pa'n kapab ganny fer. E i annan bann leksplikasyon ki'n ganny donnen. I annan leksplikasyon *comme quoi* i annan *savings* ki'n ganny fer. I annan leksplikasyon osi ki nou ti bezwen plis lasistans pou nou kapab finans sa Bidze 11 bilyon.

Alors i kler ki montre nou ki i bezwen revwar fason apre *quantum* Bidze ki nou krwar nou devret travay lo la, e lafors ki pou delivre lo sa Bidze, sa osi i bezwen ganny revwar. Akoz dan sa siplemanter i kler ki tou sa ki ti'n ganny agree lo Bidze 2021, en bon nou pa'n kapab delivre e sa i fer ki nou bezwen revwar nou fason fer pou Bidze 2022.

I annan detrwa legzanp ki mon pou kapab donnen ki pou

fer nou vwar poudir i vre petet ler sa in ganny prepare, nou lekspektasyon petet ti en pti pe tro o baze lo sa ki nou ti kapab delivre.

Bomaten dan bann kestyon ki'n ganny demande, nou ti ganny fer konpran, ki i annan bann serten peyman ki relye direk avek travay bann kontrakter ti bezwen met *on-hold*. Apre ti annan delay dan bann peyman apard bann ki'n met *on-hold*.

Ki sa i montre nou? Tou bann proze, baze lo Minister ki pe fer sa proze, prosedir an plas se annan bann lenspeksyon ki ganny fer lo sa bann proze ler pe ganny delivre.

Si sa ti pe ganny fer byen parey i devret, nou ti pou napa sityasyon kot peyman ti pou bezwen met *on-hold* oubyen *delay*. Akoz okenn defayans ti pou ganny vwar byen boner e sa ti a ede ki tou keksoz ti a kapab devlop byen, peyman ti a ganny fer aler. Bann fanmir bann kontrakter, ti kapab ganny zot sipor baze lo bann travay ki'n ganny fer e bokou lezot ankor.

An menm tan, ler Minis ti prezant sa Bidze siplemanter, e mon ti fer sorti ek li ki apard ki kantite proze i osi kler ki groser proze i koz en problem pou delivre. I ti donn nou son komitman dan sa Lasanble, i ti

dir wi zot pe travay lo en nouvo fason fer, ki tou bann proze zot sipoze *centralise* dan en fason ki dapre li i pou kapab ganny egzekite.

E sa i a ede pou nou kapab fer lekspektasyon bann desizyon ki'n ganny pran, realize, aköz par egzanp pou Praslin mon kapab donn de legzanp. Nou tou nou konnen ki dan Bidze ti annan pou fer en proze *Vehicle Station* ki pa'n arive.

Proze pou pasaze pou bann bato lwazir, sa osi pa'n ganny arive, menm si i annan konsesyon lo lasose Bais Sante Anne ozordi ki pe ganny servi.

Alors si sa *central body* ki pou get bann proze i ganny met an plas, mon espekte ki proze ki ganny tonm dakor lo la i ava ganny egzekite, e bann dimoun ki sipoze ganny egzekite avek sa bann proze zot a kapab vwar ki sa ki zot bezwen in ganny realize.

Mr Speaker, i annan sa sipor bidzeter ki *IMF* pe donn Sesel. Nou tou nou konnen ki sa a en pwen nou bezwen re peye. E ler nou konn sa nou bezwen realize ki groser Bidze ki nou fer dan lefitir, nou bezwen seryezman fer li pou bann ki kapab delivre.

Petet nou pa get sa kantite bilyon ki nou, nou krwar.

Annou get bilyon ki nou kapab egzekite. Mon krwar sa ti pou ed pei dan plizyer fason.

E nou ti a kapab osi ganny bokou plis rezilta, aköz nou bezwen osi realize ki si proze kapital i kapab demare, bann kontrakter zot bezwen pey zot taks e sa i fer ki lekonomi i kontinyen roule.

E ler nou annan sa kantite sonm ki pa ganny depanse dan proze kapital, i annan en relasyon direk avek kantite taks ki nou Gouvernman ti kapab benefisye, si sa bann proze ti'n ganny fer e sa bann kontrakter ti pou pey zot kontribisyon.

So alors pou mwan mon vwar ki sa Bidze siplemanter in donn nou en loportinite pou nou revwar fason fer, e an menm tan *fine-tune* bann landrwa kot petet ti annan bann estimasyon ki petet ti en pe tro eleve.

Annou revwar tousala baze lo nou lafors ki kapab delivre. E ler nou'n kapab fer sa. Nou pou kapab, menm si letan i difisil i annan bokou keksoz ki nou pou kapab *achieve* lo la.

E pou konklir Mr Speaker, mon oule remersi tou bann zabitan Bais Sainte Anne ki'n persevere dan sa letan tre difisil. E mon donn zot mon langazman ki ansanm nou pou

kontinyen persevere ziska ler keksoz i a kapab amelyore.

Parey nou konnen Praslin ek La Digue in ganny tape tre for. So mon ava esper sa Bidze 2022 pou mwan vwar si i annan keksoz pou Praslin, ki a ede soulaz lavi bann *Praslinois* e ansanm nou a kapab kontinyen bouz devan. Mersi Mr Speaker.

(APPLAUSE)

MR SPEAKER

Mersi Onorab Gill. Mon ava apel Onorab Monthy.

HON PHILIP MONTHY

Mersi Mr Speaker. Mr Speaker, avan mon komanse mon oule zis asir Onorab Aglae ki Cascade koman en distrik ki *LDS* in raporte, nou osi nou'n ganny R200mil pou depanse pou proze distrik. Nou pa'n ganny plis.

Nou ti ganny 4 *voucher* R40 mil an 2020. Mon ti swiv sa lo televizyon a lokazyon 40an laniverser lakonpanyen konstriksyon, vi ki son *headquarters* i baze Cascade. Ti fer mon distrik kado sa.

Mon'n al fouye, mon'n al rode mwan. Mon'n ganny 2 sa *voucher* pour lemoman. I reste ankor 2 pou antre. I a fer nou R160mil. Se sa an plis ki nou

pou gannyen nou. *Ok?* Zis mon ti anvi met sa lo rikord.

Mr Speaker, avek sa pandemik *COVID-19* ki pe ravaz lemonn e Sesel osi, parey nou konnen pan en leksepsyon, i nesese pou ki si nou pep i kontinyelman pe ganny en saler lafen dimwan ziska aprezan, san ki nou'n bezwen koup saler travayer, parey ansyen Minis Finans anba Gouvernman presedan ti pe prevwar ti'n kapab arive sa lannen, si zot ti'n ganny eleksyon.

Kot napa okenn Seselwa ki pe mor lafen. Kot i annan larzan pou aste karbiran pou pei fonksyonnen. Pou aste latizann pou nou pep kontinyelman viv an bonn sante pou ki nou bann zanf an i kontinyelman al lekol ;- e kot i annan ase resours pou donn zot sa ledikasyon de kalite ki nesese pou zot epanouisman, in donk nesese pour ki nou koman en pei nou adopte en serten disiplin fiskal. E kot i annan serten sakrifis pou fer ansanm koman en pep, nou napa swa me nou pou bezwen fer li.

E mon pou profite pou fer nou pep la deor byen konpran. Akoz i sanble mwan i annan en pti group ki pe les zot tonm dan latrap ek konfizyon ki sa bann fo profet pe propaze.

Mon bann frer ek ser Seselwa, sa pei i sorti lwen. Gras a desizyon byen kalkile par Prezidan Ramkalawan pou fer sir ki nou pep i vin enn bann premye Nasyon o monn pou ganny vaksinen, pandan ki serten ti pe lager lebra kase pou dekouraz nou pep pou pa pran vaksen.

Gras a sa desizyon brav pou re ouver nou lafrontyer, pou re lans nou lekonomi pandan ki lezot ti pe kriy *lock down*, nou vwar nou lekonomi pe rebondir e pei pe kapab antreprann bann depans nesaser pou ki nou pa vin en Leta ki'n *fail*.

Me Mr Speaker, menm apre sa bann desizyon byen kalkile par sa tim ki pe asiz anler *State House* e kot Minister Finans, ki'n reisi tir nou dan sa gro fernwar ekonomik, me nou touzour pa ankor avek antyerman dan laklerte.

E se pour sa rezon ki i enportan pou nou konn tay nou lenz dapre nou latwal parey koze i dir. Mon pou alors dekrir koman iresponsab e pirman malisye e motive par laswaf pouvwar, ler ou tann bann swadizan fitir dirizan ki pe demann Gouvernman pou ogmant lapey travayer par R2000.

Kan zot, pandan ki pei ti pe fer tre byen ekonomikman, zanmen zot in deza annan sa kouraz lavolonte pou donn sa pep en logmantasyon R2000 ! Menm en logmantasyon dan sekirite sosyal pou nou bann dimoun aze, ki *LDS* ti pe demande an 2015, zot ti refizye dekrir nou koman 'iresponsab !'

Me se ki apre ki lepep ti anvoy eleksyon sa menm lannen dan dezyenm *round*, ki deswit zot ti vwar larzan pou ogmant pansyon lo bann vye paran !

(APPLAUSE)

HON PHILIP MONTHY

Alors silvouple, annou mazin byen avan nou koze. Sa i montre nou klerman ki kalite dimoun nou pe fer fas avek.

Mr Speaker, parey Minis Finans ti fer resorti, e la SS Payet fek refer nou konpran bomaten ki nou ankor pe *run* lo en *budget defisit*.

Sel diferan ki annan se ki gras a sa disiplin fiskal e bon desizyon ladministrasyon dizour, sa defisit ki ti pe ganny prevwar pou 11.8poursan pou sa lannen, in redwir konsiderableman pou sa premye 6mwan.

E nouvo prozeksyon pou sa lannen pe prevwar en nouvo defisit fiskal primer 7.6 nou *GDP*, ouswa R868milyon parey Minis Finans ti fer resorti dan son ladres. E ki SS Payet in fek repet avek nou ankor la dan sa Lasanble bomaten.

Mr Speaker, in annan en remark par Onorab Cosgrow la dan sa Lasanble, ki si ou napa larzan ou pa kapab fer *savings*. Sa pou mwan i en remark ki pa fer okenn sans. Wi, nou pe *run* lo en *budget defisit*, me pei pa pe kontinyelman fonksyonnen? Travayer pa pe resevwar en saler lafen dimwan, enkli Onorab Cosgrow?

Bann Sekreter Deta e ansyen Anbasader ki'n deside *resign*, pa zot pe al ganny peye zot gro konpansasyon? Wi, nou'n bezwen al pret larzan. Me pa aköz sa ki nou pa kapab kalkil nou depans byen.

Rediksyon dan to lesanz, nouvo fason ki bann leköl pe fonksyonnen, 25poursan lo *rent* ki serten propriyeter in ekout lapel Prezidan e in aksepte pou donner kontrerman avek sa ki Onorab Vidot in esey fer nou krwar. Tousala in ede pou nou kapab fer bann depans an mwens ki sa ki ti'n prevwar pou serten *budget heads*, ki prezan pe al ganny *relocate* avek lezot

Minister e Departman ki annan bann depans an plis pou fer.

E sa i enportan, en sel legzanp se pri bis ki Gouvernman in ekout lapel sa pep e in deside pou fer serten azisteman. An rezilta sa desizyon *SPTC* i bezwen plis larzan pou kapab mentenir son loperasyon. E se sa, sa legzersis ki nou pe fer l an se moman ki pe permet nou fer sa.

Mr Speaker, parey *Leader* Biznes Gouvernman fer nou remarke bomaten, en *mid-year review* i en prosesis normal aköz en Bidze i en prosesis dinamik e i pa ganny fer an ros.

Pei i bezwen kontinyelman fonksyonnen e mwan mon annan antyerman konfyans dan sa lekip ki'n ganny sa manda pou fer sa arive. Mon pou alors pa pli long lo sa Mosyon, me aport tou mon sipor lo sa Bidze siplemanter ki devan nou e mon pou demann tou lezot mon koleg pou aport zot sipor osi aköz pei i bezwen bouz devan.

Annou, mon pou dir nou pep ankor silvouple, annou aret ekout sa bann fo profet. Annou met konfyans dan sa lekip ki zot in elekte le 25 Oktob e nou pou bouz devan, e laklerte i ape vini lo lorizon. Mersi Mr Speaker.

(APPLAUSE)

MR SPEAKER

Mersi Onorab. Onorab Uranie.

HON ROCKY URANIE

Mersi Mr Speaker. Mr Speaker, dan letan pase nou Gouvernman in toultan ganny kritike ler i ti anmenn Bidze siplemanter dan Lasanble. Nou Gouvernman ti ganny dir napa bon *management* e planifikasyon finansyel lo ki manner pou depans larzan piblik.

La anba nouvo Gouvernman nou vwar Bidze siplemanter ki vin dan Lasanble e nou pa krwar sa i pou dernyen fwa ki nou pou vwar sa dan 4an ki pe vini.

Tar lannen pase nou ti aprouv plis ki en bilyon Roup siplemanter apre ki *LDS* ti vin dan Gouvernman.

La nou ti ganny dir ki en *supplementary budget* nenport ler i kapab ganny met devan Lasanble, akoz sa i dan Konstitisyon e osi akoz depans i en keksoz ki dinamik, nenport ler i kapab sanz e en depans pa kapab toultan reste dan paramet en Bidze ki'n fini ganny aprouve.

Me avan ler nou Gouvernman ti fer ti en problem. Mr Speaker, boner sa lannen nou ti ganny

demande pou aprouv apepre R3 Bilyon koman en davans pou ed Gouvernman kapab *sustain* son depans pou sa premye 4 mwan lannen.

E ki nou lo sa kote latab nou ti fer sa pou siport nou bann frer e ser pou kapab ganny zot saler, pou zot fanmir, met en lasyet manze lo zot latab. Me ki nou ti vwar Mr Speaker, bokou nou bann frer e ser ti ganny met deor dan zot travay, en bann ti ganny zis lanmwatye saler e zot ti osi ganny dir al demann nou vwazen prete, me vwazen osi ti napa.

Mr Speaker, Sesel ape soufer bokou la ater. Sa Gouvernman pa'n kapab fer desan pri lavi lo zil pros. I ti'n kapab sibvansyonn bann bato kargo, me i pa'n fer li. Pri komodite e in depans plafon e Digwa pe soufer. In fer *STC retail* e osi pe ferm *STC wholesale* ki ti ed Digwa ganny en pti materyo lo en pri abordab.

Nou Gouvernman ti ganny akize pou kree pos pou dalon, me *post liaison officer* La Digue avek en gro saler, be pa en pos ki'n ganny kree pou kandida ki'n perdi, par en gran mazorite dan eleksyon lannen pase? Ki pli byen fer ki zot pe fer? Larzan

pe ganny mete zis dan pos serten endividi.

Mr Speaker nou'n vwar bann lanplwa terminen e lasistans sosyal ganny koupe e Gouvernman pa'n vreman vwar, pa'n realize ki lenpak negativ, konsekans advers ki sa i anmennen lo nou bann fanmir.

Seselwa in ganny dir ki zot bezwen fer sakrifis. Ler Seselwa ordiner ti pe sakrifye e ankor pe sakrifye, ki nou vwar Mr Speaker? En bann gro msye ek madanm ti pe diverti, kontan, monte, desann partou e depans larzan an brit.

E ler zot ganny demande pou rann kont e latransparans, LDS ti vin reponn dan Lasanble, i annan en bann ti oule pres pou tous plafon ek lakoler. Ti'n sanz kouler ti'n vin rouz, nou ti krwar ti oule pete !

Mr Speaker, Gouvernman ti dir ki in fer plis ki en bilyon Roupri *savings* e an menm tan i pe demann nou pou aprouv re alokasyon R304milyon pou diferan Minister, Departman e Lazans koman Bidze siplemanter.

Me eski vreman Gouvernman in fer sa *savings*? Oubyen sa i zis termoloji finansyel dan lekonomi e Bidze pou dekrir larzan ki pa'n ganny depanse

pou fer bann aktivite e proze dan bann distrik ou pei an zeneral.

Nou'n vwar plizyer proze kapital pa'n ganny e sa i fer ki Gouvernman in retenir R836 milyon. Parmi sa bann proze i enkli Kordgard La Digue ki nou'n vwar yer kantmenm Minis Etern ti vin dan Lasanble i pa'n kapab dir Digwa kote nouvo Kordgard pe al ganny fer, malgre ti annan tou loportinite pou fer li.

Mr Speaker, Minis Finans in dir ki sa rediksyon dan depans Gouvernman i montre ki degre serye - ki son Gouvernman i serye pou fer Sekter piblik vin pli efikas par koup depan ek gaspiyaz.

Eski pous dimoun dan lanplwa a e osi tarde pou fer *recruitment*, i pa zis en stratezi pou Gouvernman gard larzan e dir ki in fer *savings* par koup depans ek gaspiyaz? Sa i en kestyon pou bann ki'n viktim, bann ki ankor dan dout dan zot louvraz e tou Seselwa deor la fodre reflesir lo la.

La mon pou remersi zabitan zil pros pou zot rezilyans e determinasyon malgre lavi i vreman dir pou nou. Nou pe tenir e pe sey trimouse dan meyer fason ki nou kapab pou siport nou lekor e nou fanmir.

Oktob 2020, zabitan zil pros ti met konfyans dan mwan ou fer zot lavwa tandé. Mon pou kontinyen travay pou zot e mon pou toultan siport zot parey zot pe siport mwan. Ansanm nou pou fer li pou nou pti zil.

Mr Speaker, pou terminen mon swete ki sa Gouvernman i aret tat tate. I aret trenn lipye e larzan ki pa'n ganny servi i ganny byen manage e byen planifye pou ki i reflekte dan Bidze 2022 e ki tou bann proze e aktivite ki pa'n ganny materyalize, i ava ganny materyaliz ;- kot nou pa ava vwar plak ganny devwale avan ki premye pyer fondasyon i ganny mete. Mersi Mr Speaker.

(APPLAUSE)

MR SPEAKER

Mersi Onorab. Onorab Waven William.

HON WAVEN WILLIAM

Mersi Mr Speaker. Bonn apre midi tou dimoun ki lekout. Mr Speaker, gran liny deklarasyon misyon LDS dan Manifesto pou Sesel se, mon site 'diriz Sesel an deor lenpak COVID, ofer loportinite pou Seselwa, ogmant reveni e standar lavi. Batir en pli meyer pei, batir en

sosyete rezilyan e investir dan lazènes'.

Mr Speaker, laviktwar LDS le 25 Oktob pa ti en kabri dan sak. Sa *cash cow* ki ansyen Gouvernman ti'n met apiye ek park ozordi LDS pe re donn li lavi, ki lasyet manze Seselwa i vin pli responsab. Tou endividi pou atraver ansanm pou garanti en lasyet manze lonterm Mr Speaker. E nou bezwen fer li ansanm.

Mr Speaker, depi le 7 Septanm ler Minis ti fer son deklarasyon lo revé Bidze, lo Bidze siplemanter, bokou kestyon in ganny demande e demi zournen ozordi Manm Lasanble in demann ankor kestyon e rod plis leklersisman.

Mr Speaker, mon bezwen siport sa Bidze siplemanter pou asire ki Gouvernman i reste lo semen ariv lo sa bann target. Mon annan en langazman moral anver sa pep ki'n konfyé nou sa mandyan, pou asir progre dan devlopman pei e devlopman personnel fanmir Seselwa.

Mr Speaker, i enportan fer konnen pep Seselwa ki Bidze siplemanter i en pratik mondyal, ki ganny fer par en nenport Gouvernman ki pouvwar. En evalyasyon i ganny fer lanmwyatye lannen pou vwar e pran stok depans an

relasyon ek Bidze provizwar pou en lannen.

A sak fwa revizyon bidzeter i ganny fer, kot i neser serten anrezisteman i bezwen ganny fer atraver Bidze siplemanter. Koupir ouswa vitman alokasyon Bidze sorti dan en sekter pou al dan lot. I pa en kabri dan sak oubyen bann aksyon ilegal. Me bann aksyon lezitim pou permet en nenport Gouvernman depans larzan ki permetab dapre previzyon Bidze vote a lafen lannen.

Mr Speaker, dan en lanvironnman kot napa kriz, en Gouvernman i kapab fer en sirplis Bidzeter ouswa en defisit. Dan ka Sesel ek sironstans lenpak *COVID* ek serten desizyon mal kalkile par ayer ladministrasyon, sesel pou fer en defisit bidzeter.

Bon nouvel, se ki olye parey prevwar, 11.8poursan i pou anviron 7.6 a lafen lannen nou *deficit*.

Gouvernman atraver prensip bon governans, latransparans e rann kont, bezwen vin devan Lasanble pou demann laprouvasyon. Gouvernman pa kapab dizourd Lasanble e fer parey ti ganny fer avan eleksyon 2020. Ti en labi pouwar sa letan, aköz labi pou siport sa tel aksyon pa ti

zistifyab. En nenport Seselwa ti kapab *challenge* sa desizyon devan Lakour Konstitisyonnèl sa lepok.

Me ek en divan sanzman dan ler ti transform koman sounami dan rezilta le 25 Oktob Mr Speaker. Mr Speaker, sa ki pe ankor spekile, ki ti en kabri dan sa sak sa rezilta, mon konpran zot fermal vre Mr Speaker.

(APPLAUSE)

HON WAVEN WILLIAM

Mr Speaker, ki reste se koz lo son merit zeneral sa Mosyon. Mon ti dir dan mon *PPB* pandan kanpany eleksyon, ki mon pou siport bann mezir ki annan pou fer ek reform ekonomik. Mon pa ti fer li zis aköz mon ti anvi dir. Mon ti fer li avek tou konesans si e serten bann desizyon pran avan eleksyon, ti'n met Sesel dan en kriz ekonomik aköz nou ti pe fer fas a en lensertitid.

Mr Speaker, Seselwa selman i bezwen note ki Lopoziyon ki son parti in la pou 43an dan Gouvernman, ek sa napa zot pe demann tou sord kalite kestyon e pe demann Gouvernman fer tou keksoz en sel kou. Rod tou pti trou ouswa defayans ki zot pa'n aranze pandan 43an!

Zot in oubliy sa bann fraz swivan ki mon rapel byen aköz mon ti osi servi ler mon ti dan zot kote.

Sa de fame fraz se Mr Speaker,

“Fer keksoz firanmezir.”

“ e kot i byen nou anbelir E kot i mal nou ava aranze.”

Sa bann fame fraz ozordi zot in les tonbe ki aplik parfetman ek sa sityasyon ekonomik ki nou ladan.

Zot oule sa Gouvernman fer tou keksoz ozordi e konmela menm Mr Speaker! Nou pe donn lavi sa bef e prezan partou ek zot i fermal vre Mr Speaker!

(laughter)

HON WAVEN WILLIAM

Nou pe aranze. Les prezidan Ramkalawan travay. Parey zot ti dir les ansyen Prezidan travay pou li dizourd Lasanble mal apropo!

Mr Speaker, mon pou aprouv sa R3.9 ekek milyon pou tenir mon langazman ek pep Seselwa. Nou a rapel ki boner sa lannen Minis Finans ti vin rod sipor pou en Bidze provizwar R11 ekek bilyon. Sa larzan ti ganny estimen pou lannen 2021. Sa larzan ti pou akimil atraver bann diferan pre domestik e enternasyonal.

Larzan anmase atraver bann diferan *tax* e bann donasyon.

Mr Speaker, parmi bann diferan mezir, ti neser osi fer plizyer restriktirasyon. Sa ti ganny anonse pou minimiz depans e osi koup plizyer servis piblik. Pa zis koupe me kree loportinite anpar sa bann ki ganny afekte.

Mr Speaker, i enportan ki pep Seselwa i note ki det Sesel an 2020 ti ogmante, lafen 2020 sorti R60 poursan *GDP* pou vin plis ki 100 poursan *GDP*. Tou ti dan mal, Lasanble ti’n dizourd e nou pa ti kapab demann kestyon Mr Speaker.

La mon oule felisit Gouverner Labank Santral e son lekip, ki ti pe sonn en laklos dan nou zorey lo vre sityasyon ekonomik, lans lapel pou koup depans. Prewwar nou priyorite e donn nou gidans.

Mr Speaker, mou oule osi felisit s azen lekip kot Minister Finans ki pe fer en bon travay anba sa nouvo Gouvernman dan en sitan kourt letan. Seselwa i bezwen devalyasyon vit nou Rroupi pou kont Dolar Ameriken, sorti 16 pou vin par lao R20.

Mr Speaker, mon toultan fer sorti sa bann fraz swivan, “dan lavi tou i permetab me pa tou ki benefisyab.”

Mr Speaker, i evidan ki politisyen ki pa dan Gouvernman, pou esey konfiz sa pep. Mal enterpret sa ki Minis Finans in dir. E mon pa vwar li drol pou li zwe ek sa larzan ki pa pou bezwen depanse prezan pou plizyer rezon, ler pa depanse lo sa ki ou ti sipoze depanse.

Eski i en *savings*? Wi ouswa non, Mr Speake? Pou fer li pli kler, Gouvernman ti'n prevwar pou depans 11 ekek bilyon. E aprezan i pe redwir sa depans par 1.1bilyon. Nenport ki fason i sa i arive eski i en *savings*? Wi ouswa non.

Mr Speaker, Bondye i bon, Bondye pe vey lo Sesel e Bondye pe ekout lapriyer. Ozordi 11 mwan apre eleksyon zeneral 2020, 11 mwan tat tate dan fernwar, dan tinel, nou pe komans vwar lalimyer dan fon tinel ki ti paret sonm, apre 10mwan pase avan apre eleksyon.

Lagras e faver Bondye i lo Sesel, i anver nou bann dirizan pou pran desizyon brav. Pou lans kanpany vaksinasyon e louvertir lafrontyer ki'n anmenn rezilta pozitiv menm si lopoziyon ti pe anmenn en kanpany *boycott, lockdown*.

Mr Speaker, rezilta i ankourazan pou tande. Frer e ser Seselwa. Par egzanp det

Sesel in sorti dan poursantaz *triple digit* pou vin dan poursantaz *double digit* ;- sorti par lao 100poursan pou desann 80poursan ozordi Mr Speaker!

Redwir depans Bidzeter par 1.1 ekek bilyon pou lannen 2021. Ganny sipor Fon Monneter Enternasyonal ki pou dousman, dousman permet nou ranforsi staz pou ogmant nou rezilyans pou refer pli vit sa lekonomi.

Mr Speaker, mwan mon pou osi felisit sitwayen Seselwa ki determinen, pe solider. Pa koman en partizan me koman en Seselwa ki anvi rebran zot lavi normal Mr Speaker.

Frer e ser Seselwa eski nou pou ekout bann fo propagann e politik bonmarse, par sa 3 *disc jockey* ki pe zwe sa bann vye rikord reye lo sa vye granmofonn lapres?

Mr Speaker, tou i permetab, me eski ensit piblik pou desann dan lavil, zot lo fristrasyon travayer e zis distort lenformasyon osi akoz ou pa ankor aksepte defet e ou ankor fermal partou? Zot ankor Seselwa ki ti'n ganny pran otaz anba *Scheme URS*, ki'n vin viktim en *mindset* dependans an krwayan plante par ansyen rezim.

Eski i benefisyan pou fer tousala. O konter annou ini

ansanm pou *attend* bann lobzektif pou nou prop dibyen. Ankor enn fwa mon remersi Lepep Seselwa pou son sazes, pou son matirite politik. Pou reste ini ansanm ou batir sa lekonomi.

Mr Speaker, pep Seselwa in fatigue ek mezir *COVID*. Sesel ai anvi re pran son lavi normal. Les nou travay. Pa anvoy lapo bannann anba nou lipye pou nou glise. Mr Speaker, avan mon terminen mon pou tous lo detrwa pwen ki mon santi egzekitiv pandan ki zot pe travay lo provizyon Bidze 2022 pou bezwen tenir kont.

Premyerman, bann revizyon ki zot dir nou zot annan lentansyon ouswa in komanse, dir nou selman me pa donn en dele letan, pou nou koman Lasanble serye sivre zot progre ziska finisyon pa vedir naryen Mr Speaker, nou bezwen regard ladan.

Dezyenmman, tel parey angaz dan bann legzersis pou en revizyon saler zeneral Sesel e an menm tan revwar sa prosesis fer desann kou lavi. Sa de i bezwen mars kot-a-kot. E Mr Speaker, sa diskisyon i bezwen komanse dan pei. Kot tou akter e parti prenon i bezwen angaze, i pa vedir ki demen bomaten nou pe al fer monte saler, i pa lentansyon.

Me mon krwar poudir sa diskisyon i bezwen komanse, pour ki letan lekonomi in refer ase byen, ki nou a kapab annan serten keksoz pou nou komans travay avek.

Mr Speaker, i pou fer deba vremen long si bann antite Gouvernman pa vin avek bann lenformasyon, ki pou permet nou kapab vremen konpran ki bor zot pe ale. Alors mon swete ki dan Bidze 2022 nou annan sa bann bon lendikasyon. Akoz si non, deba pou reste toultan long.

Mr Speaker, sa zafer “epi, pli tar pou donn larepons” ki pa demann larzan dan servis piblik. Zis lev telefonn e donn en kontrandi lo en langazman, ouswa lo en lagreman ki’n ganny fer dan en *meeting* ouswa dan en vizit, pa kout larzan Mr Speaker. E nou vwar poudir i annan serten zofisye ki ankor pe fer sa dan servis piblik.

Nou’n ganny elekte pa zis pou zis pou solider ek parti ki nou pe reprezante e pou deservi sa pep ki’n met nou la. De lot kote annou *lead by example* lo sa size konsiltasyon si vremen zot valoriz nou pozisyon koman reprezantan lepep e pou nou ankouraz sa lespri *ownership* Mr Speaker. Ki Bondye i kontinyen tenir nou anba son lagras e ki i a kontinyen osi

annan faver lo nou bann dirizan e nou pei Sesel.

Frer e ser Seselwa mersi pou zot pasyans. Mersi pou zot kouraz mon anvi dir zot se nek ansanm ki nou pou kapab fer li pou Sesel! Mersi Mr speaker.

(APPLAUSE)

MR SPEAKER

Mersi Onorab. Mon ava apel Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun. Mr Speaker, Mosyon anmennen par *Leader Bines Zafer* Gouvernman, Onorab Bernard Georges pe demann sa Lasanble pou aprouve n sonm R303.9 milyon pou ki diferan Minister, Departman e Lazans i kapab kouver bann depans ki swa zot pa ti'n bidzete, oubyen ki manke pou zot kapab kontinyen avek zot program.

Ler mon fer mon analiz Mr Speaker, i remarkab ki pli gro kopo sa bann *savings* se lo kote bann proze kapital ki ariv apepre R856milyon dan sa *savings* R1.4 bilyon ki zot in fer. Sa i plizoumwen *savings* lo kote bann proze ki ti pou ganny kouver anba *Grant*.

Lot pli gro *savings* i R71.1milyon ki *savings* ki'n ganny fer aköz bann diferan Minister, Departman e Lazans pa'n kapab fer *recruitment* pou ranpli bann diferan pozisyon ki egziste dan zot Minister, Departman oubyen Lazans. Nou ti ganny enformen ki dan 498 pozisyon ki ti annan diferan Minister, selman 144 pos ki ti ganny ranpli e ozordi nou vwar ki *redundancy* i ankor pe arive dan bann diferan Minister, Departman e Lazans.

Bokou dimoun ozordi zot travay i lo balans. Aköz avek program *IMF* ki Gouvernman in anbank lo la, pou annan bokou plis dimoun ki pou kapab perdi zot travay. Sa i aköz sa bann diferan restriktirasyon ki pe arive dan bann Minister, Departman e Lazans.

En legzanp i Gouvernman Lokal, kot zot in fer bann *field technician* aret travay e apre vwar ki zot in *recruit* nouvo dimoun anba en lot non, pou sa menm louvraz ki sa bann dimoun ti pe fer! E i annan osi menm serten distrik ki pe demann *casual worker* pou vin travay. Ler nou get osi lo kote *NSC*, tou bann pos *office assistant* pe al ganny aboli e sa bann *staff* pa konnen kote pou ale.

Nou osi aprann ki kot *TRNUC* 2 Komisyoner in demisyonnen san okenn mansyon par *TRNUC*. I vremen domaz pou vwar kot dimoun pe perdi louvraz e serten ni menm en lasistans pa pe kalifye pou zot gannyen. Nou'n ganny dir ki serten bann post ou ganny aboli dan serten Minister, me apre vwar en lot dimoun i antre dan sa bann Minister, Departman e Lazans anba en lot *post title* selman pe fer menm louvraz ki sa enn ki ti la avan.

Pri lavi in tous plafon. Ozordi ler ou get R500 i vo R100. Dolar in desann me pri lavi lo tou komodite i triple. Servis i kontinyen bin pli ser e sa i vin parey en sek visye. Sa ki pli vilnerab, sa ki pe perdi travay pou kontinyen sibir le konsekans.

Ler nou regard proze Mr Speaker, mon santi ki bann Minister i bezwen vin pli proactive. Bann Minister i bezwen *boost up* zot seksyon proze. Si nou oule vwar ki bann proze distrik e lezot proze kapital i ganny akonpli.

Nou'n ganny garanti ki serten bann proze mazer ki'n komanse. La mon pou mansyonnen. Parey proze Grand Rivière e lagrandisman *Home for the Elderly*, Anse

Royale i ganny materyalize lannen prosenn.

La mon mazin osi sa proze *out patient* klinik Anse Royale ki mon espere li osi i a ganny konsider byento aköz Lopital Anse Royale i devret ganny servi pou son *purpose inpatient* e pou note i osi ganny servi pou bann *case* aminisyon pou *COVID*.

Mr Speaker, i devwar tou Minister, Departman e Lazans pou fer byen zot planifikasyon bidzeter. Vwar bezwen zot travayer, enkli *training* ki vremen en enportan pou devlopman zot kapasite e anmenn plis benefis pou zot landrwa travay.

Mr Speaker, an terminen mon ti a kontan remersye zabitan Anse Royale pou zot rezilyans pandan sa moman difisil, e mon oule re asir zot ki mon pou kontinyen travay pou zot. Mon pou kontinyen travay dir e anmenn zot konsern devan, pou ki Gouvernman i adres zot konsern. Mesi Mr Speaker.

(APPLAUSE)

MR SPEAKER

Mersi Onorab Lemiel. Onorab Bistoquet.

HON ROSIE BISTOQUET

Mersi Mr Speaker. Bonn apre mdi Mr Speaker. Bonn apre midi tou Manm. sa ki nou'n trouve sa semenn sirtou la sa Mosyon ki'n anmennen i premye Bidze siplemanter ou sa nouvo Gouvernman.

Mon apresye ki Gouvernman dizour, sirtou a ki prezan la, in amenn en Bidze siplemanter byen detaye. Sirtou atraver sa *mid-year review* 2021 kot nou'n trouv en gran sanzman stratezik konpare avek lannen oparavan. Kot depans ti ganny fer apre ki zot ti anmennen pou demann Bidze siplemanter. E sa i le kontrer sa ki nou'n trouve.

Mr Speaker, mon pa pou tro koz bokou letan. Sa i montre ki nou Gouvernman in pli byen striktire e i annan bon standar pratik fiskal enternasyonal. Sirtou parey bann pei *OECD* i pe fer, i ganny demande.

Mon pou dir mersi sa Gouvernman dizour ek nou Minis Finans pou sa bon planifikasyon, malgre nou dan en difikilte ekonomik. Mon oule anmenn en pti kontribisyon lo Minister Lanvironnman, Sanzman Klima e Lanvironnman osi.

Sa Minister ri tre enportan pou devlopman en pei, pou asire devlopman soutenab pou

son pep, sirtou asire ki sanzman klima i ganny byen zere pou fer sir ki bann evantyalite i ganny byen met anba kontrol.

E lo kote lagrikiltir sa Minister in ase, i e asire dapre son plan pou fer sir ki son popilasyon i ganny bon nitrisyon. I annan bann sitwayen ki reste an bonn sante. Bann travayer, lafors travayer ki reste an bonn sante.

Lo konte lanvironnman, sa Minister osi i pou asire ki i pe asire ki tou, atraver sa Bidze ki tou sa ki dimoun i konsonmen, sirtou komodite i napa maladi, e otour nou lakour, kominote, pei i reste prop.

Me parkont Mr Speaker, menm si Gouvernman dizour in revwar sa Bidze siplemanter, pou asire ki i annan sa egalite pou tou Minister, nou trouve ki serten dimoun dan serten Lazans zot bezwen aranz zot en pe, pou fer sir ki kliyan i ganny sa bon servis. E sa mon pe koz sirtou kot *LWMA*.

Mr Speaker, parey angle i dir, annan de fwa dir "*old habits die hard.*" Mon krwar sa nou bezwen revwar, poudir ki nou sitwayen i ganny sa servis ki zot merite. Alors pou nou mars an avan sa bann *public servant* i bezwen aranz zot sistenm pou amelyor servis sirtou pou fer li

vin pli efikas, pou bann dimoun - reponn zot telefonn. Reponn zot *email*. Donn larepons agreab pou anpes retar dan bann Minister e ki kliyan osi i ava satisfè.

Avan mon konklir Mr Speaker, mon ti a kontan dir en lot ti parol ki ti koz lo 'kabri 'taler. Mr Speaker, 'kabri dan sak' ti la depi lontan li. E sirtou le 25 oktob, i ti la li. Me swadizan 'kabri dan sak', sa kabri in refoul avek son met !

Akoz lamazorite Seselwa pa ti aste sa kabri aköz sa kabri ti malad. Zot lizye ti ouver. A lafen dizour dan sak zot ti vwar zi sa bann gro, gro grenwir. Mersi.

(laughter)

MR SPEAKER

Mersi Onorab. Mon ava apel Onorab Pillay.

HON SEBASTIEN PILLAY

Mersi Mr Speaker. Mr Speaker, bonn apre midi. Bonn apre midi tou koleg Onorab. Mr Speaker, mon byen kontan ki standar deba dan Lasanble in elevan, swivan enterven an avan mwan.

E i paret poudir *LDS* in fer en kantite resers e preparasyon parey enterven an avan mwan in

fer pou li vin fer en deba lo en Bidze siplemanter.

Zis pou fer en koreksyon i a fer dezyenm Bidze siplemanter ki *Leader Zafer* Gouvernman i anmennen dan sa Lasanble anba Gouvernman *LDS*. E non, pa premye Bidze siplemanter ki vini kot Gouvernman in fer *savings* parey nou kapab al fer resers e trouve.

Mr Speaker, ou konnen i enportan koman *MNA*, fodre nou pran nou travay serye. Pa zis vin Lasanble pou vin tap latab, e mon bezwen komans apel zot tim bat latab, aköz i paret mwan poudir i annan si ou le en konfizyon total.

I annan en lenkonsistans dan lafason ki zot pe apros travay ki zot pe bezwen fer, e menm vin pran deba lo bann size serye ki konsern sa Bidze siplemanter.

Annou regard sa byen, premyerman mwan mon napa okenn leson pou pran avek okenn dimoun ki 43an ti la byen obor sa park, in donn lanmen bwar dile ek sa bef, in vin byen gro, byen gra apre pou li vin donn mwan leson !

(laughter)

HON SEBASTIEN PILLAY

Napa okenn dimoun ki pou vin donn mwan lesan la!

Dezyenman si nou serye, nou pa ti ava fer met Mosyon, mon pa pe antisyip okenn deba, pou vin demande ki Gouvernman i revwar son pozisyon lo Trezyenm Mwan Saler. Annou arete fer Seselwa krwar lizour pou aswar e se sa lenkonsistans ki mon pe koz lo la ki sak fwa zot koze en lot keksoz i ganny fer.

Mon pou retourn zot en keksoz vreman enportan ki zot prop Prezidan ti dir an 2012 an se ki konsern Bidze siplemanter. *Challenge* mwan pou montre zot kot i ti dir, mon ava montre zot.

Zot Prezidan ti dir koumsa poudir, "Ankor en Bidze siplemanter pe ganny anvoye e *IMF* pa dir naryen." *IMF* i la ozordi e li son Gouvernman pe anmenn en Bidze siplemanter. In pas son letan blanm Gouvernman avan pou anmenn Bidze siplemanter.

Wi, vann Seselwa en kabri dan sak aköz fer Seselwa krwar son pei ti le pli pir pei o monn, kot naryen pa ti pe marse e naryen pa ti pe arive.

Me ki nou'n vwar resaman. Pei ki annan pli gro Lendeks Devlopman Imen dan Lafrik, enn bann pli o. Pei ki annan pli o standar ledikasyon

dan Lafrik, menm dan lemonn. Pei ki annan enn bann pli o standar lasante dan lemonn. Se nou, Sesel. E sa i 43an travay ki en Gouvernman serye, *US* in fer. Aköz se nou, nou'n toultan krwar dan koz laverite avek Sesel e pa koz lalang ek Seselwa !

(APPLAUSE)

HON SEBASTIEN PILLAY

Ou konnen aköz mon dir sa? E get tim bat latab mannyer i reakte lot kote laba.

Bomaten ler pe demann kestyon, ou ganny *MNA* lo lot kote latab ki vin demann kestyon lo size *NSC*, me zour mon ti anmenn Minis la anndan pou *PNQ* e *challenge* li lo son bann stratezi e plan ki sa Minis i paret i annan sitan kantite plan - menm *MNA* in bat latab e pa ni ti menm dakor ek lafason ki nou ti pe demann Minis pou li koz lo sa bann size ki i pe fer!

Me ki nou'n vwar, lenkonsistans dan en Bidze siplemanter ki vin devan nou, *NSC* ki dapre li sipoze pe *save* larzan anba restriktirasyon, i pe koup larzan aköz in ganny en *delay* pou li fer *recruitment*. I pe koup larzan aköz i pa'n kapab akonplir son bann *goals* an se

ki konsern son bann proze ki i sipoze pe fer.

Me menm NSC i bouz *management* oubyen travay ki sipoze ganny fer lo serten fasilite sportif anba *Local Government* e dir *Local Gouvernman* se son bann *field technicians* ki sipoze fer sa travay. Kan *Local Government* li, in fini met deor *field technicians*. E *MNA* lo lot kote latab ki'n sipoze serten sa bann *field technicians*, ki'n sipoze en dimoun in siport zot, zot tap lanmen lo latab!

Dezyenmman dan Bidze, pandan deba Bidze nou ti *challenge* Gouvernman lo sa striktirasyon oubyen lo sa revu ki pe fer an se ki konsern *disability benefits*. Nou ti dir koumsa ek li ki poudir ou bann *figures* pa korek. Avan ou bouze, ou propoze en restriktirasyon mazer, asize target ou bann *figures* byen.

Minis ki ti vin reponn ti akiz nou lo sa kote latab ki nou, nou'n pas nou letan donn Seselwa *welfare*, Seselwa in depandan lo *welfare*. Kan dezabilite napa naryen pou fer ek sa. Ozordi dan Bidze siplemanter lenkonsistans e sanzman ki arive, zot pe met R14milyon zisteman parey nou ti'n dir zot, zot sipoze fer.

Me *MNA* lo lot kote latab ti bat lanmen ankor, ti siporte ankor. E la mwan mon koz ek ou Seselwa, sa Seselwa ki'n vot pou sa bann *MNA*. *Ok*, ou'n fer ou swa, ou'n fer ou sanzman. Mon *hope* ki ou satisfè ek sanzman ki ou'n gannyen. Mon *hope* ki ou satisfè ki sa bann *MNA* ki ou'n met devan i pare pou *challenge* zot Gouvernman ler en size i vin devan Lasanble e kestyonnen

Akoz ler nou get dan sa Bidze, nou get par egzanp bann proze *Local Government*, *MNA* lo lot kote latab pe sey demann kestyon lo proze pou *Local Government*, kan tou sa bann *MNA* i konn tre byen ki kantite proze zot bezwen fer, kantite fwa dimoun pe *call* zot *regarding* sa bann proze. Enn antre zot apard ki sa enn ki'n demande, pa fisi demann kestyon an se ki konsern ki kantite larzan i reste pou sa bann proze.

Se nou isi lo sa kote latab ki'n anmenn sa kestyon pou zot.

MR SPEAKER

Onorab Loizeau, aret bann komanter silvouple.

HON SEBASTIEN PILLAY

Zisteman Mr Speaker, ou konnen aköz se sa pratik *MNA*

bat latab. Ler i vini i gognarde, i bliye in ganny elekte pou en distrik e fer son travay pou son distrik.

E mon pou ilistre sa pwen dan sa konteks Mr Speaker, akoz i enportan pou nou sitye dan ki konteks nou pe koz lo sa Bidze siplemanter.

Ou annan ou en Onorab i pas 14 minit, maltret nou. Apre ler pres pou fini ou bezwen *remind* li son letan pe fini, ki i reste li 1 minit, prezan ki i pou al koz en pti kou lo son distrik. Se sa kabri dan sak.

Se sa ki ler Seselwa in fer en desizyon pou met ou la, ou sipoze swazir. Swa fer parey mon Koleg Anse Royale in fer, *rise above* e vin koz lo larealite ki mannyer nou kapab fer bann lavi bann dimoun ki'n met ou la vin pli byen. Se sa ki nou bezwen fer.

Me zot non. Zot swazir pou fer li diferaman. Zot swazir pou zis vin siport tou sa ki Gouvernman i dir akoz ozordi, kontrerman avek sa ki zot ti dir dan lepase, zot bann *MNA* ki zot parti i dan Gouvernman, alors zot pou siport tou sa ki ganny fer.

Me annou regard la realite. Nou vwar poudir i annan en lenkonsistans ant sa ki pe ganny dir. *Savings* dan Bidze, me *savings* i bezwen baze

lo larzan ki ti dan Bidze ki ou pa'n depanse e ki la. Me larealite se ki sa bann larzan pa la.

So, Gouvernman pa'n *actually* fer sa *savings* ki i pe koz lo la dan lafason ki i pe dir. Se ki'n arive, se ki Gouvernman pa'n gannyen larzan pou sa bann *Grants* e sa bann donasyon e sa bann *loan*. An tou i annan R800milyon anba *Grants*. R200milyon anba en *loan* pou *PUC* ki fer R1 bilyon ki Gouvernman pa'n kapab kolekte.

Prezan lo sa R400 milyon ki Gouvernman i dir nou in fer *savings*, lamazorite i sorti dan bann *delays in recruitment*. Ler mon ti *challenge* Vis-Prezidan dan Lasanble e demann ki bann sanzman mazer ki pe arive dan servis piblik e Ladministrasyon Piblik, Vis-Prezidan ti vin lir mwan en lalis tou bann dimoun ki swadizan siport *US*, akoz i konnen zot siport *United Seychelles*.

E menm mon tande apre i annan dimoun ki pros ek li, in al dir poudir sa bann dimoun ti met kandida. Be i enteresan, annan ou get ki zot Prezidan menm li ti dir an 1999. Prezidan Ramkalawan li i ti dir ki nou tro pe konsider konsiderasyon politik an se ki konsern apwentman bann

dimoun. Son, prop Vis-Prezidan pe konsider konsiderasyon politik sa bann dimoun ki in vin lir mwan zot pos dan Lasanble.

Selman an 1999, (mon annan laprev Mr Speaker, akoz mon annan son *speech* antye la) i ti dir sa. E sa i parfetman rezim lafason ki Gouvernman pe fonksyonnen. Dir lepep Seselwa en keksoz, me larealite i en lot.

E ler ou koz lo *delays* in *recruitment* ou vwar ki pe arive. Dimoun pe ganny dir zot pozisyon nepli bezwen. Me selman menm Departman pa pe kapab *recruit*.

Eski zot pa sey demann zot lekor, tou sa bann dimoun ki'n *call* zot, sa bann zenn ki pe rod en landrwa travay. Zot annan bann dimoun ki'n vin kot zot. Eski zot pa pare pou sey *challenge* sa? Gouvernman pa pou kapab fer zot naryen, zot in ganny elekte. Zot pa pare pou *challenge* Gouvernman? Dir Gouvernman, "be tyonbo en kou, ki mannyer ou pe dir nou sa, me selman ou annan dimoun ki pe demande, pe dir sa in ariv koumsa, sa in ariv koumsa?"

En lot keksoz ki enteresan, e la pou mwan mon bezwen sey ganny en konpran sa. Nou'n koz lo performans

ekonomik pei vizavi sa Bidze. Ti annan en levennman piblik kot tou bann *Leaders*, lamazorite bann *Leaders LDS* ti al an piblik pou pran zot vaksen *Sinopharm*.

Personnelman mon pa'n zanmen kont vaksen e mwan personnelman mon ti al dan mon sant, kot mon distrik ki mon sipoze ale, Sant Beau Vallon. Tou bann dimoun ti vwar mwan, mon ti ale mon ti al pran mon vaksen.

E sa ti pas en piblik sa. Me selman ler Prezan i al pran son bann doz *Pfizer*, pa pase an piblik sa enn. Personn pa konnen sa enn la. Me mon krwar i pe al en pti pe tro lwen. Mon krwar i pe al en pti pe tro lwen, akoz i bezwen annan en senserite, en senserite dan lafason ki - (Ou a ganny sans reponn mwan apre Onorab Georges napa problem) i bezwen annan en senserite dan lafason ki en Gouvernman i fer keksoz.

Nou pa kapab kontinyen dir Seselwa en keksoz e fer en lot. Ozordi nou annan nou en sityasyon kot nou annan Seselwa ki'n pri dan serten pei, akoz zisteman zot pa'n pran vaksen *Pfizer*. E sa vaksen ki zot in pran pa ganny *recognize*. Eski nou devret pran en vaksen?

Mwan personelman mon pran en vaksen pou ed ou. Si ou swa ou pa oule pran vaksen, sa i ou swa pou ou. Sak dimoun i a fer son swa.

I dan Bidze siplemanter Onorab, ou ti devret fer ou resers dan plas vin koz lo lanvironnman, sa ki pe pase ke sa bann kabri. Akoz si ou ti'n fer ou resers, ou ti ava konnen kaw ki ou dan en Bidze siplemanter. Ou pa ti a vin gat letan Lasanble dan plas vin asize regard sa sityasyon ki devan nou vizavi Bidze siplemanter.

En Bidze siplemanter i en moman pou nou regarde si vremen sa larzan an plis ki Gouvernman pe demande, pou al ver bann keksoz tanzib ki pou benefisy lepep Seselwa.

E demann ki mwan mon pe fer, ki mon'n fer bomaten se pou asire e mon konnen *Leader Zafer* Gouvernman in eksplik sa osi bomaten. I se ki lapros ki Lasanble in pran, se ki ou annan en lapros ki si Gouvernman pe al depanse, i fer nou konnen malgre ki Gouvernman i retenir sa pouvwar anba Konstitisyon pou li depanse.

Sa napa person ki kapab tire ek nenport ki Gouvernman. I retenir sa pouvwar pou li depanse, apre vin dir nou. Me

nou, nou bezwen egzize kwa ki pe ganny fer.

Rezon ki nou bezwen egzize kwa ki nou konnen pe ganny fer koman *MNA*, se akoz ler en kantite dimoun in vin kot nou. Par egzanp nou konnen ozordi poudir i annan R15 milyon ki pa ankor ganny servi kot Departman *Local Government*.

Me mon asize la anndan bokou *MNA*, menm si zot pa pare pou admet, in ganny dir proze in fini fermen kot *Local Government*. Si en dimoun pe dir mon pe *mislead* Lasanble, zot a lev zot lanmen zot a dir mon pe *mislead* Lasanble.

Sa ki enportan se ki nou bezwen realize poudir nou fer sir poudir sa bann larzan i al ver sa ki zot devret pe al pou fer. E mwan mon krwar i annan en keksoz fondamantal ladan. I annan en keksoz enportan.

Akoz ler mon pe get sa Bidze kapital ki la devan, reperkisyon sa Bidze kapital nou pou sati li lannen prosenn. Akoz i pa pou ale li, i pou retournen. E sa i annan en gran probabilitate ogmant defisit fiskal ki nou pou fer. Akoz zisteman sa R806milyon *plus* keksoz ki pou bezwen ganny idantifye ki lo plan pou fer lannen prosenn, pou bezwen ganny met ankor.

E nou koman Lasanble nou bezwen konsernen. Me koman Lasanble nou pa pou ganny akse avek sa *until* ki nou ganny Bidze 2022 ki vin devan Lasanble. Nou pa pou form parti prosesis deside si dan Distrik Bel Air par egzans pou annan en *housing estate*. Nou pa pou form parti desizyon si dan distrik Takamaka pou annan en lot proze. Si dan distrik Anse Royale pou annan en proze. Nou pa form part sa desizyon.

Nou pou dan Lasanble e dimoun ki pe ekout nou deor, ki pou espekte sa bann keksoz materyalize pa pou form parti sa desizyon.

E mon bi se demande ki nou re pozisyonn Lasanble, pou fer sir ki nou form parti sa prosesis, akoz zisteman nou dan en moman abnormal kot nou bezwen konnen kwa ki pe pase avek Bidze.

Mr Speaker, i relevan pou sa Lasanble konsider serten keksoz. Premyerman, eski nou zis aksepte akoz ozordi nou dan Gouvernman ki lapros ki ganny pran, akoz nou siport sa Gouvernman i meyer lapros?

Oubyen eski nou apre pou annan sa *guts*, sa kouraz pou debout e debout kont sa Gouvernman e dir ek li, akoz nou'n ganny elekte nou pare

pou nou debout e dir sa ki pe pase.

(Off-mic)

HON SEBASTIEN PILLAY

(Ou pe dir mwan 20 minit. Ni 1 mini ou pa'n kapab donn zabitan Grand Anse Praslin.)

Mwan Mr Speaker, mon regard sa sityasyon koumsa, e mon pou rezim li atraver parol ki Mr Ramkalawan li menm ti dir an 2014. Sa letan ti annan en Bidze R133milyon. E mon pou repet li, *verbatim* ki i ti dir.

“En lot Bidze pou en sonm R133milyon. Dan detrwa mwan pei pou ganny ankor enn e nou demann nou lekor konbyen Bidze siplemanter nou pou vwar sa menm Lasanble aprouve. It is *high time* sa Gouvernman i pran dimoun seryezman. Me unfortunately *as long* ki nou annan en *rubber stamp Assembly*, Egzekitiv pou kontinyen fer sa ki i anvi. akoz i konnen tou keksoz pou ganny aprouve.” Mr Wavel Ramkalawan le 10.05. 2012.

Me *in the meantime* i ti dir 2012. La i la Onorab Georges si ou le, *ok?* “*In the meantime maybe the IMF can really tell us what they are doing in this country.*”

So, i enteresan Mr Speaker, ki mannyer sa

Gouvernman lakantite keksoz ki in dir dan lepase, i pe rapidman *catch up* ek li. Akoz tou sa ki zot in dir ozordi, zot in dir sa letan pe vin realite ozordi pou zot.

So, mon *hope* ki prezan zot a koman viv dapre sa bann parol ki zot in donn pep Seselwa. Sa bann pwen dan manifesto ki Onorab William in *raise*, in met devan nou.

Fotespere ki pep Seselwa i santi ki sa manifesto i travay pou li. E mon swete ki ou ki pe ekout mwan apre midi la, pe al lo aswar. Ou satisfè avek swa ki ou'n fer, ou kontan swa ki ou'n fer e ou pou fer menm swa ankor ler ou ganny menm sans. Mersi Mr Speaker.

MR SPEAKER

Mersi.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Bonn apre midi ankor enn fwa. E tou bann dimoun ki a lekout dan lakour nou swet zot bonn ekout. In en deba enteresan e depi bomaten mon bezwen dir poudir bann lenformasyon ki mon'n gannyen avek Minis Finans, mon krwar in enteresan. Avek SS Finans,

in enteresan ek son bann teknisyen.

Sa in fer ki tou nou bann Manm Lasanble Nasyonal in ganny sans demann serten kestyon, klarifikasyon in *regards to* sa ki zot santi zot devret merit demann kestyon.

Me lo sa pwen Mr Speaker, mon ti a zis kontan remind Onorab Sebastien Pillay poudir napa enn mon bann Manm lo sa kote latab ki ti elekte li lot kote pou vin *Leader* Lopozisyon!

Son bann Manm lot kote ki ti elekte li pou vin *Leader* Lopozisyon. Savedir i ava donn lektir son bann Manm laba lot kote, i ava les mon bann Manm trankil lo sa kote latab.

(APPLAUSE)

HON SANDY ARISSOL

Nou, nou'n ariv en staz lo sa kote kot nou pa bezwen pran lord avek Lopozisyon. Lopozisyon li *deal* son *deal*. Nou, nou pe travay pou sa pei. Parey nou dir lo sa kote latab *we stand strong* avek Prezidan Ramkalawan!

(APPLAUSE)

HON SANDY ARISSOL

Mr Speaker, mon rapel lontan letan paran ti anvoy nou

laboutik, avek nou sak plastik zetwal ki ti kout 50 sou, oubyen nou sak plastik rouz ki ti kou R2, oubyen sak vakwa oubyen sak are. Ou paran ti donn nou en larzan pou al fer konmisyoun laboutik.

Me letan ou ti fini aste ou konmisyoun ki ti neser lo sa larzan, si i ti reste en larzan an plis lo sa larzan nou pa ti kapab depanse koman zanfan. Nou ti bezwen pran sa larzan retourn avek dan lakour kot nou paran. Parski sa ti en disiplin fiskal ki nou paran ti elve nou lo la.

Parski sa larzan ki ti reste ti kapab ganny en ti goute 10er lanmen. Ou ti kapab ganny en pake dipen lanmen 3er ler ou sorti lekou pou bwat en tas dite. E sa ti fer ki nou koman zanfan ti vin en fason disiplin. Pou nou konnen ki larzan ou depanse, ki ou pa fer ek bann larzan an plis ki ou paran in donn ou.

Ki arive ozordi? Ozordi deba i lo *savings*, sa larzan i la. Sa larzan pa la. Sa i en larzan ki ti pou la me selman i pa la. Deor nou tande poudir sa larzan i la. Mr Herminie i dir nou poudir sa larzan i la. Alors pran sa larzan donn R2000 tou travayer lo la.

Me parkont dan Lasanble Nasyonal ou tann son bann Manm pe dir pran sa larzan met dan lezot Minister. I annan i dir

ek nou non, sa larzan pa la alors nou pa kapab dir sa i en *savings*.

Mon pa tro konnen lekel ki ti elekte Mr Patrick Herminie koman ... *Party US* deor. I annan en kantite konfizyon lo la. Mon krwar i enportan pou zot rezourd sa lo lot kote apre zot a vin rod nou dan nou parti ki nou pe fer.

Mr Speaker, i annan en kantite keksoz ki'n ganny dir apre midi. Ou konnen, letan mon tann Onorab Cosgrow i vini i dir avek nou ;- lo sanmenm sa Mosyon ki nou pe koz lo la, poudir Seselwa i regret ki zot in vote, napa sanzman. Me i annan en kantite sanzman Mr Speaker, ki'n arive dan nou pei - pandan sa lan.

Premye sanzman;- Letan nou Gouvernman i get nou zenn pe soufer avek drog e i fer sir ki en eskobar i retourn dan son pei. I en sanzman sa pou Sesel, pou nou bann zanfan ki pe soufer Mr Speaker!

Letan ti annan labi kot sekirite sosyal e ozordi in ganny redwir. I bann sanzman sa ki'n arive anba Mr Ramkalawan sa Mr Speaker!

Letan travayer ki anvi travay pe travay. E la nou'n ganny vwar dan Mosyon i annan en kantite landrwa ki

annan plas travay pou nou bann Seselwa.

Me i en sanzman sa, parski ozordi in fer ki tou travayer ki anvi travay zot dan en lanplwa. I en sanzman.

Letan Gouvernman in ferm bann *STC Outlet* ki ti pe donn larzan bann detrwa endividi bann gro, gro sonm e *STC* pa ti kapab fer desann kou parski son lokasyon ti ser. I en sanzman ki'n arive.

Letan nou erport in ouver ozordi apre ki *US* ti refize ti dir *lock down* Erport. Mr Speaker, i en sanzman. Ou konnen aköz i en sanzman Mr Speaker. Parski si erport ti reste fermen parey *US* ti anvi, nou ti anba *lockdown*, enn zot Manm pa ti pou kapab al trete ozordi. Kekfwa son kondisyon lasante ti pou'n agrave!

Me gran mersi Erport in ouver, li avek lezot Seselwa zot in ganny sans al zot tretman aletranze.

Sa in bann sanzman ki'n arive dan nou pei Mr Speaker. Nou bezwen rekonnèt e aksepté. Sanzman ki Onorab Wallace Cosgrow pe rode Mr Speaker. Si li in sorti Minis, i en *MNA* dan Lasanble koman Manm Proporsyonnel i en sanzman sa !

(APPLAUSE)

HON SANDY ARISSOL

Pli gro sanzman ki i devret vwar se sa! E sa i en zoli sanzman ki nou, nou'n donn li e i pou viv avek pandan 5an !

Alors Mr Speaker. Me parkont zot problem se sa *savings*. Zot tapaz se sa *savings*. Onorab Aglae i vini dan tout iminite, i dir ek nou poudir bann *DA* pe ganny problem pou zot fer zot travay aköz sa rotasyon.

Alors se *MNA* Aglae, Port Glaud ki pe fer louvraz *DA*. I normal, parske i ti deza *DA* avan li. I *ok*, savedir i konn sa louvraz par ker.

Selman lozik par deryer, mon pa ganny en konpran. Si Onorab Kelly, i en ansenyan profesyonnel i sorti Au Cap, ou le dir mwan Onorab Kelly pa pou kapab al ansenny zanfan dan lekol Port Glaud? Aköz zanfan dan lekol Port Glaud pou konfize avek Miss Kelly ki reste Au Cap. Mon pa tro konpran sa lozik mwan ?

Me parkont zot in servi legzanp *NSC*. Minis pe tir en travayer, pe fer *redundant*. Me selman an menm tan i ape rod en lot dimoun. Zot oule fer nou krwar poudir si en Minister i bezwen *financial controller* e i napa, me i annan en drayver an plis, olye fer sa drayver kite, i a

dir ek sa drayver vin mon *financial controller*? Sa ki US pe dir ek nou Mr Speaker?

Sa i zis parey ou annan en loto dan en garaz ki pa fonksyonnen. Me borlanmer ou annan ou en pti *fibreglass* ki annan en masin. Ou dir ek ou fanmir ou pou pran sa masin *fibreglass*, mon a met li ek sa loto, i ava anmenn nou lavil. Sa ki zot pe dir nou?

Se pour sa rezon ki zot dan Lopozisyon. Zot nepli annan naryen pou ofer zot. Zot pou la pou plennyen pou 5an. E nou pou aksepte zot pou plennyen. Zot pou la pou konplent pou 5an. E nou pou aksepte zot pou la pou konplent pou 5an. Parski sa i rol Lopozisyon.

Letan Onorab Pillay i vini i dir avek nou, nou pa pe koz lo Mosyon. Nou pa pe koz lo merit Mosyon. Me dir mwan ki Onorab Pointe Larue in dir en pti kou? Si i ti koz lo Mosyon Onorab Gabriel- soz?

(laughter)

HON SANDY ARISSOL

Sey dir mwan ki Onorab Gabriel dan ou lekip in dir bomaten?

(laughter)

HON SANDY ARISSOL

Me parkont parye ou'n dir, Onorab Lemiel in fer en zoli entervansyon. Me pa montre ledwa lo nou, akoz lo ou kote osi i annan plizyer sa ki ou'n zisteman ou'n koz lo la.

Mr Speaker, ou konnen akoz ozordi nou Gouvernman i annan en *savings* nou pe koz lo la e zot, zot vwar sa drol akoz dan zot parti ti napa? I senp, akoz ti napa lo zot kote sa ki nou apel *savings*? Sa *savings* ki nou pa vwar, ki ti la, ki ti pou gannyen? Nou'n tann bal dan Zarden Botanik, nou'n tann bal dan simityer. Nou'n tande poudir lari bofrer ti pe ganny fer atraver larzan Gouvernman. E tiyo ti'n ouver.

Nou'n tande poudir ki Minis ti pe ganny senmen. Ti annan, tou bann Mister la ler ti reste zot en pti larzan, zot ti santi poudir sa i zot larzan. Setaki ti kapab donn en bal mannyer i anvi. E sa in fer ki ozordi nou dan en sityasyon ekonomik, kales kase parey nou Prezidan in deklar li. Kot nou bezwen rod led avek Lorganizasyon Enternasyonal, pou asire ki Mr Herminie ki ti ansyen SS, enkli Mr Dick Esparon ki ti ansyen Anbasader, zot, zot pou ganny zot songo.

Konbyen zot ki'n koz lo sa songo la lo lot kote latab? Personn pa'n koz lo la Mr Speaker. Selman Onorab Pillay i oule donn nou en leson an relasyon avek lafason ki nou pou fer nou travay.

Me parkont mon anvi dir avek bann dimoun ki pe rod en lasyet manze, enkli bann zournalis. La ler zot zwenn sa 3 dimoun laba dan *SPPF*, demann zot konbyen ki zot pe gannyen lo sa ki nou pe vote, lo sa Mosyon? Demann zot! Sa bann kestyon ki zournalis devret pe demande.

Pa tola tola. Parey zot ti dir Gouvernman pe trenn lipye? Gouvernman pa'n trenn lipye. Gouvernman in asire ki zot tou lo lot kote latab, kantmenm an sou sekre, zot in ganny zot vaksen. La Gouvernman pe asire ki tou zot zanfan, enkli mon zanfan pou ganny son vaksen. Eskiz Gouvernman pe trenn lipye? En, sa zot apel Gouvernman pe trenn lipye?

Mr Speaker, nou Gouvernman pe travay. Me parkont kont sa ki nou toultan dir dan *LDS*, letan nou vot larzan i enportan pou bann Minister delivre dan zot servis ki zot rann nou.

Par egzanp letan mon get *PCU*. Letan *PUC* - mon ti a kontan demann avek Minister

Finans enkli Gouvernman. Letan nou pe ed *PUC* rod en larzan, tape en laport parski Bel Ombre dan Nor Beau Vallon i annan sa koneksyon *STP* ki'n komanse en bann letan pase, e in aret dan milye semen e nou annan problemm kot bann lakour *in regards* to problemm *sewage* ki annan dan sa distrik.

Alors mon pou vote, parski mon santi *PUC* i annan en kantite travay pou li fer. Kontinyen ed li pou li osi kapab ed bann zabitan ki reste.

Me parkont, letan nou koz *PUC*, Mr Speaker, nou bezwen pran an kont poudir *PUC* dan letan *COVID* i ti reste fonksyonnen 24 lo 24 li. E son bann travayer in travay, zot in delivre letan nou, nou ti dan lakour.

Alors i pou enportan, anmezir sityasyon ekonomik i avanse, i amelyore. Parey Onorab William in koz lo la, pou ban travayer ganny en pti keksoz an plis. Parski bann travayer kot *PUC* i santi, tou ban ki ante nouvo zot ganny plis pou bann ki la ki plis ki 10an.

E bann travayer *PUC* pe demann osi ki bann kad sekirite, sirtou bann ki travay dan *water supply* pou zot ganny bann *safety net* enportan pou zot kapab fer zot travay.

Health care agency Mr Speaker: Letan mon'n vwar i annan 6.8 milyon pou *housing*. Mon krwar in plis ki ler pou Gouvernman ozordi avek Minister Lasante, get bann Dokter. E Bel Ombre, mon en bann distrik kot mazorite bann Dokter i reste. Mont Simpson, Fisherman's Cove Estate. Pou vwar en *Scheme* pou donn nou bann Dokter.

En *Housing Scheme* pou nou bann Dokter. I annan plizyer Dokter ki'n reste dan sa bann lakaz pou plizyer lannen, zot anvi ki zot lakaz i ganny vann avek zot pou zot kapab aste, pou zot konstri, pou zot anbelir, pou zot kapab santi zot konfortab parey i annan *Housing Scheme* pou *teacher*. I annan *Housing Scheme* pou bann Ziz. Me pou nou bann profesyonnel parey Dokter osi zot ganny sa ki pou zot. Mon krwar i enportan dan tou sa bann demars pou nou fer.

Trwazyenm pwen, mon dernyen pwen Mr Speaker, se an relasyon avek LWMA. Parey lamazorite distrik in dir, *MNA* in dir. Nou annan en problem *in regards to LWMNA*. SS Payet in nobou asir nou poudir pou annan en remaniman ki zot pou re travay lo la, an konsiltasyon avek nou.

Parski mon santi e mon rapel letan bann kontra ti ganny fer. Mon pa rapel lekel Minis ki ti la, ki ti dir ki tou bann kontra, tenir tou bann kontra lanmenm. Parski tou sa bann zafer kontra Mr Speaker, i pou enportan pou nou revwar.

Parski mon Bel Ombre, mon pa satisfes avek bann dimoun ki pe netway mon distrik Bel Ombre. I annan ki'n ganny kontra, zanmen mon'n vwar zot figir Bel Ombre. Me parkont nou annan dimoun ki pe fer en travay ekselan in regards to netwayaz. Me parkont LWMA nou annan sa ki nou apel lokasyon bann *bin site*.

Letan mon pe koze la, moman lafanmir D'Offay ki reste zis *opposite* Legliz St Roche. I annan en *bin site* drwat obor son lakaz. Sak fwa bin i plen, tou salte i *end-up* dan son lari. Letan bann dimoun i von netway *bin site* Mr Speaker. Tou sa siro zannannan bin i desann dan son lari oubyen dan semen kot i pase.

Se pour sa rezon mon pe dir, nou pou bezwen donn sipor Gouvernman. Nou pou bezwen donn larzan pou asire ki bann lenfrastruktir i kontinyen. Bann biznes dan distrik i kontinyen lo menm lanpler, pour ki nou bann zabitan pa ganny afekte.

Me parkont lo nou kote, nou pou kontinyen asire ki nou Gouvernman i kontinyen fer sa travay. Si nou pep pa ti kontan oubyen regrete in voit pou nou, i tou pou al ek sa 4 dimoun ki debout kot Lorloz. Si sanmenm sa 4 ki ankor la, savedir *LDS* i kontan nou la.

Si ti napa *COVID*, le 25 Oktob mwan prosen *guys*, nou ti pou *flood* lavil parey nou ti fer lannen pase. La zot ti pou konn nou vre lafors. Me pour lemoman, nou a les zot.

Parski letan Onorab Ramkalawan, Prezidan, Sa letan ti ganny kas son latet kot Library Nasyonal zot de Onorab Ferrari, ozordi i pou letan ou vwar detrwa *US* vin devan avek zot *banner*. Sa i en lot sanzman dan li menm. I en lot sanzman dan li menm.

Alors Mr Speaker, mwan mon pou donn sipor Mosyon anmenn par Onorab Georges e mon krwar deliberasyon in al tre byen. E nou pe fer sitan byen koman *LDS* e nou pou la pou ankor 5an. Parey nou pe dir, nou ki pe *run the border*. *Sorry* pou zot lab a lot kote. Nou a les zot tola, tola apre dimoun ava deside ki vremen i anvi. Me pa zot i pou deside. Lepep Seselwa ki pou dir nou si zot kontan oubyen non.

Avek sa detrwa mo Mr Speaker, mon ti a kontan remersi mon bann Manm ki'n koze e remersi bann Manm lot kot e osi kantmenm zot pa'n dir gran keksoz. Me selman zot in partisipe. Mersi bokou Mr Speaker.

(APPLAUSE)

MR SPEAKER

Mersi. Byen, mon a pas Onorab Adelaide.

HON FRANCOIS ADELAIDE

Mersi Mr Speaker. Bonn apre midi tou bann dimoun e prensipalman bann dimoun Baie Lazare ki pe ekout mwan. So, mon pou bezwen pran en pti laparol ozordi swar mon osi pou koz en pti git lo sa Bidze siplemanter. Menm kantmenm nou'n trouve poudir nou klinik sa lannen pa pou aboutir. Me selman ki mannyer negosyasyon pe ale, nou konnen by lot lannen nou klinik i pou komans konstrir.

Mr Speaker, ler mon'n tann Onorab William koz lo sa parabol, bef, dile. Nou konnen ki i ti pe sey dir. Me ler ou tann Onorab *Leader* Lopoziyon, akoz li, byensir i pa pou konpran ki savedir, bef, dile avek park. Li i pe ganny R60 ekek mil tou le mwan. I pe

ganny li en drayver, i pe ganny li en loto, i pe ganny *fuel*. So, eski ler ou tann Onorab William pe koze, eski ou kapab dir li ki pa konnen ki pe dir?

MR SPEAKER

Un instant.

HON FRANCOIS ADELAIDE

Onorab William i dan distrik e i konnen ki i pe fer.

MR SPEAKER

Un instant. Onorab.

HON SEBASTIEN PILLAY

Me byensir Mr Speaker. Mr Speaker akoz si i pe dir mwan mon pe ganny 60 ekek mil. Ou, ou ganny R60 ekek mil ... ou osi ou ganny drayver. Onorab Georges ...

(Interruption)

HON SEBASTIEN PILLAY

Ya Mr Speaker, mon obzekte. Akoz si li i pou vin fer sa bann komanter lo mon ganny R60 ekek mil. Mon saler i dan liv Bidze mwan.

HON FRANCOIS ADELAIDE

Be ki ou pe ankoler?

HON SEBASTIEN PILLAY

... tou sa ki mon gannyen. Ou osi i ganny R70 ekek mil, ou osi

i ganny drayver. Onorab Georges osi i ganny R60 ekek mil. Li osi i ganny drayver. Li konbyen i gannyen li ? I ganny 50 ekek mil – be pa i ganny 30 ekek mil Roupi li.

MR SPEAKER

Ok-ok.

HON SEBASTIEN PILLAY

So si i le koz lo saler nou a koz lo pou li. Ou konpran?

MR SPEAKER

Wi. Onorab Adelaide, annou pa antre dan konparezon saler bann Manm...

HON FRANCOIS ADELAIDE

Ok-ok. Be selman Mr Speaker, i enportan pou dimoun deor konnen, akoz nou osi nou saler, mon ganny R25 mil e mon donn gas, mon pey elektrik ...

MR SPEAKER

Silvouple, sorti lo sa pwen, kontinyen.

HON FRANCOIS ADELAIDE

... e dimoun i bezwen konnen.

HON SEBASTIEN PILLAY

Be konbyen Prezidan Larepublik i gannyen?

MR SPEAKER

Kontinyen-kontinyen.

(Interruption)

HON FRANCOIS ADELAIDE

Mr Speaker, sa Bidze ki nou pe koz lo la. Bidze siplemanter la ki nou pe koz lo la. I enportan pou bann Manm US konnen poudir nou ti ganny elekte an Oktob 2020. Ti en Bidze ki ti'n fini prepare avek zot Gouvernman ki annan enn zot Manm la ki ti Minis sa letan.

Sa fodre nou pa bliye. E ou a riye Mr Speaker, ler Minis Joubert ti vini dan Lasanble, sanmenm sa dimoun ki ti prepar sa Bidze, sa Minis, li i ti demann Minis Joubert, mon pa konnen si zot mazine. Nou vwar en pe larzan pou deratizasyon. Kote zot pe al fer deratizasyon? Minis Joubert ti fer li konpran poudir non, pa pou deratizasyon sa. Sa sete pour lanbelisman. E sa Bidze se li ki ti prepare.

(laughter)

HON FRANCOIS ADELAIDE

I pa konnen ki i prepare. Ler i vin la i demann Minis ...

(laughter)

(APPLAUSE)

HON FRANCOIS ADELAIDE

... ki i pou fer avek sa.

So, ou remarke poudir sa Bidze ki zot ti donner la, zot menm zot pa ti konnen ki zot pou fer avek.

(Interruption)

HON FRANCOIS ADELAIDE

E Mr Speaker, se sa ki ou vwar nou bezwen vini o fir e anmezir pou nou aranze ziska 2022. Nou a ganny nou ganny nou Bidze pou nou e la nou ava dir be ok, sa nou Bidze e nou, nou ava kapab defann nou Bidze.

E byensir si nou bezwen en pti siplemanter nou ava fer sir ki nou ava vini.

Mr Speaker, mwan mon krwar sa Bidze lanfaz i devret ganny ...

(Interruption)

HON FRANCOIS ADELAIDE

Zot tann mwan? La zot tann mwan byen Mr Speaker. Wi-wi.

(Interruption)

HON FRANCOIS ADELAIDE

Mr Speaker, mwan mon krwar lanfaz lo sa Bidze li la, la. Nou bezwen fer keksoz en lot fason. Avan sa nou ti tande poudir

Gouvernman ki ti la ava tou kou *recruitment* pa ti marse. Nou pa ti vin depans larzan.

Me mwan mon krwar sa Gouvernman ki'n vini la, nou bezwen met lanfaz lo bann sef anler. Si ou demann en larzan, ou bezwen kapab konnen ki ou pe al fer avek. E pas les kominote soufer ki ou, ou pa kapab depans. Ou'n rod en tal larzan pou kapab fer ou proze me apre ou pa depanse, e pep i soufer.

Mwan mon krwar mon devret anvoy en mesaz pou Mr Ramkalawan avek son lekip. Si lannen 2022 nou met larzan dan Bidze, fodre sa bann larzan i ganny depanse e fodre pep i santi sa retonbe.

E mwan mon pou ensite, mon pou ensite Mr Speaker, akoz nou ki soufer ler sa bann keksoz pa ganny depanse.

Mr Speaker, lease dan Lasanble ou rapel byen, ti annan en lepok ki *SPDF* - Lasanble ti koup 120milyon. 120milyon. I ti dir zot si zot mank larzan vini nou ava donn zot. Mr Speaker, ou konnen ki ti arive lafen lannen? Be demann *SPDF* si i pa vin sers son larzan, i dir non, nou'n fer profi.

Nou koup 120milyon, anba sa Gouvernman ki ti la oparavan e ki nou annan en

Minis la ki ti dan sa Gouvernman. E 120milyon nou koupe i dir zot in fer profi. Savedir i montre ou ki kantite labi ti annan dan lepase. E nou, nou bezwen fer sir ki sa bann labi koumsa i arete.

E mon mesaz pou egzektiv ozordi. I fer 10 mwan depi ler ki zot in pran sa bann responsabilite. Mon pase ki letan *learner* pe fini - 1an. E lot lannen nou pou bezwen fer sir ki nou met zot an tyek, pour ki keksoz ki ganny deroule byen e ki Seselwa i benefisye.

Mr Speaker, ler mon pe get en kou sa zafer *savings*. Mon oule fer pep Seselwa konpran en keksoz byen. Nou'n tann Onorab Cosgrow dir taler napa *savings*. Mr Speaker, en boug ki'n al fer letid *economist*. Ler ou pe montre li en keksoz i pe dir ou non, demande ki kalite *training* zot in al fer? Ki kalite letid zot in al fer? I senp.

MR SPEAKER

Onorab, evite atak bann

HON FRANCOIS ADELAIDE

Non, non, mon pa pe atak li Mr Speaker. Zis mon pe dir li akoz i dir i pa konnen.

MR SPEAKER

Onorab ou kapab fer ou pwen tre byen, san ki ou fer bann

komanter personnel lo lezot Manm. Mersi.

HON FRANCOIS ADELAIDE

Ok, ok Mr Speaker. Mon ava les li. Wi, wi.

Mr Speaker, pran par egzantp. Tou Seselwa i koumsa. Ok? Tou Seselwa i koumsa. Ou napa larzan, ou al rod en *loan* labank. Fer krwar nou rod en *loan* R10mil. Larzan pa pou li. Ou'n al ek labank ou'n ganny en *loan* R10mil. Ou ti sipoze ale, ou dir ok, mon ava aste en televizyon, mon ava aste en radyo, *whatsoever*.

Ler ou get, ou dir be ok, mon ava plito aste sa radyo. Sa televizyon i en pe tro ser, sa larzan mon ava fer en lot keksoz avek sa larzan. Swa mon ava kit li la pou letan dir.

Ou pa depanse sa larzan pou aste en televizyon. Eski sa larzan ki ou pa'n depans pou en televizyon, eski i pa vin en *savings* ki ler ou pe gete kantite larzan ki ou'n depanse i mwens? E se s aki nou pe dir ki sa i en *savings*.

(Interruption)

HON FRANCOIS ADELAIDE

Mr Speaker, i pa pe konpran ki mon pe dir li, aköz li in fini met son lespri ladan li. I pou dir pa bon, i pou dir pa bon. E mwan

mon pe eksplik ou ki mannyer, atraver ou kote sa *savings* i kapab vini.

(Interruption)

MR SPEAKER

Onorab Uranie ek Onorab Cosgrow silvouple aret enteronpe. Mersi.

HON FRANCOIS ADELAIDE

Wi-wi Mr Speaker, ou konpran. Le problem zot pa pe konnen ki nou pe koz lo la e zot pe montre pep Sesel poudir sa ki zot pe dir i byen. Kan larealite sa ki zot pe dir i mal.

Mr Speaker, ou tandé. *Leader* Lopozisyon sa. Mr Speaker, mon byen kontan ki mon vwar en larzan ki'n mete pou Anti-Koripsyon. Yer mon tandé nou'n koze, mon pa ti la. Me *Leader* Lopozisyon, ti annan en Manm dan Lasanble ki ti dir bann zafer koripsyon, isi laba.

Me mwan mon kontan mwan e mwan mon pou fer sir ki sa zafer pwen pou later i annan Manm ki ler nou pe dir sa zafer pwen pou later, li aköz i annan koneksyon in ganny en bout later san bezwen pas par sistenm pwen. Kan tou son dimoun pe esper sistenm pwen.

E sa se en akt koripsyon. E mwan mon krwar sa osi i ava

en keksoz pou nou fer Anti-Koripsyon get ladan e si in ganny sa later malapropo ou a rann sa later, Mr Speaker. Sa dimoun fodre rann.

Mr Speaker, ler mon fini sa bout ki la, mon vin en kou lo sa slogan ‘ser sang.’ Parey Onorab Aglae in dir, ‘slogan ser sang.’ Pa mwan ki ti envante, mon ti tann li ler mon ti ankor en pe ti pti. Me les mwan dir Onorab Aglae, parey i pe dir poudir nou Manm LDS nou per pou marse dan distrik, aköz nou pep pa oule vwar nou. Be Mr Speaker, pa fodre al tro lwen. Al la deor dan *car park*. Get lekel bann MNA ki pe mars dan loto vit nwar !

(laughter)

(APPLAUSE)

HON FRANCOIS ADELAIDE

Al le deor ou a trouve. Pep Seselwa i a deside lekel ki per son dimoun, lekel ki pa per son dimoun!

(laughter)

MR SPEAKER

Ale.

HON FRANCOIS ADELAIDE

E letan nou koze fodre pa nou anvoy keksoz partou kote, aköz i kapab tonm lo nou.

Mr Speaker, pou mwan fini, mon annan en size serye ki mon anvi koz lo la. Semenn pase, mon ti koz lo SPTC ler zot ti dir i annan *leakage*. E ozordi i annan R27milyon ankor ki nou pou aprouve. Mon oule anvoy en mesaz pou CEO SPTC avek son delegasyon. Ler mon ti dir sa, mon pa ti dir zot al fer okenn *witch hunt* laba kot SPTC. Kot i mal nou dir i mal e zot koman CEO zot bezwen aranze e fer sir ki sa bann keksoz pa repete.

E sa ki mon tande, i annan *witch hunt* pe ganny fer e i en dimoun pe ganny targete. Mon pou demande ki si i ariv okenn problemm avek, sirtou mon bann zabitan. Aköz zot konnen i frekant mwan. Nou pou pran sa keksoz byen, byen, byen serye.

Aköz i pa devret koumsa. E mwan mon pa *believe* ki si mwan koman en MNA mon vini mon koz en keksoz, ki ou bezwen al fer *witch hunt* avek bann dimoun laba. Mr Speaker pa marse.

Mr Speaker, mon byen kontan ki *West Coast Development* pe al demare. Nou’n ganny dir dan milye Oktob. Kantmenm i ava

Novanm, me selman i en proze ki Baie Lazare pou gannyan.

Mon pe ensiste ki malgre ou pa pe ganny nou klinik. Proze drenaz kot ex-Pool, PUC i antreprann sa proze. Apre nou annan en lot proze ankor, basen dan Merl. Sa osi ti annan en kestyon sorti dan Lasanble par en dimoun ki li menm li 2an ti pe dormi lo sa proze. Akoz li ki ti Minis.

Mon oule fer referans ek naryen mwan, apre li ki ti anmenn sa kestyon. Ler mwan mon'n lager pou ganny basen, li apre i anmenn sa kestyon. So, sa osi mon demande ki sa keksoz i ava materyalize, pou ki bann zabitan i ava ganny zot delo e tou dimoun i ava kontan.

Mr Speaker, Sesel i bezwen en Lopozisyon. Nou bezwen en Lopozisyon serye akoz nou konnen kiltir Sesel, si zis Egzekitiv i bokou, napa Lopozisyon keksoz pa pou bouze. Nou bezwen en lopozisyon serye. Me la mon pe lans en lapel avek bann pep deor silvouple sa ki oule antre dan politik koman Lopozisyon vini, akoz pour lemoman nou napa en Lopozisyon !

(APPLAUSE)

HON FRANCOIS ADELAIDE

Nou, nou avi keksoz bouz devan e mon asire ki si nou ganny en Lopozisyon ki serye keksoz pou bouz pli vit ki nou espekte.

E Mr Speaker, mon remersi ou pou donn mwan sa sans pou kapab koz lo sa *Bill*. E Onorab Bernard Georges. *Sorry* lo sa Mosyon. E Onorab Bernard Georges, kont lo mwan, mon pou donn sipor sa Bidze siplemanter. Mersi.

(APPLAUSE)

MR SPEAKER

Mersi. Bon mersi bokou Onorab. Mon ava envit *Leader* Biznes Gouvernman pou fer son *summing-up* lo Mosyon.

HON BERNARD GEORGES

Mersi bokou Mr Speaker. Mr Speaker, ler i tar mon pa oule gard zot pli lontan ki neser.

Lasanble parey nou tou nou konnen i en landrwa kot nou fer politik Mr Speaker, e ozordi nou'n fer sa pandan en zournen plen. E i byen, i byen ki nou fer politik. I byen ki nou agas kanmarad tanzantan, sa se nou travay. I byen ki nou pa tonm dakor lo tou keksoz. Sa i toutafe normal.

I en deba ki mon ti a kontan dir i ti anrisisan, me mon pa oule *mislead the House*.

In en deba ki ase enteresan, mon krwar mon kapab dir. E mon remersi tou bann entervenans ki'n pran laparol ozordi.

Me nou annan nou devan nou en Bidze siplemanter R303 milyon ki nou bezwen pase e mon ti a kontan apre midi, apre ki mon'n tann tou dimoun, dir ki mon satisfè ki Bidze pou pase avek sipor Lopozisyon oubyen san sipor Lopozisyon, Bidze pou pase la ler nou vot lo la taler.

Mr Speaker, mon'n ekout avek bokou lentere bann entervenans lo lot kote latab e mon kapab rezim tou sa ki zot in dir, tou sa parol ki zot in koze lo 2 pwen. E sa set en *tune* ki zot pe zwe depi zot in antre dan Lopozisyon. E i en gitar ki annan zis 2 lakord lo la. Premye lakord i apel dimoun pou perdi louvraz, e dezyenm lakord i apel, donn zot en lasistans.

Sa zot repete *a vitam aeternam*, sak kestyon, sa Mosyon, sa *Bill*, zot retourn lo sa menm gitar avek son 2 lakord e zot zwe sa *2 tune*.

Silvouple, silvouple rod lezot largiman pou vin avek. Anmenn en pe letof dan sa ki zot pe dir. Pa toultan retourn lo menm zafer. Akoz les mon dir zot Mr Speaker, atraver ou, sa i en nouvo Gouvernman si zot

pa ankor realize. I en nouvo fason fer.

Pou annan en restriktirasyon. E dan restriktirasyon pou annan dimoun ki pou sanz lanplwa. I absoliman nesaser. *Get use to it* mon bann koleg, akoz i pou kontinyen arive. E se sa ki lepep Seselwa in vot pou zot gannyen lannen pase. E nou pa pe fer mwens ki delivre lo sa ki lepep Seselwa in vot pour gannyen lannen pase.

E dan sa konteks, mon ti a kontan remersye Minister Finans avek son lekip ki zot in kapab dan en kourt dele, dan en tre kourt dele anmenn en Bidze siplemanter devan nou. Kot zot pe rod en *increase* R303 milyon. Me zot in trouv en fason pou save R1.4milyon. E sa se en travay eksepsyonnel ki en Gouvernman in kapab fer dan mwens ki 1an.

E mon kapab dir Mr Speaker, ki mon annan non selman konfyans, me mon aplodi sa Minis avek son Minister pou sa travay ki zot in kapab fer. E ki zot in kapab anmenn devan nou ozordi dan lespas mwens ki 1an, en Bidze siplemanter ki pe montre en *net saving of R1.2billion*. Felisitasyon.

Me i pa en keksoz ki nou pa ti espekte. Akoz zot in koz taler lo, i annan enn parmi zot

in koz lo restriktirasyon ekonomik 2008. Wi, restriktirasyon ekonomik 2008. Be zot konnen lekel sa dimoun ki ti sef dan sa restriktirasyon ekonomik? Se sa menm dimoun ki ozordi i Vis-Prezidan Sesel, Ahmed Afif.

(APPLAUSE)

HON BERNARD GEORGES

Ler ou annan en boug koumsa ki a later ou ki segon lo bato, ou espekte ki striktir ekonomik nou pei *will go from good to better*. E i pou kontinyen koumsa Mr Speaker e mon krwar, mon bezwen *underline* lefe ki sa ki arive la ozordi, mon bann zanmi dan Lopozisyon zot pou vwar li *over and over again*.

E parey mon'n dir zot taler, *get use to it* akoz zot pou annan sa pou sa 4an ki pe vini e tre probableman sa 5an ki pou swiv sa 4an.

E Mr Speaker, ou a permet mwan prezan adres 2 parol avek 2 Onorab ki'n dir de keksoz dan nou Lasanble apre midi.

Premyerman atraver ou, Onorab Aglae. Onorab Aglae, ou'n dir nou ki lepep Seselwa i regrete ki zot in fer le 24 Oktob. Mwan an repons, les mwan dir ou Onorab ki si zabitan Port Glaud i regret sa ki zot in fer,

zabitan Grand Anse Mahe avek Grand Anse Praslin pa regrete sa ki zot in fer !

(APPLAUSE)

HON BERNARD GEORGES

Zabitan Anse Boileau pa regret sa ki zot in fer. Zabitan Baie Lazare, zabitan Takamaka, zabitan Au Cap, zabitan Cascade, zabitan Mamelles, apart Roche Caiman. Tou lo Mahe, zot pa regrete sa ki zot in fer.

(APPLAUSE)

HON BERNARD GEORGES

O kontrer zot byen satisfè avek sa ki zot in fer e la tanto ler zot pou get televizyon zot pou pli satisfè ankor, akoz nou pou'n pas en Bidze ki pe fer en *savings* 1.2bilyon.

E finalman, mon koleg ek mon zanmi, Onorab *Leader* Lopozisyon, Onorab Pillay. Ki taler in dekrir Prezidan Ramkalawan koman 'zot' Prezidan.' Setadir, 'nou' Prezidan. Onorab Pillay, Prezidan Ramkalawan i 'nou' Prezidan wi, me i osi 'ou' Prezidan pou sa 4an ki pe vini ek sa 5an ki pe vini ankor apre sa.

(APPLAUSE)

HON BERNARD GEORGES

Alors parey mon'n dir zot taler, *get use to it my friends. Get use to it my colleges* akoz koumsa ki sa pei pou bouze dan sa bann letan ki pe vini.

Mr speaker, an konklizyon mon ti a kontan remersye tou dimoun ki'n promet zot sipor pou sa Bidze siplemanter, in en zournen tre enteresan e mon kont lo zot sipor. Mon remersye ou Mr Speaker.

(APPLAUSE)

MR SPEAKER

Mersi Onorab Georges. Nou a pran vot lo sa Mosyon silvouple. Mon krwar enn de fwa mon'n lir Mosyon avan nou vote. Mon a zis lir Mosyon Onorab Georges i lir koumsa ;-

The National Assembly resolves to approve a supplementary estimate of SR 303,911,788.83 for the year 2021 laid before the Assembly in accordance with Article 154(6) of the Constitution. Manm ki an faver lev lanmen silvouple? *Ok, ok* madanm. Mersi, okenn Manm ki kont? Byen.

Lo vot lo Mosyon, Motion to *approve a supplementary estimate of SR 303,911,788.83 for the year 2021 laid before the*

Assembly in accordance with Article 154(6) of the Constitution in ganny 22 vot pour, 0 kont e 8 abstansyon. Alors vot in aprouv Mosyon lo *supplementary Budget.*

(APPLAUSE)

MR SPEAKER

Ok, i reste pou mwan remersi Lasanble pou zot travay. E nou'n depas en pe letan ordiner. Me selman mon krwar nou'n byen servi li. Mon a swet zot bonn sware, e nou annan enn de rankont dan larestan lasemenn. So, nou a sipoze nou a zwenn zot dan sa peryod. Nou a re pran travay Mardi prosen 9er. Mersi. *Adjourn.*

(ADJOURNMENT)